

San Mateo

1 Yaa jaduhñ myiñ cujaay nebiaty ja'a Jesús yhap tieedyhajxy jecy xiøhajty. Abraham xiøhajty ja'a jawyiinhájtäbä. David xiøhajty ja'a cujecy jaac miiñäbä.

²Ja'a Abraham yhuung, Isaac je'e xiøhajty. Ja'a Isaac yhuung, Jacob je'e xiøhajty. Ja'a Jacob yhuung tu'ug, Judá je'e xiøhajty. May ja'a Judá ja'a piuhya'ay hänäjty miøødä. ³Ja'a Judá yhuunghajxy, Fares hajxy xiøhajty møødä Zara. Ja'a Fares tiajhajxy, Tamar je'e xiøhajty. Ja'a Fares yhuung, Esrom je'e xiøhajty. Ja'a Esrom yhuung, Aram je'e xiøhajty. ⁴Ja'a Aram yhuung, Aminadab je'e xiøhajty. Ja'a Aminadab yhuung, Naasón je'e xiøhajty. Ja'a Naasón yhuung, Salmón je'e xiøhajty. ⁵Ja'a Salmón yhuung, Booz je'e xiøhajty. Ja'a Booz tiaj, Rahab je'e xiøhajty. Ja'a Booz yhuung, Obed je'e xiøhajty. Ja'a Obed tiaj, Rut je'e xiøhajty. Ja'a Obed yhuung, Isaí je'e xiøhajty. ⁶Ja'a Isaí yhuung, David je'e xiøhajty. Mänitä David tiägøøyy gobiernähajpä. Mänitä Urías yajyagho'cä mänaa ja'a tsip jiadyiijän. Coó ja'a Urías yho'cy, mänitä David ja'a Urías tio'oxiøjc wyiingpøjcä. Mänitä

David yaghuungpaaty. Salomón ja'a yhuung hajxy yajxøhajty.

⁷Ja'a Salomón yhuung, Roboam je'e xiøhajty. Ja'a Roboam yhuung, Abías je'e xiøhajty. Ja'a Abías yhuung, Asa je'e xiøhajty. ⁸Ja'a Asa yhuung, Josafat je'e xiøhajty. Ja'a Josafat yhuung, Joram je'e xiøhajty. Ja'a Joram yhuung, Uzías je'e xiøhajty. ⁹Ja'a Uzías yhuung, Jotam je'e xiøhajty. Ja'a Jotam yhuung, Acáz je'e xiøhajty. Ja'a Acáz yhuung, Ezequías je'e xiøhajty. ¹⁰Ja'a Ezequías yhuung, Manasés je'e xiøhajty. Ja'a Manasés yhuung, Amón je'e xiøhajty. Ja'a Amón yhuung, Josías je'e xiøhajty. ¹¹Ja'a Josías yhuung tu'ug, Jeconías je'e xiøhajty. Jimä Jeconías ja'a piuhya'ay hänäjty miøødä. Mänitä judíoshajxy hadsip yajnøcxä jäguem Babilonia-naaxooty.

¹²Jim hajxy chánaadiaacpøjcy Babilonia. Jimä Jeconías ja'a yhuung yajxøhajty Salatiel. Ja'a Salatiel yhuung, Zorobabel je'e xiøhajty. ¹³Ja'a Zorobabel yhuung, Abiud je'e xiøhajty. Ja'a Abiud yhuung, Eliaquim je'e xiøhajty. Ja'a Eliaquim yhuung, Azor je'e xiøhajty. ¹⁴Ja'a Azor yhuung, Sadoc je'e xiøhajty. Ja'a Sadoc yhuung, Aquim

je'e xiøhajty. Ja'a Aquim yhuung, Eliud je'e xiøhajty. ¹⁵Ja'a Eliud yhuung, Eleazar je'e xiøhajty. Ja'a Eleazar yhuung, Matán je'e xiøhajty. Ja'a Matán yhuung, Jacob je'e xiøhajty. ¹⁶Ja'a Jacob yhuung, José je'e xiøhajty. Coo ja'a María yhuung hánajty tøø myiñ tøø quia'ay, ja'a Jesúshajpä, mänitá José ja'a María wyiingpøjcy. Ja'a Jesús, Cristo je'e xiøhajty; paady yaa quiejxä hädaa yaabä naaxwiin maa højtscøxpän.

¹⁷Námajmacts ja'a Jesús ja'a yhap ja'a tieedy hánajty miøødä, møødä Abraham møødä David. Y jaac námajmacts ja'a yhap ja'a tieedy hánajty miøødä, møødä Salomón møødä Jeconías. Mänitá judíoshajxy yajnøcxä Babilonia-naaxooty. Y jaac námajmacts ja'a Jesús ja'a yhap ja'a tieedy hánajty miøødä, møødä Salatiel møødä José. Mänitá Cristo myiñguiahy.

¹⁸Yaa jaduhñ myiñ cujaay nebiä Jesucristo myiñguiahyän. Ja'a Jesucristo tiaj, María hánajty je'e xiøhaty. Tøø hánajty tiødiägø'y coo ja'a Maríahajxy hánajty piøga'añ møødä José. Pero cajnä hajxy hánajty piøcyñä, mänitá María quiähxø'cy coo hánajty yhuungmøødä. Ja'a Dioshespírituhaam hánajty tøø yhuungpaady. ¹⁹Jaduhñ ja'a judíoshajxy hánajty quihdujthaty, coo ja'a to'oxiøjc yhuungpáadät jabiøcy, mänit jaduhñ yhøxmájtšänät. Pero miøød ja'a José hojiot hánajty; cabä María hánajty ñäxø'øwø'øwa'añ. Mänitá José wyiinmahñdyhajty coo ja'a María yhøxmádsät hamee'ch, nebiä María jaduhñ quia'a yajtsähdiúnät.

²⁰Yhuuc wiinmahñdyhajpy ja'a José hánajty, mänit miaaho'cy. Mänitá Diosmoonsä wyiinhijxy cuma'ayhaam. Tsajpootyp hánajty chooñ. Mänitá José ñämaayyá: —José, David miičh hijty mhaphajpy mdeedyhajpy. Ca'a mdajy ca'a mmay. Hoy jaduhñ coo ja'a María mwiingpøgät. Dioshespírituhaam jaduhñ tøø yhuungpaady. ²¹Ya'ayhäna'c jaduhñ yhuunghadaamby, ja'a Jesúshajpä. Coo ja'a quiu'ug ja'a piojpä quiädieey yajnähwa'adsaanä, paady jaduhñ xiøhata'añ Jesús.

²²⁻²⁵Coo ja'a José mia'abiädø'cy, mänit quiudiuuñ neby hánajty tøø ñäma'ayíjäm ja'a Diosmóonsäm. Mänitá María wyiingpøjcy. Pero cab hajxy ñimiøødmaawä høxtä coonä ja'a María ja'a Jesús yajmiññä. Ja'a coobhuung, je'eds jaduhñ miingahw. Jesús jaduhñ xiøhajty. Coo ja'a Jesús jaduhñ myiñguiahy, tøjiajt ja'a Diosmädia'agy jaduhñ nebiä Diosmädia'agy-yajwa'xpähajxy jecy quiujahyyän:

Huungpaadaamb ja'a cäxyiihäna'c tu'ug.

Ya'ayhäna'c yhuunghadaamby.

Jue'e xiøhata'añ, Emanuel.

Je'eduhñ ñänøømby coo ja'a Dios hajxy xmiøødhájtäm.

2 Ja'a Jesús, jim jaduhñ myiñguiahy maa ja'a cajpt jaduhñ xiøhatiän Belén, jim Judeanaaxooty. Ja'a Herodes, je'e hánajty tuumb gobiernä. Jim je'e hánajty chäna'ay maa ja'a møjcajptän Jerusalén. Mänitá jäya'ayhajxy jim näje'e miejch maa ja'a Heródesän. Jäguem hajxy

hänajty tøø chooñ maa ja'a xøø piädsømiän. Madsa'ahøxtaabiä hajxy hänajty wiädity. ²Mänit hajxy yajtøøyy:

—Maa ja'a judfos guiobiernähajxy, ja'a tøø myiñ tøø quiá'ayäbä.

Jäguem højts ja'a miadsa'a tøø nnäheebøøyyä, jim maa ja'a xøø piädsømiän. Paady højts yaa tøø nmiñ tøø nmech neby højts jaduhñ nwiingudsähgø'owät.

³Coo ja'a gobiernä Herodes jaduhñ miädoyhajty møødä Jerusalénpä-jäya'ayhajxy nägøxiä, mänit hajxy tiägøøyy tajpä maabiä.

⁴Mänitä Herodes miøjyaaxy ja'a teedywiindsøn'hajxy møødä ley-yajnahixøøbiähajxy. Mänitä Herodes yajtøøyy:

—Maa ja'a Cristo myina'añ quia'awa'añ, ja'a Dios quixaambiä.

⁵Mänit hajxy yhadsooyy:

—Beléncajptøotiäc jaduhñ myina'añ quia'awa'añ yaa Judeanaaxooty. Ja'a Diosmädia'agy-yajwa'xpä jecy cujahy nebiä Dios miänaañän:

⁶Ja'a cajpt jaduhñ xøhajpä Belén, jim Judeanaaxooty, jimä wiindsøn tu'ug myina'añ quia'awa'añ; je'eçh ja'a ngu'ug xyhane'emáañäp, ja'a judiøshajxy; paadiä Beléncajpt jaduhñ yajmäbaada'añii nebiä møjcajptän.

⁷Mänitä Herodes miøjyaaxy hamee'ch ja'a madsa'ahøxtaabiähajxy. Mänitä Herodes yajtøøyy:

—Mäduhnajtä ja'a madsa'a quiahxø'tsohñ.

⁸Coo ja'a Herodes tøyhajt miooyyä, mänitä miänáangumbä:

—Nøcx ja'a pigäna'c hajxy jim yajtøw Belén. Naxy hajxy hoy mdehm yajtøwät. Coo mbáadät, mänitøch hajxy min xyhawaanä, nébiøch jim nøcxy nwiingudsähgøøbiä.

⁹⁻¹⁰Mänitä madsa'ahøxtaabiähajxy

tiu'ubøjcy. Jim hajxy nøcxy Belén nebiä Herodes hänajty tøø miäna'añän. Mänitä madsa'a hajxy jadähooc yhjxcumbä, ja'a hajxy hänajty tøø yhuug hijxpä jäguem maa ja'a xøø piädsømiän. Mänit hajxy jiaançh tehñ xioonndaacy. Mänitä madsa'a hajxy piadu'ubøjcy. Mänitä madsa'a jim tøyyä tiänaaxiøjpy maa ja'a pigäna'c-huung hänajty yhitiän naaxyp. Tøyyä ja'a madsa'a hänajty quihajjaxy maa hänajty quio'na'ayän.

¹¹Mänitä madsa'ahøxtaabiähajxy tiøjtägøøyy. Jimä regalo hajxy hänajty miøødä caajäjooty. Mänitä pigäna'c-huung hajxy yhjy møødä tiaj María. Mänitä pigäna'c hajxy wyiinjjicädaacy; wyiingudsähgøøyy hajxy jaduhñ. Mänitä quiaajä hajxy yaghawaach. Mänitä oro hajxy yajpädsøomy møødä poom møødä mirraperfume. Pa'agxuu'p je'le; tsow nøcxy. Mänitä pigäna'c hajxy jaduhñ ñä'a mooyy. ¹²Mänit hajxy wyiimbijnä. Mänit hajxy nøcxy maa ja'a quiajpthajxiän. Wiingtuum hajxy nøcxøøñä; cab hajxy jim ñaxøøñä maa ja'a Heródesän. Hix, tøø hajxy hänajty yhawáañäxä cuma'ayhaam coo hajxy jim quia'a naxøøñät.

¹³Coo ja'a madsa'ahøxtaabiähajxy hänäjty tøø wyiimbijnä, mänitä José ja'a Diosmoonsä tu'ug wyiinhijxy cuma'ayhaam, ja'a tsajpootypä. Mänitä José ñämaayyä:

—José, pädø'øg. Nøcx hajxy jim Egiptonaaxooty møødä mhuung møødä mdo'oxy. Jim hajxy mmähmø'owät høxtä coonä nhawáañämät coo hajxy mwiiimbídät. Paady hajxy mbäyø'øgät neby yø'ø mhuung xquia'a yaghó'cät. Ja'a Herodes, xyhøxta'awáañäp yø'ø mhuung jaduñ; xyajyagho'ogáañäp jaduñ.

¹⁴Mänitä José piädø'cy. Mänitä Joséhajxy jim jiaančh nøcxy Egipto møødä yhuung møødä tio'oxy. Mänitcoods hajxy tiehm tiu'ubøjcy. ¹⁵Jim hajxy hänäjty miähmø'owa'añ Egipto. Høxtä ja'a Herodes hó'ogäp, mänit hajxy hänäjty wyiimbijtagatsa'añ. Jequiän ja'a Diosmädia'agy-yajwa'xpä hänäjty tu'ug tøø quiujaay nebiä Dios miänaañän: “Nhøxyaaxpädsomáambiøch ja'a nhuung jiiiby Egiptonaaxooty.” Y coo ja'a Joséhajxy jim jiaančh nøcxy Egipto, tøjiajt ja'a Diosmädia'agy jaduñ.

¹⁶Coo ja'a Herodes ñajuøøyy coo hänäjty tøø wyiinhøøñii ja'a madsa'ahøxtaabiädøjc, mänitä Herodes jiootma'ty. Mänitä Herodes ja'a pigäna'c jajyagho'cä nägøxiä, pønjata ja'a mejtsjumøjtpä hänäjty ca'a yaghabejpnä, ja'a hajxy hänäjty tsänaabiä Belén møødä Belén mäwiingón. Hix, tøø hänäjty mejtsjumøjt yhiñä coo ja'a madsa'a quiahxø'tsoñ,

ja'a madsa'ahøxtaabiädøjc-hajxy hänäjty tøø yhíxiäbä. ¹⁷⁻¹⁸Jaduñ ja'a Diosmädia'agy tiøjiajcumbä nebiä Jeremías hänäjty jecy tøø quiujaayän:

Jim maa xiøhatiän Ramá, jimä Raquel ja'a yhuung ñäjøøyy ñaxuu'ch.

Coo ja'a yhuung yaghó'cäxä, paady quia'a jootcapxmøcpøgaanä.

Ja'a Jeremías, je'e ja'a Diosmädia'agy jecy jajwa'x.

¹⁹Coo ja'a Herodes yho'nä, jimnä ja'a Joséhajxy hänäjty Egiptonaaxooty. Mänitä José ja'a Diosmoonsä tu'ug wyiinhijxcumbä cuma'ayhaam, ja'a tsajpootypä. Mänitä José ñämaayyä:

²⁰—Pädø'øg, wiimbit hajxy møødä mhuung møødä mdo'oxy. Nøcx hajxy Israelnaaxooty. Tøø jäya'ayhajxy yho'nä, ja'a mhuung hajxy hijty xyagho'ogáañäbä.

²¹Mänitä Joséhajxy piädø'cy møødä yhuung møødä tio'oxy. Mänit hajxy jim jiaančh nøcxy Israelnaaxooty. ²²Mänitä José miädoyhajty coo Arquelao hänäjty guobiernähajnä jim Judeanaaxooty maa ja'a tieedy Herodes hänäjty tøø guobiernähatiän. Mänitä José chähgøøyy. Cab hänäjty jim ñøcxaannä Judeanaaxooty. Wiingtuum hajxy ñøcxy Galileanaaxooty, nebiä José hänäjty tøø yhawáañäxän cuma'ayhaam. ²³Coo hajxy jim miejch Galileanaaxooty, mänit hajxy jim chänaadiaacpøjcy maa ja'a cajpt xiøhatiän Nazaret. Coo hajxy jim chänaadiaacpøjcy, tøjiajt ja'a Diosmädia'agy jaduñ

maa jaduḥṇ myiñān cujaay coo ja'a Jesús hānajt̃y ñāma'awa'añii coo jim̃ chooñ Nazaret. Ja'a Diosmādia'agy-yajwa'xpāhajxy jaduḥṇ jecy cujahy.

3 Cujecy ja'a Juan ja'a māyajnābejpā jim̃ miejch Judeanaaxooty pactuum. Ja'a Diosmādia'agy hānajt̃y yajwa'xyp. ²Mānitā Juan tiägøøyy mādiaacpā. Mānit miānaañ:

—Najtshixø'ow ja'a mhaxøøgcuhdujt hajxy; habaadāannāp jaduḥṇ coo ja'a Dios ja'a miājaa yajcāhxø'oga'añ.

³Ja'a Isafās, ja'a Diosmādia'agy jecy yajwá'xābā, je'e hānajt̃y jaduḥṇ jecy tøø quiujaay:

Jimā jāya'ay tu'ug yaaxwādity pactuum:

“Najtshixø'ow ja'a mhaxøøgcuhdujt hajxy, nebiā mwiindsōñ hajxy hoy mjøbhíxät;

hoy hajxy jaduḥṇ mwiingudsähgø'owät.”

Ja'a Juan jaduḥṇ nānøømā.

⁴Ja'a Juan, camellopøjt hānajt̃y wyithajpy; wajhac hānajt̃y wiøønhajpy. Chu'chp mu'u hānajt̃y je'e; yhuucypy cunaaxmøjt̃siinnøø hānajt̃y. ⁵Majiāya'ay ja'a Juan hānajt̃y ñāmečhii. Jerusalén hajxy hānajt̃y naje'e chooñ. Naje'e hajxy hānajt̃y chohmbā Judeanaaxooty møødā Jordānmøjnøøbaha. Yhamādoowhidāanāp ja'a Juan miādia'agy hajxy hānajt̃y. ⁶Mānitā piojpā quiādieey hajxy ñāgapxy. Mānitā hajxy jim̃ yajnābejtā ja'a Juāngām maa ja'a Jordānmøjnøøjān.

⁷Mānitā Juan yhijxy coo hānajt̃y ñāmečhii ja'a fariseoshajxy nāmay

møødā saduceoshajxy. Ja wi'i ñābetaamb hajxy hānajt̃y je'ebā. Ja'a fariseoshajxy, hoy hajxy hānajt̃y jiaanč tehṇ quiudiuñ ja'a Moisés miādia'agy. Ja'a saduceoshajxy, wiingā cuhdujt hajxy hānajt̃y miøødā; cab hajxy hānajt̃y miāna'añ coo hajxy jiuypipøjtāgatsa'añ. Mānitā Juan miānaañ:

—Hay, møjcu'u, caj mijts hoguiuhdujt mnā'ägädā møødā. Paady hajxy mja wi'i ñābetaambā nebiā Dios hajxy jaduḥṇ xquia'a yajcumādōwät, túhmäts. ⁸Hoy hajxy mwādítāt neby hajxy jaduḥṇ myajcāhxø'ogät coo ja'a mhaxøøgcuhdujt hajxy hānajt̃y tøø mjaanč najtshixø'oy. ⁹Cab hajxy jaduḥṇ mmānā'anāt: “Abrahámhøch hijty nhaphajpy ndeedyhajpy, páadyhøch ja'a Dios jaduḥṇ xquia'a yajcumādowa'añ.” Mānitā Dios jaduḥṇ xyajñāhwá'adsät coo ja'a mhaxøøgcuhdujt hajxy mnajtshixø'owät, ca'a jie'eguiøxpā coo ja'a Abraham hajxy hijty mhaphaty mdeedyhaty. ¹⁰Pøñ hoy ca'a wädiyp, jaduḥṇ māvīnāts je'e nebiā quepychaajān, ja'a ca'a tøømhapjā. Piuxaamby hajxy je'e; mānit hajxy ño'oga'añ. Paady hajxy hoy mwādítāt nebiā Dios hajxy jaduḥṇ xquia'a yajcumādōwät.

¹¹Tøyhajt mijts nyajñābety nøøhaam neby hajxy jaduḥṇ myajcāhxø'ogät coo ja'a mhaxøøgcuhdujt hajxy tøø mnajtshixø'oy. Pero xii jāya'ay tu'ug jiaac miñ høxhaam; je'eds mājōjnābā ja'a Dioshespíritu hajxy xmio'owaamb. Xyajñāhwa'ads xyajcuhwa'adsaamb hajxy jaduḥṇ. Maas mōcā cuhdujt je'e miøødā

quejeech hoočh. Cábøch cuhdujt nná'ägä mөөdä ni weentiä maa jaaya'aguiøxpän. ¹²Ja'a jäya'ayhajxy, coo ja'a trigo hajxy hänäjty tөө tiexy, tøgooty hajxy nõcxy piäda'agy. Pero ja'a trigohac, naaxwiin je'e quia'ay. Jaduhñ mäwiinäts jäya'ayhajxy quia'awa'añ haxøøgtuum, ja'a yhaxøøgcuhdujt hajxy ca'a najtshixø'owaambä. Cøjxta'axiøø hajxy jiiby chaačhpøga'añ.

¹³Mäniä Jesús miejch maa ja'a Juan hänäjty miäyajnabetiän jim maa ja'a Jordánmøjnøöjän. Galilea ja'a Jesús hänäjty tөө chooñ. Näbetaamb hänäjty je'ebä.

¹⁴Mäniä Juan ja'a Jesús nämaayy: —Cab jaduñ yhahixø'øy coočh miich nyajnábétät; maas hoy hijty jaduñ coočh miich cu xyajnábejty.

¹⁵Mäniä Jesús miänaañ: —Hoočh yajnábéjtäc neby jaduñ ngudiúunämät nebiaty ja'a Dios xyhanéhäm.

Mäniä Juan jaduñ miänaañ: —Ween nyajnábétät.

¹⁶Mäniä Jesús näbejty. Mäniä je'e tiø'ødspädsøømy. Mäniä tsajt yhawaach. Mäniä Jesús ja'a Dioshespíritu yhiyxy coo hänäjty miänacy nebiä palomän, coo hoy yhänaaguiäda'agy ja'a Jesús quiuhduum. ¹⁷Mäniä Dios jim quiapxy tsajpootyp:

—Hoočh nHuung yøø. Njaanč tehñ chójpiøch jaduñ. Jaanč tehñ jiootcújc-høch nniijiäwø'øyii ja'a nHuungcøxpøch.

4 Mäniä Dioshespíritu ja'a Jesús wioonøcxy pactuum. Jimä Jesús hänäjty jia wi'i näma'awa'añii ja'a møjcu'ugóngäm coo haxøøg jiatcø'owät.

²Juxychägui'xxøø ja'a Jesús hänäjty jim tөө yhity jaguiay. Ni xøøm ni coods hänäjty tөө quia'a cay. Mäniä yäho'pøjä. ³Mäniä Jesús nämejtsä ja'a møjcu'ugóngäm. Ja wi'i yagjatcø'owáanäp ja'a Jesús hänäjty haxøøg. Mäniä møjcu'ugong miänaañ:

—Pø miich ja'a Dios tøyhajt xyHuunghajp, näma'aw yøø tsaacoo ween chajcaagyquiojy.

⁴Mäniä Jesús yhadsooyy: —Jaduñ ja'a Diosmädia'agy miäna'añ: “Ca'a quiaaguiähajtiä ja'a jäya'ayhajxy miädsänaaby hädaa yaabä naaxwiin; mөөdä Diosmädia'agy hajxy miädsäna'ay.”

⁵Mäniä møjcu'ugong ja'a Jesús wioonøcxy jim Jerusalén. Ja'a Dioscajpt je'e jim. Mäniä Jesús miøødwimbejtä ja'a møjtsajtøjcuhduum. ⁶Mäniä nämaayyä:

—Pø miich ja'a Dios tøyhajt xyHuunghajp, cuhdøpxnax jii. Caj miich nej mjädät. Jaduhñ ja'a Diosmädia'agy miäna'añ:

Ja'a Dios ja'a mioonsä hane'emaamb, ja'a hajxy jim tsajpootypä coo miich xcwieendähädät.

Xchehñhidaamb miich hajxy nej miich tsaajooty jaduñ mga'a cuhnébät.

⁷Mäniä Jesús yhadsooyy: —Pero nõm ja'a Diosmädia'agy miänaambä: “Cabä Dios ja'a mWiindsøn mjøjcaxø'owät.”

⁸Mäniä møjcu'ugong ja'a Jesús wioonøcxcumbä maa ja'a tunän, ja'a jaanč tehñ quiøxpä. Mäniä Jesús yajnähixøøyyä ja'a naax ja'a cajpt cøxiä hädaa yaabä naaxwiin,

coo ja'a jäya'ayhajxy miøjjä
jiaančhä. ⁹Mänitä Jesús ñämaayyá:

—Høøch nje'e yøøduhñ cøxiä
mäduhñtiä jii quiähxø'øgy. Coočh
miičh jijnä'a xwyiingudsähgø'øwät,
mänitäts yøø ngøxy mó'owät.

¹⁰Mänitä Jesús yhadsooyy:

—Jäwa'ads miičh jim, møjcu'u.

Jaduhñ ja'a Diosmädia'agy
miäna'añ: “Dios hajxy
mwiingudsähgø'øwäp, ja'a hajxy
mWiindsønñhajpiä. Cab jaduhñ
wiingpä mwiingudsähgø'øwät.”

¹¹Mänitä møjcu'ugong
wyiimbijnä; nidiuhñ ja'a Jesús
miähmøyy. Mänitä Jesús
ñägädaacä ja'a Dios miöonsäm ja'a
tsajpootypä. Mänit je'e piuhbejtä.

¹²Coo ja'a Jesús miädoyhajty
coo ja'a Juan hänajty tøø chumyii,
mänit jim ñøcxy Galileanaaxooty.

¹³Mänitä Jesús jim ñaxøyy
maa ja'a Nazaretcajptän, pero
cab jim miähmøyy. Mänit jim
chänaadiaacpøjcy maa ja'a cajpt
jaduhñ xiøhatiän Capernaum. Jímäts
je'e Galileamejypia'a maa ja'a
Zabulón yhap yhoc-hajxy chäna'ayän.
Jimä Neftalí ja'a yhap yhoc-hajxy
chänaabiä. ¹⁴Coo Ja'a Jesús jim
chänaadiaacpøjcy Capernaum, tøjiajt
ja'a Diosmädia'agy jaduhñ nebiä
Isaías hänajty jecy tøø quiujaayän,
ja'a Diosmädia'agy jecy jajwä'xäbä:

¹⁵Ja'a naax maa ja'a Zabulón yhap
yhoc-hajxy chäna'ayän, maa
ja'a Neftalí yhap yhoc-hajxy
chänaabiän,
jimä tu'u ñaxø'øy mejypia'a,
jim Galilea, jim maa ja'a ca'a
judíoshajxy chäna'ayän.

¹⁶Ja'a jäya'ayhajxy hijty
haxøøgwädijpä, tøø ja'a

piojpä quiädieey hajxy
yajnähwäatsäxä.

Ja'a jäya'ayhajxy hijty
hagoodstuum ca'awaambä,
nøcxaamb hajxy je'e jim
tsajpootyp,

coo ja'a piojpä quiädieey hajxy
tøø yajnähwäatsäxäbä.

¹⁷Mänitä Jesús tiägøyy

yajwiingapxøøbiä ja'a
Diosmädia'agy. Mänit miänaañ:

—Najtshixø'ow ja'a
mhaxøøgcuhdujt hajxy.
Habaadäännäp jaduhñ coo ja'a Dios
ja'a miäjaa jajcähxø'øga'añ.

¹⁸Jimä Jesús hänajty
miejypia'ayo'oy maa ja'a
Galileamejjiän. Mänitä jäya'ay
metsc yhiixy, ja'a Simón, ja'a
xøhajpä Pedro, møødä piuhya'ay
Andrés. Hacxmats hajxy hänajty
tiuunghajpy. Jimä yhacxjohmd
hajxy hänajty miehpyiäda'aga'añ.

¹⁹Mänitä Simónhajxy ñämaayyä
ja'a Jesúsäm:

—Jam hajxy wädjítäm. Jue'e
mijts mduunghajpy, hacxmats;
wiingtuunng mijts nmo'owaamby.
Nyajnähixø'owaamby mijts nebiä
jäya'ay hajxy myajwiingapxø'owät
ja'a Diosmädia'agy.

²⁰Tuunä je'eduhñ ñä'ä mänaañ,
mäntiä ja'a yhacxjohmd hajxy
ñajtswidsoøyy; mänit ja'a Jesús
hajxy piadu'ubøjcy.

²¹Mänitä Jesús jiaag hädaacy
mejypia'a. Mänitä Zebedeo yhiixy
møødä yhuunghajxy, ja'a Jacobo
møødä Juan. Jiiby hajxy hänajty
yhäna'ay barcojooty. Yhacxjohmd
hajxy hänajty yhaxodsøøby. Mänitä
Jesús ja'a Jacobo miøjyaaxy møødä
Juan. ²²Tuunä hajxy jaduhñ ñä'ä

mädooyy, mäniitä hajxy piädsøømy barcojooty; mäniit ja'a Jesús hajxy piadu'ubøjcy; yajmähmøoyy ja'a tieedy hajxy jiiby barcojooty.

²³Mäniitä Jesús tiägøoyy wädiipä cajpt-cajpt jim Galilea. Mädia'agy-yajwa'xpä jaduhñ wiädiity coo ja'a Dios ja'a miäjaa yajcähxø'øga'añ. Homiädyii cajptä hänajty ñøcxy, jiiby hänajty yajnähiixø'øy maa ja'a judíos chajtøjc-hajxiän. May ja'a jäya'ay yajmøcpøjcy. Homiädyii pa'amä jaduhñ yajnajxy.

²⁴Mäniitä mädia'agy jaduhñ wiädiity ja'a Jesúscøxpä jim maa jaduhñ xiøhatiän Siria. Mäniitä pa'amjäya'ayhajxy yajmejtsä maa ja'a Jesúsän, põnjaty ja'a mõjcu'u møød, møød põnjaty ja'a pojpa'am møød. Mäniitä Jesús ja'a pa'amjäya'ay quiøxy yajmøcpøjcy. ²⁵Mäniitä Jesús piadu'ubøjcä ja'a majiäya'ay. Jim Galilea hajxy hänajty näje'e chooñ. Näje'e hajxy hänajty chooñ maa ja'a majc-hagajptän, näje'e Jerusalén, møødä Judea møødä Jordánmøjnøø'awiimb.

5 Coo ja'a Jesús ja'a majiäya'ay yhiixy, mäniit ñøcxy tunguhduum. Mäniit yhöxtaacy naaxwiin. Mäniit nämejtsä ja'a jiamiøødhajxy. ²Mäniit tiägøoyy yajnähiixøøbiä. Mäniit miänaañ:

³—Jootcuyc hajxy jaduhñ yhida'añ põnjaty jaduhñ yajpejxp. Paady hajxy jootcuyc yhida'añ, coo hajxy jim ñøcxa'añ maa ja'a Diosän.

⁴Jootcuyc hajxy jaduhñ yhida'añ põnjaty jootmayhajp. Paady hajxy jootcuyc yhida'añ, coo ja'a Dios hajxy quiapxmøcpøga'añiijäm.

⁵Jootcuyc hajxy jaduhñ yhida'añ põnjaty mee'xxieemy hidaamb. Paady hajxy jootcuyc yhida'añ, coo ja'a Dios hajxy mio'owa'añiijäm nebiaty ja'a Dios tøø yajwiinwaanø'øy.

⁶Jootcuyc hajxy jaduhñ yhida'añ põnjaty ja'a joot tsojp coo hajxy hoy quiudiünät. Puhbedäänäp hajxy jaduhñ Diósäm.

⁷Jootcuyc hajxy jaduhñ yhida'añ põnjaty hojioot møød. Paady hajxy jootcuyc yhida'añ, coo ja'a Dios hajxy näxuudsaañiijäm.

⁸Jootcuyc hajxy jaduhñ yhida'añ põnjaty haxøøgwiiimahñdy ca'a møød. Paady hajxy jootcuyc yhida'añ, coo ja'a Dios hajxy yhixa'añ.

⁹Jootcuyc hajxy jaduhñ yhida'añ põnjaty capxcuhgädaacp maa ja'a tsip piädø'øguiän. Paady hajxy jootcuyc yhida'añ, coo ja'a Dios hajxy yhuunghada'añiijäm.

¹⁰Tsaächpøjpp ja'a jäya'ayhajxy näje'e coo hoguiuhdujt hajxy miøødä; pero jootcuyc hajxy jaduhñ yhida'añ. Paady hajxy jootcuyc yhida'añ, coo hajxy jim ñøcxa'añ maa ja'a Diosän.

¹¹Jootcuyc hajxy mhida'añ, hoy ja'a jäya'ayhajxy hänajty xjia nämä'ay haxøøg, hoy ja'a jäya'ayhajxy hänajty xjia tuna'añ haxøøg, hoy ja'a jäya'ayhajxy hänajty xjia nähøøno'øwa'añ hoñejpiä ja'a høøhcøxpä.

¹²Jaanaä jaduhñ hajxy jecy tøø chaächpøjppä, ja'a Diosmädia'agy hajxy jecy yajwá'xäbä. Pero xoonäda'ag hajxy, jootcugø'øw hajxy; jimä hoybä weenbä hajxy mjaanč tehñ piada'añ jim tsajpootyp.

¹³Ja'a caan, coo ja'a tiaamdspä tiägóyyät, cab jaduñ mänaa tiaamdsóõñät. Tøø jaduñ mia'ady. Mänitä jäya'ayhajxy yhøxwøjy, mänit hajxy yajteeñ. Jaduñ mäwíinäts mijts nebiä caanän hädaa yaabä naaxwiin; coo ja'a Diosmädia'agy hajxy mnajtshixø'owät, mmá'adäp hajxy jaduñ.

¹⁴⁻¹⁶Ja'a cajpt, ja'a tunguhdum hijpä, caj mänaa yhiixtägyy. Y coo ja'a cera hajxy ño'ogy, cab hajxy jaduñ ñähjujpety cachpa'c. Caj pues. Jiiby hajxy jaduñ piäda'agy cøxp maa ja'a ceratoyøhñdiän, nebiä jäya'ayhajxy nägøxiä quiudøø'xøjät jiiby tøgooty. Jaduñ mäwíinäts mijts, hoy hajxy mwädítät nebiä jäya'ay hajxy jaduñ xyhíxät coo hajxy hánajty hoy mwädity. Mänitä jäya'ayhajxy wyiingudsähgø'owät ja'a nDeedyhájtäm jim tsajpootyp.

¹⁷Páadyhöch yaa tøø nmiñ tøø nmech hädaa yaabä naaxwiin nébiøch mijts jaduñ nyajnahixø'owät nebiä Diosmädia'agy hajxy hamuumdu'joot mgudiúnät, ja'a Moisés jecy quiujáhyyäbä, ja'a Diosmoonsähajxy yajwá'xäbä, ja'a hajxy hädaa yaabä naaxwiimbä. Cábøchä Diosmädia'agy nyajcuhdägoyya'añ. Cab hajxy jaduñ mmäná'anät cooch nyajcuhdägoyya'añ. ¹⁸Tøyhájhøch mijts nnäma'ay, mäduhñtiä ja'a tsajtwiing miähmø'owa'añ, mäduhñtiä hädaa yaabä naaxwiin miähmø'owa'añ, cabä Diosmädia'agy quiuhdägoyya'añ, ni weeñtiä, ni tu'lí'xytiädä, høxtä

coonä hánajty tøø quiøxy habejnä. ¹⁹Pønjaty ja'a Diosmädia'agy jaduñ cudiuumb, pønjaty ja'a wiinghänac jaduñ yajnahixøøby coo hajxy quiudiúumbät, je'eds hajxy mõj jaanç päda'agáanäp coo ja'a Dios ja'a miäjaa yajcähxø'oga'añ. Pero pønjaty ja'a Diosmädia'agy ni weeñtiä ca'a cudiuumb, pønjaty ja'a wiinghänac yajnahixøøby coo hajxy quia'a cudiuúnät, cab hajxy je'e mõj jaanç piäda'aga'añii coo ja'a Dios ja'a miäjaa yajcähxø'oga'añ. ²⁰Míjtshøch jaduñ nnämaaby, cabä ley-yajnahixøøbiädøjc-hajxy hoy wiädity ni ja'a fariseodøjc-hajxy. Coo mijts maas hoy mwädítät, mänit hajxy jim mnøcxät cøxp maa ja'a Diosän. Pø cab hajxy hoy mwädita'añ, cab hajxy jim mnøcxät.

²¹Tøø hajxy mmädoyhaty nebiä mhäp mdeedyhajxy hijty jecy miäna'añän: "Ca'a hajxy mjäya'ay-yagho'ogy coo ja'a cuduung hajxy xyajcumädówät." ²²Pero høøch mijts nnämaaby, pøn ja'a miäjøøn miädøjc mäjootma'p, je'eds cumädowaamb maa ja'a cuduungän. Pøn ja'a miäjøøn miädøjc nähwaambejp, je'eds cumädowaamb maa ja'a gobiernän. Pøn ja'a miäjøøn miädøjc nämaaby coo je'e quiuhmañø'oy, je'eds jiiby ca'awaamb haxøøgtuum, maa ja'a jøøn mänaa quia'a pi'ichän.

²³Entonces, coo hajxy hánajty tii mänaa myoxa'añ jiiby tsajtøgooty maa ja'a altarän, y coo hajxy mänit mjahmiédsät coo ja'a mmäjøøn mmädøjc hajxy hánajty tøø xmiädsibø'oy hotyiguiøxpä, ²⁴jim hajxy mnajtsconø'owät

altarwiinduum, tijaty hajxy
hänajty myoxaamby. Mänit hajxy
jim mnöcxät maa ja'a mmäjöönän
maa ja'a mmädöjcän, neby hajxy
jaduhñ myajtödiägó'owät. Mänit
hajxy mwiimbídät. Mänit hajxy
mnöcxätägátsät maa ja'a altarän.
Mänit hajxy myóxnät.

²⁵ 'Coo pön hänajty mänaa
xñäxó'owó'owa'añ maa
ja'a cuduungän, jayöjp
myajtödiägó'owät tu'haamnöcxpä.
Coo jim mga'a yajtödiägó'owät
tu'haamnöcxpä, mänit hajxy
xyajmédsät cuduungwiinduum.
Mänit cuduung xyajcö'ödägó'owät
ja'a policíahajxy. Mänit hajxy
xchúmat. ²⁶ Jiiby jaduhñ
mmähmó'owät pujxtögooty. Cab
jaduhñ mdsoj pädsómät. Mänit
jaduhñ mbädsómät coo hänajty
pedyii tøö mniyhöxjuubiädsömyii.
Tøyhajt jaduhñ.

²⁷ 'Tøö hajxy mmädoyhaty
coo jäya'ayhajxy hijty jegyhajty
miäna'añ coo hajxy mga'a
tu'udägöyyät. ²⁸ Pero høøch
mijts jaduhñ nnämaaby, coo pön
wiingto'oxiöjc mänaa yhadsoy,
nä'ägädä tu'udägooby je'eduhñ.

²⁹⁻³⁰ 'Coo tii hoyhadsojnä mhíxät,
cab jim mmøjhée'pnät ni mga'a
nähdónät. Jaduhñ mnibiäda'agó'ojät
nebiä wiindspän nebiä cö'öducpän.
Pø caj, jiiby hajxy mga'awa'añ
haxøøgtuum.

³¹ 'Jaduhñä jäya'ayhajxy hijty
jegyhajty miänaambä: "Coo pön
ja'a tio'oxiöjc mänaa yhöxmádsät,
mänitä hagujpöjnocy quió'otsnät."

³² Pero høøch mijts jaduhñ
nnämaaby, coo pön tio'oxiöjc
mänaa yhöxmádsät, y cabä

tio'oxiöjc hänajty nej tøö jiatcö'öy,
coo ja'a to'oxiöjc wiingya'adiöjc
jiöjpögó'owät, pues tu'udägöyyäp
ja'a to'oxiöjc jaduhñ. Ja'a
ya'adiöjc, ja'a hänajty jawyiin
tøöbä yhöxmáchäbä, je'edsä pojpä
møød. Y ja'a ya'adiöjc tøö jiaac
jöjpögó'öyabä, jaanä tu'udägooby
je'ebä.

³³ 'Jaduhñä jecyjiiäya'ayhajxy
hijty nñama'ayii: "Pø tøö ja'a Dios
hajxy mnäma'ay hamuumdu'joot
coo hajxy hotyijä mgudiuna'añ,
tsipcøxp hajxy jaduhñ
mgudiúnät." ³⁴⁻³⁶ Pero høøch
mijts nnämaaby coo hajxy tii
mga'a yajwiinwaanó'owät nä'ä
nägoobä. Coo hajxy hänajty tii
myajwiinwaanó'owa'añ, cabä
tsajpootypä hajxy mgapxpáadät,
ni ja'a naaxwiimbä, ni ja'a
Jerusalén, ni ja'a mgopc-hajxy.
Hix, paadiä tsajpootypä hajxy
mga'a capxpáadät je'eguiøxpä
coo ja'a Dios jim yhäñ'a'y. Møød
hädaa yaabä naaxwiin hajxy
mga'a capxpáatpät je'eguiøxpä
coo ja'a Dios yajtánaabiety. Møødä
Jerusalén hajxy mga'a capxpáatpät
je'eguiøxpä coo je'e Dyioscajptä.
Møødä mhamdsoo copc hajxy
mga'a capxpáatpät je'eguiøxpä coo
ja'a mguhwaay hajxy hoy mga'a
yajpó'owät, ni hajxy hoy mga'a
yagjiñó'owät. ³⁷ Jaduhyyä hajxy
mmäná'anät pø tøyhajt, pø caj. Coo
hajxy waamb mjaac mäná'anät,
ja'a möjcu'ugong hajxy jaduhñ
xyajmänaamb.

³⁸ 'Tøö hajxy hijty mmädoyhaty
nebiä jäya'ayhajxy hijty jegyhajty
miäna'añ: "Coo pön cøxypänejpiä
xñä'a túnät, myaghawiimbídäp

jaduhñ.”³⁹ Pero hөөч mijts nnämaaby: cab jaduñ myaghawiimbídät; coo pөн xyhala'pó'ogät tu'nax, mjaac yégäp jaduñ ja'a tu'naxpä, ween xjiaac hala'pó'ogy.⁴⁰ Coo pөн mänaa xñäx'owó'owät, coo ja'a mgamiixy hänäjty xpíogaanä, myégäp jaduñ mөөдä mnähgäjén.⁴¹ Coo pөн hänäjty tii xyajtsömnöcx'aañ tu'kilómetro hadsip, mejtskilómetro mnä'ägä tsömnöcxät.⁴² Coo pөн hänäjty tii xmiäyujwa'anaañ, mmó'owäp jaduñ. Tsipcөxp jaduñ hotyijä mmó'owät.

⁴³Tөө hajxy hijty mmädoyhajpä nebiä jäya'ayhajxy hijty jegyhajty miänaambä: “Hoy ja'a mmägu'ughajpä mdsoc mba'häyöwät; pero ja'a mmädsip, mmähänhädäp je'e.”⁴⁴ Pero hөөч mijts nnämaaby: ca'a mmähänhaty pөнjaty jaduñ xmiädsiphajp. Hoy hajxy mnänómät pөнjaty haxөөг xñänөөmb. Mnäxúudsäp hajxy pөнjaty xmiähänhajp. Mänuu'xta'ag ja'a Dios hajxy coo ween mio'oy ja'a hoyhajt ja'a weenhajt pөнjaty xwyiinwohmб xyhawohmб, pөнjaty xyhäyoowhijxp.⁴⁵ Jaduhñä Dios hajxy hoy xyhuunghädät, ja'a jim hijpä tsajpootyp. Jaayá'ayäts jaduñ yajxөөhaamb maa ja'a jäya'ay hoybän chaads jim maa ja'a jäya'ay ca'awiindöybän. Jaayá'ayäts jaduñ yajtuub maa ja'a jäya'ay hoybän chaads jim maa ja'a jäya'ay ca'awiindöybän.⁴⁶ Cab hajxy tii mbädät nä'a tэгө'өbä coo ja'a mmägu'ughajpähajtjä mmөөдnijootpaadööjät. Hөxtä ja'a jajnäjhjuudiutpädöjc-hajxy ničojc nibia'häyöowäp. Pero

coo ja'a mmädsip hajxy mmée'xät, mänitä Dios hajxy xyhuunghädät.⁴⁷ Cab jaduñ nejpiä coo ja'a mmägu'ughajpä hajxy mmөөдnijootpaadyii. Hopiөнä nijootpaadyii, hoy ja'a Diosmädia'agy hajxy quia'ja mäböcy. Pero coo ja'a mmädsip hajxy mmée'xät, hoy hajxy mgudiuñ.⁴⁸ Ja'a nDeedyhájtäm, ja'a jim tsajpootypä, jaanch tehñ nä'ägä hoy je'eduhñ yhyty. Hoy hajxy jaduñ mbahíxpät.

6 'Näje'e ja'a jäya'ayhajxy jia wi'i yajcumaya'añ, paady hajxy jaduñ nibiäda'agyii nebiä hojiäya'ayän. Pero cab jaduñ yhooyä coo hajxy jaduñ yajcumáyät. Cab hajxy jaduñ mbahix mbadúnät. Coo hajxy jaduñ mbahix mbadúnät, cabä Dios hajxy xyhuunghädät, ja'a jim tsajpootypä.² Jii jäya'ayhajxy näje'ebä, coo ja'a häyoobäya'ay ja'a xäd'өөñ hajxy hänäjty төө mio'oy, mänit hajxy tiäg'өy mädiaacpä jiiby tsajtөгooty mөөд jim tu'haam. Paady hajxy jaduñ miädia'agy, yajcumayaamb hajxy jaduñ maa ja'a cu'ugän. Pero cabä Dios hajxy jaduñ quiuamayíjäm, je'leguioxpä coo hajxy hänäjty jim төө yajcumay maa ja'a cu'ugän.³ Pero mijts, coo ja'a häyoobäya'ay xäd'өөñ hajxy hänäjty төө mmo'oy, cab hajxy waamb mmäná'anät. Ni pөн hajxy mga'a hawáanät, ni ja'a mmägu'ughajpähajxy.⁴ Hamee'ch ja'a xäd'өөñ hajxy jaduñ myégät. Dios hajxy jaduñ xyhíxäp; mänit hajxy jaduñ xyhuunghädät.⁵⁻⁶ Jii jäya'ayhajxy näje'ebä, tänä'a ja'a Dios hajxy naxy

pia'ya'axy jii by tsajtøgooty møød jim maa ja'a tu'uxeñän. Pero cabä Dios hajxy tu'joot pia'ya'axy. Nä'ä yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumaya'añijäm. Tøyhajt jaduhñ. Pero mijts, hamee'ch ja'a Dios hajxy mba'yá'axät. Xyhíxäp xmiädówäp hajxy je'eduhñ; mänit hajxy xyhuunghádät.

⁷⁻⁸Ja'a jäya'ay ja'a Diosmädia'agy hajxy ca'a mäbøjpä, cab hajxy ñajuø'øy waambaty ja'a Dios hajxy jia pa'ya'axy. Ja capxp hajxy jaduhñ ja naañ ja tsojc. Paady hajxy jaduhñ jia capxy cooc tyijy ja'a Dios hajxy jaduhñ miädowa'añijäm. Pero mijts, cab hajxy jaduhñ mbahix mbadúnät. Hix, jäguemiä ja'a Dios ñajuø'øy tijaty hajxy hänäjty myajmaajajpy.

⁹Jaduhñä Dios hajxy mba'yá'axät:

Teedy, jim miich mdsäna'ay tsajpootyp;
ween miich ja'a cu'ughajxy xwyiingudsähgø'øy.

¹⁰Ween ja'a mmäjaa min yaa myajcähxø'ogy hädaa yaabä naaxwiin.

Ween ja'a jäya'ay ja'a mmädia'agy hajxy yaa xquiudiuunä hädaa yaabä naaxwiin,
neby jim xquiudiuunän tsajpootyp.

¹¹Højts ja'a caayyøøc huucøøc móoyyác jabom-jabom.

¹²Højts ja'a nbojpä ngädieey méé'xác neby højts tøø nmämee'xiän ja'a højts tøø xñägädieeyø'øyäbä.

¹³Ca'a højts xyajcädieey; pero pädaacác højts hodiium neby højts jaduhñ nga'a cädieeyät.

Miich hanehmb; miich ja'a mäjaa mmøød; miich møj jaançh homiänaajä. Amén.

¹⁴'Coo mijts jaduhñ mmämée'xät ja'a hajxy tøø xñägädieeyø'øyäbä, mänitä Dios hajxy jaduhñ xmiée'xpät, ja'a nDeedyhajtäm ja'a jim tsänaabiä tsajpootyp. ¹⁵Pero coo wiinghäna'c hajxy jaduhñ mga'a mämée'xät, cabä Dios ja'a mbojpä mgädieey hajxy jaduhñ xmiée'xät.

¹⁶Jii jäya'ayhajxy näje'e, coo hajxy hänäjty yhayuuhada'añ, jaduhñ hajxy ñibiäda'agyii nebiä jootmayhjäpän. Paady hajxy jaduhñ ñibiäda'agyii, jaduhñ hajxy quiähxø'øga'añ jäya'awyiinduum coo hajxy hänäjty yhayuuhaty. Tøyhajthøch mijts nnäma'ay, cab hajxy jaduhñ tii piaada'añ. ¹⁷Pero mijts, cab hajxy jaduhñ mnibiäda'agøøjät nebiä jootmayhjäpän. Coö hajxy hänäjty mhayuuhada'añ, yajxon hajxy mniyhonøøjät mniwyiimbujøøjät. ¹⁸Jaduhñ hajxy mga'a yajcähxø'øgät maa ja'a cu'ugän pø mhayuuhajp hajxy hänäjty. Hamee'ch ja'a Dios hajxy jaduhñ xyhíxät, ja'a ca'a cähxø'pä. Jaaya'ay hajxy jaduhñ xmio'owaamb ja'a hoyhajt ja'a weenhajt.

¹⁹'Cabä mjoot hajxy yaa mbädá'agät tijaty yaabä naaxwiin. Haagä ma'adaamb jaduhñ cøxiä mäduhñtiä hädaa yaabä naaxwiin. Y jaançh tehñ wiädijp ja'a mee'tspähajxy. ²⁰Pero jaduhñ hajxy mwiinmahñdyhádät neby hajxy hoy mwädítät. Jaduhñ hajxy jootcujc mhídät jim tsajpootyp; caj pøn jim xyagjootmayhádät. ²¹Pøn jaduhñ ja

wi'i miäyøøhadaamb hädaa yaabä naaxwiin, jimä jioot hajxy jaduhñ piäda'agy maa ja'a xädø'øñän. Pero pøn hoy wäditaamb, jimä jioot jaduhñ piäda'agy maa ja'a Diosän.

²²Pø mmøødä howyiinmahñdy hajxy, mänit hajxy hoy mwädítät nebiä Dios choquiän. ²³Pero pø cabä mwiinmahñdyhajxy yhooyä, cab hajxy hoy mwädítät nebiä Dios ja tsoquiän.

²⁴Cabä wiindsøn hoy metsec mmøødtünät. Mxøøghadaamby tu'ug; jatu'ugpä jaduhñ mdsogaamby. Hoy ja'a miädia'agy jaduhñ mgudiunaanä. Jaanä jaduhñduhmbä, coo ja'a mjoot mbädá'agät maa ja'a xädø'øñän, cabä Dios jaduhñ hoy mwiingudsähgø'owät.

²⁵Jaduhñäts mijts nnäma'ay, ca'a hajxy mwi'i tiajy mwi'i miay tijaty hajxy mnäjyghädäp, tii hajxy mwithädäp. Maas tsoobaatp ja'a jugyhajt jaduhñ quejee ja'a cay, y maas tsoobaatp ja'a ni'x jaduhñ quejee ja'a wit. ²⁶Høxtahmñsä muuxyhajxy, cab hajxy ñi'iby tiuñ, cab hajxy tii piäda'agy tsehñjooty. Pero ja'a nDeedyhajtäm ja'a jim tsajpootypä, je'eds jaduhñ yagjøø'xp yajpøjp. Y mmaas tsoobaatp mijts quejee ja'a muuxyhajxy. ²⁷Ni pøn jaduhñ hamdsoo quia'a yajniñjyghadøøjät.

²⁸Cabä wit hajxy mnädaj mnämáyät. Høxtahmñsä pøjy hujts, cab tii tiuñ. ²⁹Pero maas yajxon je'e quejee ja'a rey Salomón hijty; jaançh tehñ yajxon ja'a Salomón hijty jegyhajty ñibiäda'agyii. ³⁰Ja'a pøjy hujts, yajxon ja'a Dios jaduhñ tøø quiunuu'xy. Y häyaa jaboom

hajxy jaduhñ ño'oga'añ. Y mijts, xmiaas cunuu'xaamb mijts ja'a Dios, hoy hajxy mga'a ja mabøcy.

³¹Ca'ads hajxy mdajy mmay; ca'a hajxy mwi'i miäna'añ: "Tii ngäaayyamb, tii nhúucämb, tii mwithajtämb." ³²Yø'øduhmbä hajxy yhøxtaaby ja'a Dios hajxy ca'a wiingudsähgøøbiä. Pero ja'a nDeedyhajtäm jim tsajpootypä, ñajuøøby je'eduhñ coo mijts myajmaajiaty. ³³Mhøxtá'awäp hajxy jayøjp neby hajxy hoy mwädítät, neby hajxy jaduhñ jim mnøcxät maa ja'a Diosän. Jaduhñä Dios chocy. Mänit hajxy jaduhñ cøxiä xmió'owät. ³⁴Ca'a hajxy mwi'i tiajy mwi'i miay ja'a jaboomgøøxpä; ween hamdsoo yhuuc habaady. Mädøyyä ja'a tsaächpä hajxy xpiaada'añ ja'a jäda'agøøxpä.

7 'Cabä wiinghäna'c hajxy mnähójät, coo ja'a Dios hajxy jaduhñ xñä'a yajcumädówät. ²Jaduhñ hajxy xyajcumädówät nej mijts wiinghäna'c hänäjty tøø mnähøjjiän. ³⁻⁴Coo ja'a mmägu'ughajpä weentiä quiädiéeyät, y coo miäch hänäjty maas hanaxiä tøø mgädieey, cab jaduhñ yhawiiinmatsä coo ja'a mmägu'ughajpä waamb mnämä'awät. ⁵Mänitä mmägu'ughajpä jaduhñ hawiiinmats mwiingapx mjøjcaxø'owät, coo miäch hänäjty tøø myajniñähwa'achii.

⁶Cabä jäya'ay hajxy hadsip mnämä'awät coo ja'a Diosmädia'agy hajxy miäböğät. Pø cab hajxy jaduhñ miädowa'añ, ca'a hajxy hadsiçpe mduñ, coo hajxy jaduhñ ñä'a jootmä'adät.

7-8' Coo ja'a Dios hajxy tii mmäyujwá'anät, mänit hajxy jaduhñ xmió'owät; coo hajxy mmänuu'xtá'agät, mänit hajxy jaduhñ xpiuhbédät.

9' Coo ja'a mhuung ja'a tsajcaagy xmiäyujwa'añ, je'eds jaduhñ mmooby, túhmäts. Cabä tsa mmo'oy. 10' Y coo hacx jaduhñ xmiäyujwa'añ, je'eds jaduhñ mmooby, túhmäts. Cabä tsahñdy mmo'oy. 11' Hoorä, je'edsä mhuung hajxy mmooby ja'a hoybä, hoy mijts mja haxøøgjäya'ayä. Pero ja'a nDeedyhajtäm jim tsajpootypä, hojiäya'ay je'e. Xmio'owaamb ja'a hoyhajt hajxy jaduhñ coo hajxy mmäyujwá'anät.

12' Jaduhñäts mijts ja'a jäya'ayhajxy mnäxúu'tspät nej mijts myajnäxuudsaañän. Jaduhñä Moisés jecy miänaañ coo hajxy ngudiúunämät. Jaduhñ hajxy jecy miänaambä, ja'a Diosmädia'agy hajxy jecy yajwá'xäbä.

13-14' Hamäjaa jim mnøxcät Dioswiinduum. Jaduhñ mäwíinäts jim nebiä xu'udstu'ujän; cab hajxy jaduhñ nämay piaady. Pero coo jilby mhädá'agät haxøøgtuum, cab jaduhñ yhamäjaaä. Jaduhñ mäwíinäts je'e nebiä mõjtu'ujän; nämay hajxy jilby yhäda'agy.

15' Mnigwieendähadøøjap hajxy maa ja'a jäya'ayhajxy tyijy Diosquexypän. Nä'a hønñdaacp hajxy jaduhñ. Jaduhñ hajxy ñibiäda'agyyi nebiä mabøjpän, pero cab hajxy tiehm miäbøcy; jaanč tehñ quia'awiindøoy hajxy jaduhñ. 16' Haxøøg hajxy jiatcøøy; jaduhñ hajxy mhøxcábät coo haxøøgwiinmahñdy hajxy miøødä.

Jaduhñ mäwíinäts hajxy je'e nebiä hujts nebiä haptiän. Ja'a wädsats, cab jaduhñ tiøømhaty nebiä tsaatypän. Ja'a hapy, cab jaduhñ tiøømhaty nebiä piidsän.

17-18' Mädyii quepychaa hoy, hoy tiøømhaty; mädyii ca'a hoy, cab hoy tiøømhaty. 19' Mädyii quepychaa jaduhñ hoy ca'a tøømhajp, piuxyp hajxy jaduhñ; mänit hajxy ño'ogy. 20' Ja'a jäya'ayhajxy haxøøg jatcøøbiä, jaduhñ mäwíinäts hajxy je'e nebiä quepychaa hoy ca'a tøømhajpän. Jaduhñ hajxy mhøxcábät coo haxøøgwiinmahñdy hajxy miøødä.

21' Nämáyhøch ja'a jäya'ayhajxy xjia nämä'ay: "Wiindsøn." Pero cab hajxy nägøxiä jim tiägø'owa'añ Dioswiinduum jim tsajpootyp. Pønjátyhøch ja'a nDeedy ja'a miädia'agy xquiudiúunäp, je'eds jim tægø'owaamb. 22' Coo ja'a naaxwiimbä hñajty wyiimbida'añ, mänítøch hajxy nämay xjia nämä'awa'añ: "Wiindsøn, tøø højts ja'a Diosmädia'agy nyajwa'xy ja'a miich mmäjaagøxpä; tøø højts ja'a mõjcu'u ngøxy yajpäyø'ogy ja'a miich mmäjaagøxpä; tøø højts ja'a hoy-yagjuøøñjatypä may nyajcähxø'ogy ja'a miich mmäjaagøxpä." 23' Mänítøch hajxy nnämä'awa'añ: "Cábøch mijts mänaa tøø nhixyhaty. Jua'ads hajxy jim; haxøøg ja'a mwiinmahñdyhajxy jaduhñ."

24' Pønñhøch nmädia'agy xmiädóowäp, coo jaduhñ quiudiúnät nébiøch nhane'emiän, jaduhñ mäwíinäts je'e nebiä jäya'ay ja'a tiøjc tøø quiojjiän tsaawiing. 25' Mänit com tiuuyy.

Mänitä möjnøø quiomgädaacy.
 Mänitä tøjc məc miøjpojpejty. Pero
 cabä tøjc nä'ä jijty, je'leguioxpä
 coo tsaawiing quiojjiä. ²⁶Pero
 põnhøch nmädia'agy tøø xquia'a
 cudiuunä nébiøch nhane'emiän,
 jaduħn mäwíinäts je'e nebiä jäya'ay
 ca'a jajpä. Jiibiä tøjc quiojy
 tsabiu'ujooty. ²⁷Mänit com tiuuyy.
 Mänitä möjnøø quiomgädaacy.
 Mänitä tøjc miøjpojpejty məc.
 Mänit piuumy.

²⁸Mänitä Jesús miädiaacpädøøyy.
 Mänitä jäya'ayhajxy yagjuøøyy
 nebiaty ja'a Jesús hänajty
 tøø yajnähiø'øy. ²⁹Jaduħn
 hänajty yajnähiø'øy nebiä
 möjcuħdujtmøødpän. Ja'a cu'ug
 wyiindsønħajxy, cab hajxy hänajty
 jiaty jaty.

8 Tunguhduum ja'a Jesús
 hänajty tøø yajnähiø'øy.
 Mänit miänajnä. Mänit
 majiäya'ay piadu'ubøjcä. ²Mänit
 pa'amjäya'ay Jesús nämejch.
 Haxøøgpa'am hänajty miøød.
 Mänitä Jesús wyiinijcädaacä,
 wyiingudsähgøøyyä. Mänit
 nämaayyä:

—Wiindsøn, pø chojpy ja'a
 mjoot jaduħn, hóyhøch jaduħn
 xyajnähwä'ads xyajcuħwä'adsät.

³Mänitä Jesús ja'a mähdijc
 nähdoon. Mänit nämaayy:

—Chøjpiøch ja'a njoot jaduħn; tøø
 jaduħn mnähwa'ačh mguhwa'ačh.

Mänitiä ja'a mähdijc jiaančh
 nähwaach jiaančh cuħwaach.

⁴Mänitä Jesús miänaañ:

—Huuc mädown, ca'a pøn
 mnä'ägädä hawaanä. Nøcx
 jim Jerusalén maa ja'a teediän.
 Jim myajcähxø'øgät coo tøø

mnähwa'ačh coo tøø mguhwa'ačh.
 Jimä xädø'øn mguyoxø'øwät nebiä
 Moisés jecy yhanehmiän. Jaduħnä
 hijxtahnd myajcähxø'øgät coo tøø
 mnähwa'ačh coo tøø mguhwa'ačh.

⁵Mänitä Jesús miejch maa ja'a
 cajpt hänajty xiøhatiän Capernaum.
 Coo quiajptägøøyy, mänit ja'a Jesús
 ja'a soldadowiindsøn nämejch.

⁶Mänit Jesús nämaayyä:
 —Jimhøch ja'a nmoonsä tu'ug
 quio'na'ay tøgooty. Tøø ja'a tiecy
 miucy. Hanaxiä jaduħn chaächpøcy
 tehngajnä.

⁷Mänitä Jesús miänaañ:
 —Nøcx nyhuuc yaghoyø'øy.

⁸Mänitä soldadowiindsøn
 yhadsooyy:

—Pero Wiindsøn, cab jaduħn
 yhähiø'øy coo miich jiihy
 mdägø'øwät maačh ndøgootiän,
 je'leguioxpä coo miich mmøjjä
 mjaančhä. Nägooyyä miich jaduħn
 mmäná'anät coočh nmoonsä
 yhöyø'øwät, pues hoyø'øwäp.

⁹Hané'emyhøch nhity; jimhøch
 nwiindsønba, y jimhøch nsoldado.
 Coočhä nsoldado tu'ug nnämä'awät
 coo homiaajä nõcxät, nõcxäp
 jaduħn; y coočh nnämä'awät coo
 myñät, minäp jaduħn. Y coočhä
 nmoonsä waamb nnämä'awät,
 quidiúnäp jaduħn.

¹⁰Mänitä Jesús jiaančh tehñ
 yagjuøøyy. Mänit nämaayy ja'a
 hajxy hänajty pawädiipä:

—Cábøčhä nmägunaaxhajxy
 jaduħn miäböcy neby yø'ø craa
 miäböquiän, y jäguem yø'ø choon.
 Tøyhajt jaduħn. ¹¹Coo ja'a Dios ja'a
 miäjaa hänajty yajcähxø'øga'añ,
 mänit hajxy hänajty nämay
 miedsa'añ, ja'a hajxy hänajty

mäbøjpä. Wiinduhmyhagajpt hajxy hänäjty choona'añ. Mänit hajxy hänäjty miøødhida'añijäm ja'a Abraham møødä Isaac møødä Jacob. ¹²Pero ja'a judiøshajxy ca'a mäbøjpä, cab hajxy hänäjty jim quiooda'añ Dioswiinduum. Jiiby hajxy jaduñ quiuhjuijpnaxa'añii møjcu'uhaam maa yhagoodsän. Jiiby hajxy jaduñ chaaçhpøga'añ tehngajnä.

¹³Mänitä Jesús ja'a soldadowiindsøn ñämaayy:
—Nøcx maa ja'a mdøjcän. Tøø jaduñ mmäböcy, tøø ja'a mmoonsä jaduñ yhojø'øy.

Mänitä ja'a mioonsä jiaançh hoyøøyy.

¹⁴Mänitä Jesús ñøcxy maa ja'a Pedro tiøjcän. Jiibiä Pedro miøødhoc hänäjty quio'na'ay tomiøød. ¹⁵Mänitä Jesús ja'a tajiäya'ay ja'a quiø'ø ñahdoonä. Mänitä tiøy tiøjch. Mänitä tajiäya'ay piädø'cy. Mänitä tiägøøyy mayhajtuumbä ja'a Jesuscøxpä.

¹⁶Coo quioodsøøyy, mänitä pa'amjäya'ayhajxy may yajmejtsä maa ja'a Jesúsän. Tøø hajxy hänäjty näje'e miächii ja'a møjcü'ujäm. Mänitä Jesús quiapxy. Manityä hajxy yhøxmajtsä ja'a møjcü'ujäm. Jaduhnä pa'amjäya'ayhajxy quiøxy yajmøcpøjcä; ja'a Jesús jaduñ yajmøcpøjc. ¹⁷Tøjajt ja'a Diosmädia'agy jaduñ maa jaduñ myiñän cujaay, mänaa ja'a Isaías jecy miäna'añän: “Jaaya'ay ja'a nba'amhåjtäm tøø xyajñhäwåatsäm tøø xyajchuwåatsäm.” Ja'a Isaías, je'eds ja'a Diosmädia'agy jaduñ jecy yajwa'x.

¹⁸Coo ja'a Jesús yhiixy coo hänäjty cuje tøø piäda'agyii ja'a majiäya'ay, mänit miänaañ coo hajxy ñåxät mejyhawiimb møødä jiamioødhajxy. ¹⁹Cajnä hajxy hänäjty tiu'ubøcyñä, mänitä Jesús jäya'ay tu'ug ñämejtsä. Yajñähixøøby hänäjty je'ebä maa ja'a tsajtøjcän. Mänitä Jesús ñämaayyä:

—Wiindsøn, miñ nhuuc jamiøødhaty. Homiaajä mnøcxät, quipxy nbawädítät.

²⁰Mänitä Jesús yhadsooyy:
—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch, ja'a Diosquexypä, cáböch ndøjc maaçh nboø'x nhäñá'awät.

²¹Mänitä Jesús ja'a jiamioøød tu'ug miänaañ:

—Wiindsøn, mänitøch miiçh nbadu'ubøga'añ cooçhä ndeedy hänäjty tøø yho'nä, cooçh hänäjty tøø nyajnaaxtägøøñä.

²²Mänitä Jesús yhadsooyy:
—Ween ja'a mjujy ja'a mmägu'ughajxy yajnaaxtägø'øy. Cáböch ja'a nmädia'agy hajxy xpianøcxaañä. Pero miich, ween quipxy nwädíjtäm.

²³Mänitä Jesús hajxy tiägøøyy barcojooty møødä jiamioødhajxy. Tiu'ubøjnä hajxy barcojooty.

²⁴Mänitä poj møc piädø'cy, høxtä cugujjøøyy ja'a nøø jiiby barcojooty. Pero tøø ja'a Jesús hänäjty miaaho'nä. ²⁵Mänit hoy yuxyíjäm ja'a miägu'ughajpä tu'ug. Mänit ñämaayyä:

—Wiindsøn, højts yajñhäwåatsäc. Cham højts nnøøho'ogø'øwa'añ.

²⁶Mänitä Jesús yhadsooyy:

—Tii hajxy coo mwi'i chähgø'øy. Cábøch mijs ja'a nmädia'agy hajxy jaduñ xñä'a mäbøjcä, paady hajxy mdsähgø'øy.

Mänit piädø'cy. Mänitä poj jiøjcunäma'awøøyy møødä mejy coo quia'a mínnät. Mänit jaduñ yuungøøyy. Caj nä'ägädä pojnä.

²⁷Mänitä miägu'ughajpähajxy yagjuøøyy. Mänit hajxy nñämaayyä:

—Nebiäda'a jaduñ coo miädia'agy miäbøjcäxä høxtä ja'a poj møødä mejy.

²⁸Mänitä Jesúshajxy jim miejch mejyhawiimb maa ja'a naax hänajty xiøhatiän Gadara. Jimä cabäsantä hänajty tu'ug. Mänitä Jesús jäya'ay nämetsc nñamejtsä. Jim hajxy hänajty tøø choon maa ja'a cabäsantän. Tøø hajxy hänajty miächii ja'a mõjcu'ujäm. Jaanč tehñ quia'awiindøyy hajxy hänajty nibiäda'agyii. Ni pøn hajxy hänajty quia'a yajnaxa'añ maa ja'a tu'ujän. ²⁹Mänitä Jesús tiägøøyy wiinguyaaxøøyyäbä:

—Jesús, tii højts xwia'ana'añ, miich Dioshuung. Cajnä yhabaady coo højts xyajcumädówät.

Ja'a mõjcu'uhajxy jaduñ mänaan, ca'a jäya'ayä.

³⁰Jim mayhädsøm hänajty wiädity tunwiinmänac jäguemjuøøby. ³¹Mänitä Jesús miänuu'xtaacä ja'a mõjcu'uhajxy:

—Pø xyajpäsømaamb højts yaa maa hädaa jäya'ayän nämetscä, na'añ højts jiiby nhuuc tägø'øy maa yø'ø hädsøm jioodotyhajxiän.

³²Mänitä Jesús miänaañ:

—Nøcx hajxy jiiby tägø'øw.

Mänitä mõjcu'uhajxy nähwaach ja'a jäya'ay nämetspä. Mänitä

hädsøm hajxy nñamejch. Cøjx ja'a hädsømhajxy wyiinmänacpäyø'øgy. Cøjx hajxy quiuhcahnaxy naaxøjpcøxp. Mejjiooty hajxy hoy quiuga'awø'øy. Cøjx hajxy jiiby yho'ogy mejjiooty.

³³Mänitä

hädsøm güeendähajpähajxy chähgø'øbäyø'cy. Coo hajxy jim miejch maa ja'a cajtän, mänit hajxy miädiaacy nebiaty hajxy hänajty tøø yhiixy, coo ja'a mõjcu'uhajxy hänajty tøø nähwa'ačh ja'a jäya'ay nämetspä.

³⁴Cøjx ja'a cu'ughajxy nøcxy päyø'øguiä maa ja'a Jesúsän. Coo ja'a Jesús hajxy piaaty, mänit hajxy miänuu'xtaacy coo ja'a Jesús jim choonät maa ja'a nñaxhajxiän.

9 Mänitä Jesúshajxy tiägøøguiumbä barcojooty, najxtägajch hajxy jadähooc mejyhawiimb maa ja'a quiajpthajxiän. ²Mänitä tecymiucypliä tu'ug quiøømiejtsä tsaajiooty maa ja'a Jesúsän. Ja'a mähdiøjc ja'a miägu'ughajpähajxy jaduñ cøømiejtsä. Coo ja'a Jesús yhiixy coo hajxy hänajty miäböcy, mänitä Jesús ja'a mähdiøjc nñamaayy: —Huung, jootcugø'øw; tøø ja'a mbojpä mgädieey xñähwa'ačh.

³Jimä ley-yajnahixøbiädøjc hänajty näje'e tiäna'ay ja'a Jesús nähmøjc. Coo hajxy jaduñ miädooyy nebiä Jesús miänaañän, mänit hajxy näje'e quiopcooty tiägøøyy mädiaacpä: “Capxtägooby hädaa craa jaduñ maa ja'a Diosøxpän.” ⁴Najuøøby ja'a Jesús hänajty neby hajxy hänajty miädia'aguiän quiopcooty. Mänit miänaañ:

—Tii haxøøgwiinmahñdy hajxy
 coo mmøødhaty mgopcooty.
⁵Mädyii mädia'agy maas tsip,
 cooch hädaa mähdiojc nnämä'awät:
 “Tøø ja'a mbojpa mgädieey
 xñähwa'açh”, tøgä maas tsip jaduhñ
 cooch nnämä'awät: “Tänaayyø'og,
 yo'oyø'og.” ⁶Nyajcähxø'ogáambiøch
 coochä cuhdujt jaduhñ nmøødä
 hädaa yaabä naaxwiin coochä
 poppä cädieey nyajñähwá'adsät,
 høøch ja'a Diosquexypä.

Mänitä Jesús ja'a tecymiucypiä
 ñämaayy:

—Tänaayyø'og, widsø'og yø'ø
 mdsaa, nøcxnä maa ja'a mdøjcän.

⁷Mänitä tecymiucypiä
 tiänaayyø'cy. Mänit ñøcxnä maa
 ja'a tiøjcän. ⁸Coo ja'a cu'ughajxy
 jaduhñ yhiixy coo ja'a tecymiucypiä
 tøø yhoø'øy, mänit hajxy
 chähgøøbiøjcy. Mänitä Dios hajxy
 wyiingudsähgøøyy, je'eguiøxpä
 coo ja'a Jesús ja'a mäjaa hñajty
 tøø mio'oyii, ja'a Diosquexypä.
 Cab hajxy hñajty ñajuø'oy pø
 Dioshuung hñajty je'e, ja'a Jesús.

⁹Mänitä Jesús jim choñ.
 Mänitä jäya'ay tu'ug yhiixy, ja'a
 xøhajpa Mateo. Jimä Mateo
 hñajty yhäña'ay maa hñajty
 yajñähjuudiu'udiän. Mänitä Mateo
 ñämaayyä:

—Jam quipxy wädijtäm.

Mänitä Mateo tiänaayyø'cy. Mänit
 ja'a Jesús piadu'ubøjcy.

¹⁰Jimä Jesús hñajty quiaiy
 tøgooty møødä miägu'ughajpähajxy.
 Mänitä yajñähjuudiu'upähajxy
 may miehch mägaabiä, møødä
 jäya'ayhajxy ca'a panøcxpä ja'a
 judíos quiuhdujt. Mänitä Jesús
 hajxy tiägøøyy møødcaabiä. ¹¹Jimä

fariseoshajxy hñajtypä, ja'a hajxy
 hñajty hoy jaançh tehñ pianøcxpä
 ja'a Moisés miädia'agy. Mänitä
 fariseoshajxy miänaañ:

—Tii yø'ø mwiindsøn
 coo miøødcay ja'a
 yajñähjuudiu'upähajxy møødä
 cubojpä cugädieeyhajxy —nømä
 Jesús miägu'ughajpähajxy
 ñämaayyä.

¹²⁻¹³Miädoow ja'a Jesús jaduhñ.
 Mänit miänaañ:

—Pøn jaduhñ møc, caj
 yajtsooyø'oy; pøn jaduhñ
 pa'ammøød, je'eds jaduhñ
 yajtsooyøøby. Jaduhñ mäwiiñøch
 høøch nebiä mädsøoyøøbiän.
 Páadyhöch yaa tøø nmiñ tøø
 nmech, nébiøch ja'a cubojpä
 cugädieeybähajxy nnämä'awät
 coo ja'a yhaxøøgwiinmahñdy
 hajxy ween ñajtshixø'oy. Ja'a
 hojiäya'ayhajxy, cábøch hajxy
 je'e waamb nnäma'awa'añ. Nøcx
 hajxy habøc tii ja'a Diosmädia'agy
 jaduhñ ñänøømby: “Chójpjøch ja'a
 njoot jaduhñ coo hojiot hajxy
 mmøødhädät; cábøch jaduhñ
 nmänaannä coo animal hajxy
 myóxät maa ja'a høøchcøxpän.”

¹⁴Mänitä Jesús ñämejtsä ja'a Juan
 mäyajnäbejpa miägu'ughajpähajxy.
 Mänitä Jesús miäyajtøwä:

—Tii miich mmägu'ughajpähajxy
 jaguiay quia'a nä'ägädä hida'añ.
 Naxy højts jaguiay tu'xøøjaty nhity
 tähoocjaty; jaduhñ højts ja'a Dios
 nwiingudsähgø'oy. Jaanä jaduhñä
 fariseoshajxy yhiijpä jaguiay.

¹⁵Mänitä Jesús yhadsooyy:
 —Coo ja'a jäya'ayhajxy mänaa
 piøcy yhu'ugy, cabä woyba wichpä
 hajxy jiø'oy xiuuuch. Xoonäacp

hajxy jaduhñ, je'eguiøxpä coo ja'a jamiø'ød jyijä. Jaduhñ mäwfiñoch høøch nebiä jamiø'ødän. Páadyhøch nmägu'ughajpähajxy jaguiay quia'a hity. Habaadaamb jaduhñ cooçh yaa ndsoonaanñä; mänit hajxy mäbøcypiä jaguiay yhida'añ.

¹⁶Cab jaduhñ pøn tucwit yhagøyyø'y jemwyithaam. Múgäp ja'a jemwyit jaduhñ y maas hanaxiä ja'a tucwit jaduhñ quiø'ødsät. ¹⁷Jaanä jaduhñduhmbä, cabä pøn jemvyino quitudemø'ø'y tucwajhacxujiooty. Cøødsäp ja'a wajhacxuy jaduhñ y høxyógäp ja'a vino jaduhñ. Haagä tägóyyäp ja'a wajhacxuy jaduhñ møødä vino. Pero jiibiä jemvyino hajxy quitudemø'ø'y maa ja'a wajhacxuy jembyiän. Jaduhñ ni mädyii quia'a tägóyyät.

¹⁸Cajnä ja'a Jesús hänajty miädiaacpäðø'y, mänitä tsajtøjcwiiindsøn tu'ug miejch. Mänitä Jesús wyiingo'naaguiädaacä. Mänit nämaayyä:

—Naamhó'ogyhøchä nhuung ja'a to'oxypä. Coo miich nøcxy mnähdøñ, mänit jiuypiojtägätsät.

¹⁹Mänitä Jesús piäðø'cy. Mänit jaaya'ay miøødtu'ubøjcy møødä Jesús miägu'ughajpähajxy. ²⁰⁻²¹Jimä tadjäya'ay hänajty tu'ug høxhaam pianøcxy. Pa'ammøød hänajty je'e. Majmetscjumøjt ja'a ñø'ty hänajty tøø wyi'i xie'e'xy, weenjaty weenjaty. Jaduhñä tadjäya'ay hänajty miädia'agy quiopcooty: “Nägóoyyøch ja'a wyitpa'a nnähdóonät, mänitøch nmøcpøgät.” Coo ja'a Jesús ja'a tadjäya'ay jäguyohdiägøøyyä, mänitä wyitpa'a nähdoonäxä.

²²Mänitä Jesús yhee'pwiimbijty, Mänit ja'a tadjäya'ay yhiixy. Mänit miänaañ:

—Huung, jootcugø'øw; tøø jaduhñ mmøcpøcy, je'eguiøxpä coo tøø mmäbøcy.

Mänitiä ja'a tadjäya'ay miøcpøjcy.

²³Mänitä Jesús hajxy jim miejch maa ja'a tsajtøjcwiiindsøn tiøjcän. Jiibiä xuuxpäðøjch-hajxy hänajty yho'ogyjäya'awyiinxu'uxy. Jiibiä jäya'ayhajxy hänajty wyi'i yhaamhaty. ²⁴Mänitä Jesús miänaañ:

—Pädsøm hajxy jiiby. Cab yø'ø tøø yho'ogy, nä'ä maab yø'øduhñ.

Mänitä Jesús näxiicä. ²⁵Cøjx hajxy jaduhñ piädsømy. Mänitä Jesús tiøjtägøøyy. Mänitä to'oxyhäna'c quiø'ømajch. Mänitä to'oxyhäna'c yhänaayyø'cy. ²⁶Mänitä mädia'agy wiädiyty wiinduhmyhagajpt coo ja'a to'oxyhäna'c tøø yagjuypiogyii.

²⁷Coo ja'a Jesús hajxy jim choññ, mänitä wiindshajxy nämetsc piadu'ubøjcy yáaxäp:

—Højts näxúu'tsäc. David miich hijty mhaphajpy mdeedyhajpy.

²⁸Coo ja'a Jesús tiøjtägøøyy, mänitä wiindshajxy miäwiingooñ. Mänitä Jesús miänaañ:

—Nej, mmäbøjpy hajxy jaduhñä cooçhä mäjaa nmøødä coo hajxy nyaghixø'øgädä.

Mänit hajxy miänaañ:

—Wiindsøn, nmäbøjpy højts.

²⁹Mänitä Jesús ja'a wiinds wyiinhajxy nähdoonä. Mänitä Jesús miänaañ:

—Ween hajxy mhixø'øgy coo hajxy tøø mmäbøcy.

³⁰Mänit hajxy yhiixø'cy. Mänitä Jesús miänaañ:

—Ca'a pøn hajxy mnä'ägädä hawaanä.

³¹Coo ja'a wiindshajxy jim chohñ, mänit hajxy tiägøøyy mädia'agy-yajwädijpä coo hajxy tøø yaghijxø'ogyii ja'a Jesúsäm.

³²Mänitä huum tu'ug yajmejtsä maa ja'a Jesúsän. Tøø hänajty miächii ja'a møjcü'ujäm. ³³Mänitä Jesús ja'a møjcu'u jii by yajpäyø'cy. Mänitä ja'a huum quiapxø'cy. Yagjuøøyy ja'a jäya'ayhajxy jaduñ. Mänit hajxy miänaañ:

—Ni mänaa jaduñ pøn tii quia'a yagjadyii nebiä hädaajän yaa Israelnaaxooty.

³⁴Mänitä fariseoshajxy miänaañ: —Paady yø'øya'ay ja'a møjcu'u yajpäyø'ogy, coo ja'a møjcu'ugong miäjaa miøødhajtä.

³⁵Cøjx ja'a Jesús wiädity wiinduhmyhagajpt. Homiaajä hänajty wiädity, jii by hänajty yajnähi xø'øy tsajtøgooty coo ja'a Dios ja'a miäjaa mobädajp yajcähxø'øga'añ. Yajnajxyp hänajty homiädyii pa'amä. ³⁶Näxuu'chp ja'a Jesús ja'a majiäya'ay hänajty. Jaduñ mäwíinäts hajxy hänajty nebiä meegän, ja'a cäjpä wyiindsøn. Nebiä tågowiädijpä hajxy hänajty je'e. Nebiä jootmayhajpä hajxy hänajty je'e. ³⁷Mänitä Jesús ñämaayy ja'a miägu'ughajpähajxy:

—Yø'ø majiäya'ayhajxy, hoy jaduñ coochä nmädia'agy hajxy xmiäböjcat. Pero cab højts nnämáyyäm, højts ja'a mädia'agy nyajwá'xämbä.

³⁸Mänuu'xta'ag ja'a Dios hajxy coo ween ja'a mägu'ughajpä hajxy xjiaac móoyämät, neby højts ja'a mädia'agy hajxy xmiøodyajwá'xämät.

10 Mänitä Jesús ja'a miägu'ughajpä miøjyaaxy ja'a nämajmetspä. Mänitä cuhdujt miooyy coo ja'a møjcu'u hajxy yajpäyø'øgät, coo homiädyii pa'amä hajxy yajnáxät.

²Jaduñä nämajmetspähajxy hänajty xiøhaty: Simón Pedro møødä piuhya'ay Andrés; ja'a Zebedeo yhuunghajxy, Jacobo møødä Juan; ³Felipe; Bartolomé; Tomás; Mateo ja'a yajnähuudiutpä; Jacobo, ja'a Alfeo yhuung; Lebeo Tadeo; ⁴Simón ja'a cananista; Judas Iscariote, ja'a Jesús hänajty yajyagho'ogáanäbä.

⁵Mänitä Jesús ja'a nämajmetspähajxy quiejxy mädia'agy-yajwa'xpä. Mänit ñämaayy:

—Ca'a hajxy jim mnøcxy maa ja'a ca'a judiøshajxy chäna'ayän, y ca'a hajxy jim mnøcxy Samarianaaxooty. Yaayy hajxy jaduñ mwädítät, yaa Israelnaaxooty. ⁶Ja'a jäya'ayhajxy yaabä, jaduñ mäwíinäts hajxy je'e nebiä meeg tågowiädijpä. ⁷Mnägäpxäp hajxy jaduñ coo ja'a Dios ja'a miäjaa mobädajp yajcähxø'øga'añ. ⁸Myajnáxäp hajxy homiädyii pa'amä møødä haxøøgpa'am. Myagjujyipiøgäp ja'a ho'ogyjiäya'ay hajxy. Myajpäyø'øgäp ja'a møjcu'u hajxy. Nnä'a móobiøch mijts hädaa cuhdujt; cábøch mijts nyagjuya'añ; jaduñ mijtspä, cab hajxy myagjúubiät.

⁹Cabä xädø'øñ hajxy mgónät ni weentiä. ¹⁰Cabä morral hajxy mwídsät. Tu'uquiä camiixy hajxy mwídsät. Cabä cø'øg hajxy mejtstehng mmänøcxät. Cabä

cuhdajt hajxy mgábät. Jim hajxy mmägaya'añ mmähu'uga'añ maa hajxy hänäjty mhamejststa'aga'añän.

¹¹Coo hajxy maa mgajptäg'owät, jimä jäya'ay hajxy mhøxtá'awät ja'a hojiootmøødpä; jim hajxy mhamejststá'agät. Jiiby hajxy mhídät høxtä coonä hajxy hänäjty mdu'ubøga'añ. ¹²Coo hajxy mdøjtäg'owät, mänit hajxy myajpoo'xät. ¹³Coo hajxy jaduhñ xyajtøjtäg'owät hamuumdu'joot, mänit hajxy jaduhñ quiunuu'xøøjät ja'a Diósäm; pø caj, cab hajxy jaduhñ quiunuu'xøøjät. ¹⁴Coo hajxy jaduhñ xquia'a nä'ägä jøjpøg'owät, coo ja'a mmädia'agyhajxy xquia'a nä'ägä mädöowät, mänit hajxy jim mdsóonät. Mänitä mdecy hajxy mwiinwop mwiinxídät, nebiä hijxtahñd jaduhñ miähmø'owät coo mijts jaduhñ tøø xquia'a yajtøjtäg'øy. ¹⁵Tøyhájtäts mijts nnäma'ay, coo yhabáadät coo ja'a jäya'ayhajxy quiumädowa'añ, maas hanaxiä yøø cajpt jaduhñ quiumädowa'añ quejee ja'a Sodomacajpt møødá Gomorracajpt.

¹⁶Maäch mijts nwiinguexiän, haxøøgwiinmahñdy ja'a jäya'ayhajxy jim miøød. Paady hajxy nähix hahixøø mnibiäda'agøøjät. Mee'xxieemy hajxy jaduhñ mwädítät.

¹⁷Mniyajcopcø'owøøjäp mijts. Xyajcø'ødäg'owäp mijts maa ja'a tuungmøødpän. Mänitäts hajxy xwyiinwop xjiøjwóbät maa ja'a chajtøgootyhajxiän. ¹⁸Høxtä jim hajxy xyajmedsa'añ maa ja'a gobiernä wyiinduumhajxiän, møød jim maa ja'a ca'a judíos wyiinduumhajxiän. ¹⁹Pero coo

hajxy jaduhñ xyajmédsät maa ja'a wyiinduumhajxiän, cab hajxy mdaj mmáyät waambaty hajxy hänäjty mmädia'aga'añ. Coo jaduhñ yhabáadät, mänitä Dios jaduhñ xyhawáanät waambaty hajxy jaduhñ mmäná'anät. ²⁰Cab hajxy hamdsoo mmädia'aga'añ. Dioshespírituhaam hajxy jaduhñ mmädia'aga'añ.

²¹Haxøøg jaduhñ jiaada'añii. Hamdsoo hajxy ñiñahanuu'xø'owa'añii ja'a tu'que'expä-jäya'ay. Jaduhñ ja'a tieedyhajxy jiatcø'owaambä møødá yhuunghajxy. ²²Ja'a høøchcøxpä mijts ja'a jäya'ayhajxy nägøxiä xmiähanhada'añ. Pøn jaduhñ mee'xtujp cøjxta'axiøø, je'leds jaduhñ mähmø'owaamb hodiuum. ²³Coo mijts hajxy xchaaçhtiünät mädu'ughagajpt, mänit hajxy mbäyø'ogät, mänit hajxy mnøcxät wiingtuum. Tøyhájtäts mijts nnäma'ay, cooçh hänäjty ngäda'aga'añ, høøch ja'a Diosquexypä, cahnä cajpt hajxy hänäjty mwiinwädityñä maa ja'a judíoshajxy chäna'ayän.

²⁴Cabä pøn jaduhñ jiaty nebiä wyiindsøn jiatian. ²⁵Coo hajxy jaduhñ mjädät nebiä mwiindsøn hajxy jiatian, jootcujc hajxy jaduhñ mhídät. Cooçhä jäya'ayhajxy jaduhñ tøø xñäma'ay: "Møjcu'u", jaduhñ mijts hajxy xñäma'awaambä.

²⁶Cabä cu'ug hajxy mdsähgø'owät. Nebiaty hajxy jaduhñ jiatcø'øy hamee'ch, cähxø'ogaamb jaduhñ. ²⁷Waambátyhøch mijts hamee'chhaam nnajtscapxøøyyäm,

majiäya'ayhagujc hajxy myajcapxó'owät. ²⁸ Cab hajxy mdsähgó'owät pøn ja'a mnaaxni'x hajxy xyaghó'cäp; cabä mháañämä hajxy jaduhñ xyaghó'cät. Ja'a Dios hajxy mdsähgó'owäp; je'edsä cuhdujt jaduhñ mөөd coo hajxy jiiby xquiéxät haxөөgtuum. Jiiby ja'a mnaaxni'xhajxy quiuhdägóyyät mөөdä mháañämähajxy.

²⁹ Ja'a muuxyhuunghajxy, coo hajxy quia'ay, yhiixyp ja'a nDeedyhájtämhajxy jaduhñ, hoy hajxy quia'a ja tsowä. ³⁰ Jaanä jaduhñ mijts xyhiixpä, hөxtä xñajuóyyäp mijts naag mijts mguhwaay. ³¹ Cabä jäya'ay hajxy mdsähgó'owät; hix, mmaas tsoobaatp mijts quejee ja'a muuxyhajxy.

³² Pönjátyhöch ja'a nmädia'agy xmiөdyajtu'ugөөby maa ja'a cu'ugwiinduumän, mänitөch ja'a miädia'agyhajxy nmөodyajtu'ugө'owaambä maaächä nDeedy wyiinduumän jim tsajpootyp. ³³ Pero pönjátyhöch jaduhñ tu'ugmädia'agy tөө xquia'a mөөdhity maa ja'a cu'ugwiinduumän, ni hөөch jaduhñ tu'ugmädia'agy nga'a mөөdhidaambä maaächä nDeedy wyiinduumän jim tsajpootyp.

³⁴ Cooch yaa tөө ngäda'agy, paadiä jäya'ayhajxy jaduhñ ñimiädsibө'owa'añii ja'a hөөch nmädia'agyquioxpä. Cab hajxy jootucj yhida'añ. ³⁵⁻³⁶ Tu'tөjc hajxy jaduhñ ñimiädsibө'owa'añii, mөөdä tiaj mөөdä tieedy, mөөdä ñөөx mөөdä miajc, mөөdä jiaxie'eb mөөdä xiocy.

³⁷ Pönä tiaj pönä tieedy maas tsojp quejeech hөөch jaduhñ

xchocy, cábөch ja'a nmädia'agy hoy xpianөcxät. Y pönä ñөөx pönä miajc maas tsojp quejeech hөөch jaduhñ xchocy, ni je'ech ja'a nmädia'agy hoy xquia'a panөcxäbät. ³⁸ Pönä jioot tsojp cooch hөөch xpianөcxät, pero cabä jioot jaduhñ chocy coo chaächpögät nébiөch jaduhñ ndsaaächpөga'añän, cábөch nmädia'agy jaduhñ hoy xpianөcxät. ³⁹ Pönä jiugyhajt jaduhñ ja wi'i yaghoyө'owaamb, tägöyyäp ja'a jiugyhajt jaduhñ. Pero pönä jiugyhajt najtshixө'owaamb ja'a hөөchcxpä, je'eds hodium nөcxaamb.

⁴⁰ Pөн mijts jaduhñ xchojp, jaduhñ mäwiinөch hөөch xchojpä. Y pөнhöch hөөch jaduhñ xchojp, jaduhñ mäwiinädsä Dios jaduhñ chojpä, ja'aäch tөө xquiéxiäbä.

⁴¹ Ja'a Diosquexyhajxy, hodium hajxy ñөcxa'añ. Jaanä jim hajxy ñөcxaambä pөн jaduhñ tsojp ja'a Diosquexy. Paady hajxy chogyii coo hajxy jaduhñ Dyiosquexiä. Jaanä jim hajxy ñөcxaambä hodium pөн jaduhñ tsojp ja'a hojiäya'ay. ⁴² Coo hädaa häyoobäya'ay төchñөө ñlä mo'owөөjät je'eguiөxpä cooch jaduhñ xpianөcxy, mänit jaaya'ay piäda'agөөjät hodium, ja'a nөө tөө yéquiäbä. Tehm tiөyhajt jaduhñ.

11 Coo ja'a Jesús ja'a jiamiөdhajxy yajwiingapxөөbiädөyy, mänit jim chohñ. Mänit tiägөөyy yajnähixөөbiä maa ja'a cajtp mäwiingonän.

² Ja'a Juan, tsumyhäñaaby hänajty je'e. Coo miädoyhajty coo ja'a Cristo hänajty wiädity yajnähixөөbiä, mänitä

miägu'ughajpä metsc quiejxy maa ja'a Jesúsän. ³Mänitä Jesús hajxy miäyajtøoyy:

—Nej, miich ja'a Crístojä, ja'a Dios jaduhñ quiexaambä, tøgä wiinghäna'c je'ejä.

⁴Mänitä Jesús yhadsooyy:

—Nøcx ja'a Juan hajxy hawaanä neby hajxy xii mhix mmädooy.

⁵Nøcx hajxy yajmøødmädia'ag coo ja'a wiindshajxy tøø yhiyxø'ogy, coo ja'a tecymia'adpähajxy tøø yo'oyø'ogy, coo ja'a haxøøgpa'ammøødpähajxy tøø ñähwa'aäch, coo ja'a cuhnatpähajxy tøø miädoowø'ogy, coo ja'a ho'ogyjäya'ayhajxy tøø jiuypioçy, coo ja'a häyoobäya'ayhajxy tøø yajmøødmädia'agyii ja'a Diosmädia'agy. ⁶Jootcuç hajxy jaduhñ yhity ja'aäch nmädia'agy hajxy hamuumdu'joot tøø xmiäbøjcäbä.

⁷Coo ja'a Juan

miägu'ughajpähajxy wyiimbijty, mänitä Jesús ja'a cu'ug tiägøoyy møødmädiaacpä ja'a Juancøxpä.

—Coo hajxy tøø mhoy pactuum, ja'a Juan miädia'agy hajxy hänajty mmädowáanäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänajty mmädowaanä. ⁸⁻⁹Diosquexy je'e, paadiä miädia'agy hajxy hoy tøø mmädoowä, hoy ja'a howyit hänajty quia'a ja møødä nebiä mäyøøjäya'ayhajxy miøødän. Tøyhajt jaduhñ coo ja'a Juan ja'a Diosmädia'agy yajwiingapxø'ø. Pero ja'a Diosmädia'agy hajxy nä'a jaac yajnähixøøbiä, je'edsä

cuhdujt hajxy maas may tøø mio'oyii ja'a Diósäm. ¹⁰Ja'a Diosmädia'agy jecy mädiáacäbä, Juan je'e. Nømä Dios jecy miánaañ coo ja'a quiuguexy hänajty jayøjp quiexa'añ maa ja'a cu'ugän, ween yajwiinxiic yajwiingapxø'ø coo ja'a yhaxøøgcuhdujt hajxy ñajtshixø'owät. Høxháamhøch hänajty ngäda'aga'añ. Jayøjp ja'a Juan jiaançh quejxä; høxháamhøch njaançh cädaacy. ¹¹Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnabejpä ja'a cuhdujt miøødän. Tøyhajt jaduhñ. Pero cooçh hänajty tøø nho'nä, cooçh hänajty tøø nnøcxtägach maaçh nhuuc tsohmän, pønjaty ja'a Diosmädia'agy mäbøgaamb ja'a høøchcøxpä, maas mayyä cuhdujt hajxy hänajty miøødhada'añ quejee ja'a Juan miøødä, hoy ja'a møjcuhdujt hajxy hänajty quia'a ja møødä.

¹²'Coo ja'a Juan tiägøoyy mäyajnabejpä, høxtä je'enä jäda'anäbaadyñä, nägø'ø nädecypä ja'a jäya'ayhajxy jia wi'i tiägø'owa'añ maa ja'a Dios wyiinduumän. ¹³⁻¹⁴Ja'a Diosquexyhajxy jecypä, jaduhñ hajxy jecy miánaañ coo ja'a Dios ja'a miäjaa yajcähxø'oga'añ. Jaduhñä Moisés miädia'agy miánaambä. Pero jayøjpac ja'a Elías hijty myina'añ. Y coo ja'a Juan tøø miech, Elías je'e, pø mwiinjuø'owaamby hajxy jaduhñ. ¹⁵Pøn mädohnd møød, ween miädoy.

¹⁶Pänébioch jäya'ayhajxy nyajmäbáadät ja'a jäda'ahatypä.

Cab hajxy tii yhojiäwø'owa'añ. Jaduhñ mäwfiñäts hajxy je'e nebiä pigäna'c wiinhecpän. Coö hajxy naxy miech häyø'pä tøjpa'c, mänitä miäbigäna'c hajxy ñäma'ay: ¹⁷“Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.” ¹⁸Coö ja'a Juan miejch, cab hänäjty quiaaya'añ yhu'uga'añ. Mänit mijts mnänøømy coö je'e quiu'umañøøbiä. ¹⁹Mänitøch nbasejtspä, høøch ja'a Diosquexypä. Mänitøch ndägøøyy caabiä huucpä. Jaduhñhöch mijts xñänøømbä coöch nwi'i quiaaya'añ coöch nwi'i yhu'uga'añ, coöchä cubojpä cugädieeybä nmägu'ughaty møødä yajñähjuudiutpädøjc. Pero yajcähxø'øgaamby ja'a Dios jaduhñ ja'a wyiinmahñdyhaam coöch ja'a tøyhajt jaduhñ nmøødä.

²⁰Mänitä Jesús tiägøøyy hamänajpä. Ja'a cajptjäya'ayhajxy jaduhñ hojjä, ja'a hajxy hänäjty tsänaabiä maa ja'a Jesús ja'a hoy-yagjuøøñäjatypä hänäjty tøø jia yajcähxø'øguiän. Paady jaduhñ yhamänajty, coö yhaxøøgwinnmahñdy hajxy hänäjty tøø quia'a najtshixø'øy. Mänitä Jesús miänaañ:

²¹—Haxøøg mijts mjada'añ mhabeta'añ, mijts yaa tsänaabiä Corazín møødä Betsaida. Ja'a jecyjäya'ayhajxy hijty jim tsänaabiä Tiro møødä Sidón, coö hajxy häxøpy tøø yhixy ja'a hoy-yagjuøøñäjatypä nej mijts tøø mja hixiän, tøø ja'a yhaxøøgwinnmahñdy hajxy häxøpy ñajtshixø'øy. ²²Tøyhajt jaduhñ, coö ja'a Dios yaghabáadät,

maas haxøøgtuum mijts jaduhñ xpiäda'aga'añ quejee ja'a jäya'ayhajxy jim jecy tsänäaayyabä Tiro møødä Sidón. ²³Y mijts jim tsänaabiä Capernaum, mja wi'i yajcumayaamb hajxy jaduhñ. Pero cabä Dios hajxy jaduhñ xquiumaya'añ. Ja'a jecyjäya'ayhajxy hijty jim tsänaabiä Sodoma, coö ja'a hoy-yagjuøøñäjatypä hajxy häxøpy tøø yhixy nej mijts tøø mja hixiän, cab hajxy häxøpy tøø quiuhdägoy. ²⁴Tøyhajt jaduhñ, coö ja'a Dios yaghabáadät, maas haxøøgtuum mijts xpiäda'aga'añ quejee ja'a jäya'ayhajxy jim jecy tsänäaayyabä Sodoma.

²⁵Mänitxøø ja'a Jesús miänaañ: —Teedy, miich nba'yaaxyp. Miich jim häñaaby tsajpootyp; miich yaa Dioshajp maa hädaa yaabä naaxwiinän. Dioscujú'uyäp coö ja'a tøyhajt tøø myajñähixø'øy ja'a hajxy tii ca'a jajpä. Caj tøø myajñähixø'øy ja'a hajxy tyijy jajpä. ²⁶Tøyhajt jaduhñ, Teedy, je'eguiøxpä coö miich mjoot jaduhñ chocy.

²⁷Mänitä Jesús miänángumbä: —Tøøchä nDeedy ja'a tøyhajt xquiøxy yajcø'ødägø'øy. Cábøch pøn xyhixyhaty, høøch ja'a Dioshuung. Tøyhajt jaduhñ. Jagóoyyøch nDeedy xyhixiä. Y cábøch ja'a nDeedy pøn xyhixyhajtä. Jagóoyyøch jaduhñ nhixiä, høøch ja'a Dioshuung. Nyajñähdíjábøch pønjätyhøch nDeedy hixyhádäp. ²⁸⁻³⁰Mijts, pøn jaduhñ ca'a mee'xtugaamb neby hajxy hijty mguhdujthatiän, høøch nguhdujt habøjcäc. Hojióthøch nmøød; cábøch nyajcumaya'añ. Mänitäts ja'a hoybä weenbä hajxy

mbaadät. Cábøch ja'a jemčhpä mapxypä jaduhñ nbäda'aga'añ.

12 Mänitxøø ja'a Jesúsahajxy hänajty wiädity trigoni'ibyquiuic poo'xxiøøjooty. Yähó'cäp ja'a Jesús jiamiøødhajxy hänajty. Mänit hajxy tiägøøyy trigotøjpä. ²Coo ja'a fariseoshajxy jaduhñ yhjxy, mänitä Jesús hajxy ñämaayy:

—Huug hiḡ, xiidsä

mmägu'ughajpä trigo hajxy wyi'i tiøjy. Cabä cuhdujt jaduhñ myiñ coo hajxy tii ndúunämät ja'a poo'xxiøøjooty.

³Mänitä Jesús miänaañ:

—Nej, cahnä ja'a Diosmädia'agy hajxy mgapxiä. Jim jaduhñ myiñ cujaay coo ja'a Davidhajxy yäho'pøjcä. ⁴Mänit hajxy tiägøøyy Diostøgooty. Mänitä Diostajcaagy hajxy quiaayy, ja'a teedyhajxy hänajty tøø quiuyoxø'øyäbä. Cabä cuhdujt hänajty pøn miøødä coo hajxy quiáyät ni ja'a Davidhajxy. Jagooyyä teedy ja'a cuhdujt hajxy hänajty miøødä coo hajxy quiáyät.

⁵Jaduhñ cujaay myiimbä maa ja'a Moisés miädia'aguiän coo ja'a teedyhajxy tsajtøgootypä quia'a nä'ägädä poo'xy ja'a poo'xxiøøjooty; y cab jaduhñ ñejiä. ⁶Y høøčh, maas móc-høch ja'a cuhdujt jaduhñ nmøødä quejee ja'a tsajtøjc. ⁷Caj mijts mwiinjuø'øy waamb ja'a Diosmädia'agy jaduhñ miäna'añ: “Mänáambøch jaduhñ coo hojiot hajxy mmøødhädät; cábøch jaduhñ nmäna'añ coo animal hajxy myóxät ja'a høøčhøxpä.” Coo hajxy jaduhñ mwiinjuø'øwät, cabä jäya'ay hajxy nä'ä nägoodä mwiingapxpédät.

⁸Høøčh ja'a Diosquexypä,

nmøødhøch cuhdujt jaduhñ høxtä maa ja'a poo'xxiøøbaadiän.

⁹Mänitä Jesús jim chohñ. Mänit tiägøøyy tsajtøgooty. ¹⁰Jiibiä mähdiøjc hänajty tu'ug; cø'ødø'øds hänajty tu'nax. Jiibiä fariseoshajxy hänajty näje'e tiänaabiä. Mänitä Jesús miäyajtøwä:

—Nej, hoy jaduhñ coo ja'a pa'amjäya'ay myajmøcpøgät ja'a poo'xxiøøjootiä.

Paadiä fariseoshajxy jaduhñ miänaañ, yhøxtaaby ja'a wiinmahñdy hajxy hänajty nebiä Jesús hajxy yajtsumøøjät. Coo ja'a Jesús ja'a pa'amjäya'ay yajmøcpøgät ja'a poo'xxiøøjooty, mänitä Jesús hajxy hänajty yajtsuma'añii.

¹¹Mänitä Jesús yhadsooyy:

—Hoy pues. Coo pøn mieeg quiug'a'awø'øy nøøjutjooty ja'a poo'xxiøøjooty, mänit hajxy nøcxy yajpädsømy, túhmäts. ¹²Y maas tsoobaatp ja'a jäya'ay quejee ja'a meeg. Hoy jaduhñ coo jäya'ay mnäxúudsät ja'a poo'xxiøøjooty.

¹³Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänit xiajtøøyy. Mänit miäbaaty nebiä tu'ugpä. ¹⁴Mänitä fariseoshajxy tiøjpädsøømy. Mänit hajxy quiojyquiapxyhajty nebiä Jesús hajxy yaghó'ogät.

¹⁵Coo ja'a Jesús jaduhñ miädoyhajty, mänit jim chohñ. Mänitä jäya'ay may piadu'ubøjcy. Mänitä Jesús ja'a pa'amjäya'ay yajmøcpøjcy nägøxiä. ¹⁶Mänit jaduhñ miänaañ coo hajxy quia'a nägäpxät pøn je'e. ¹⁷Jaduhñdsä tiøjiajty nebiä Isaías jecy miänaañän, ja'a Diosquexypä. Dios jaduhñ mänaamb:

¹⁸ Høøchä nmoonsä hädaa, ja'aäch
tøø nwiimbíyyäbä.

Ndsójpíoch jaduñ.

Jootcújc-høch nniijiäwø'oyii
yø'øgøxpä.

Nbäda'agáambiøch ja'a
nhEspíritu maa yø'øjän.

Høøch nguhdujt jaduñ
xyajwiingapxø'øwáanäp maa
ja'a jäya'ayhajxy nägøxiän.

¹⁹ Caj chiptuna'añ; caj ya'axa'añ
caj jioga'añ.

Hahuum jaduñ wiädita'añ
cajptooty.

²⁰⁻²¹ Jiootcapxmøcpøgaamby pøn
hobiä nejpiä mäbøjp.

Mäbøgáanäxpä ja'a miädia'agy
ja'a jäya'ayhajxy nägøxiä.

Mänit jaduñ tiägø'owa'añ
hoyhanehmbä.

²² Mänitä mähdiojc tu'ug
yajmejtsä maa Jesúsän. Wiindsä
mähdiojc hänäjty, møød hänäjty
yhuumä, møød ja'a møjcu'uba'am
hänäjty miøødä. Mänitä Jesús
jaduñ yajnähwaach, yaghijxø'cy,
yajcapxø'cy. ²³ Mänitä jäya'ayhajxy
nägøxiä yagjuøoyy. Mänit hajxy
ñiñämaayyä:

— Nej, David yhap yhocäda'a
yø'øduñä.

²⁴ Coo ja'a fariseoshajxy jaduñ
miädooyy, mänit hajxy miänaañ:

— Coo yø'ø craa ja'a
møjcu'uwiiinmahñdy jaduñ
miøødä, paadiä møjcu'uba'am
jaduñ yajnähwa'aäch.

²⁵ Ñajuøøbiä Jesús hänäjty
nebiä fariseoshajxy hänäjty
wyiinmahñdyhaty. Mänit miänaañ:

— Coo ja'a tu'hagajtpä
jäya'ayhajxy ñimiädsibø'øwøøjät,
cuhdägøyyäp ja'a quiajpthajxy

jaduñ. Y coo ja'a tu'ugtøgootypä
jäya'ayhajxy ñimiädsibø'øwøøjät,
cab hajxy hoy yhijnät tu'ugtøgooty.

²⁶ Jaaná jaduñduhmbä, coo ja'a
møjcu'uhajxy ñimiädsibø'øwøøjät,
tägøyyäp ja'a wyiinmahñdyhajxy
jaduñ. ²⁷ Hoorä, mijts

jaduñ mänaamb cooçh ja'a
møjcu'uba'am nyajnahwa'aäch ja'a
møjcu'uwiiinmahñdyhaam. Coo
häxøpy jiaduñä, maa mijts ja'a
mjamiøød ja'a wiinmahñdy hajxy
piaady coo ja'a møjcu'uba'am
hajxy yajnähwa'aäch. Hamdsoo
hajxy myajcähxø'øgy coo ja'a
tøyhajt hajxy mga'a møødä. ²⁸ Pero
høøch, DioshEspirituháamhøch
ja'a møjcu'uba'am nyajnahwa'aäch.
Cähxø'p jaduñ coo tøø yhabaatnä
coo ja'a Dios ja'a miäjaa
yajcähxø'øga'añ.

²⁹ Coo ja'a møjcu'u xquia'a
yajmäjädá'agät, cabä miäjaa jaduñ
mbøjcät.

³⁰ Pøñhøch jaduñ xquia'a
møødpädø'p, høøch nmädsip
je'e. Y pøñhøch jaduñ xquia'a
møødtuumb, xmiähanhájpøch je'e.

³¹⁻³² Je'eguiøxpøch mijts
jaduñ nnäma'ay, coo pøn
jaduñ tiu'udägøyyät, hoy jaduñ
ñähwá'adsät, hóyhøch jaduñ xjia
nänømy, høøch ja'a Diosquexypä.
Pero coo pøn jaduñ nänómät ja'a
DioshEspíritu, cab jaduñ mänaa
ñähwa'adsa'añ.

³³ Mhøxcábäp hajxy jaduñ
pøn ja'a howyiinmahñdy møød;
je'eds hoy wädiip. Pøn ja'a
howyiinmahñdy ca'a møød,
cab hoy wiädity. ³⁴ Jaduñ
mäwíinäts mijts hajxy mjatcø'øy
nebiä tshänidiän. Paadiä hoybä

hajxy mǵa'a mädia'aga'añ, coo ja'a haxøøgwiinmahñdy hajxy mmøødä. Haagä mgopcooty ja'a mmädia'agyhajxy jaduhñ chohñda'agy. ³⁵Jaaya'ay hojiäya'aybä, hoy jaduhñ quiapxy miädia'agy je'eguiøxpä coo ja'a howyiinmahñdy miøødä quiopcooty. Pero jaaya'ay ca'a hoybä, haxøøg jaduhñ quiapxy miädia'agy je'eguiøxpä coo ja'a haxøøgwiinmahñdy miøødä quiopcooty. ³⁶Chaaçh mijts nnäma'ay, coo jaduhñ yhabáadät coo ja'a Dios hänäjty yajnähdi ja'añ, mänitä Dios hajxy xmiäyajtowa'añ waambaty hajxy hänäjty tøø mgapxtägoy, hoy hajxy jaduhñ tøø mja nä'ä wiingapxnaxy. ³⁷Pø haxøøg hajxy hänäjty tøø mmädia'agy, mänit Dios hajxy xpiäda'aga'añ haxøøgtuum. Pø hoy hajxy hänäjty tøø mmädia'agy, mänitä Dios hajxy xpiäda'aga'añ hodium.

³⁸Mänitä Jesús ñämaayyä ja'a fariseoshajxy näje'e møødä ley-yajnähixøøbiähajxy:

—Wiindsón, hõjts ja'a hijxtahñd huuc yaghíxäc ja'a hoy-yagjuøøñbä.

³⁹Mänitä Jesús yhadsooyy:

—Ja'a jäya'ayhajxy jäda'ahatypä, haxøøg hajxy jiatø'oy; cabä Dios hajxy chocy. Ja'a hijxtahñd hajxy mja wi'i yhixaamby. Jagooyyä hajxy jaduhñ mhixa'añ nebiä hijxtahñd jecy quiähxø'quiän ja'a Jonáscøxpä, ja'a Dios jecy quiéjxäbä. ⁴⁰Ja'a ballenajoodooty ja'a Jonás yhiyty tågøøgxøø tågøøgtsuhm. Jadúhñäts høøçh nhidaambä naaxjutjooty tågøøgxøø tågøøgtsuhm, høøçh

ja'a Diosquexypä. ⁴¹Coo ja'a Jonás jaduhñ piädsøømy ballenajoodooty, mänitä Diosmädia'agy hoy yajwa'xy maa ja'a cajpt hänäjty xiøhatiän Nínive. Coo hajxy jim miädooyy, mänit hajxy miäbøjcy. Mänitä yhaxøøgwiinmahñdy hajxy ñajtshixøøyy. Y cabä Jonás mõjtuung hijty jaduhñ jiaty møødä. Maas mõjtuungghøch nmøødä høøçh. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä. Coo jaduhñ yhabáadät coo hajxy hänäjty yajnähdi ja'añii, mänit hajxy ñäma'awa'añii coo hajxy jaduhñ piäda'agøøjät haxøøgtuum. Ja'a jecyjiiäya'ayhajxy jaduhñ mäna'anaamb, ja'a hajxy hijty jegyhajty tsänaabiä Nínive. ⁴²Jaduhñdsä to'oxiøjc miäna'anaambä, ja'a jecy gobiernähájtäbä jäguemnaax ja'a jøømbojmanajpä. Mänitä Salomón hoy miämädoowhity, je'eguiøxpä coo ja'a Salomón hänäjty jiaançh tehñm quiuhwijiä. Y cabä Salomón ja'a mõjtuung hijty jiaty møødä. Maas mõjtuungghøch nmøødä høøçh. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä.

⁴³⁻⁴⁵Ja'a jäya'ayhajxy jäda'ahatypä, haxøøgwiinmahñdy hajxy miøød. Y cooçh nmädia'agy hajxy xquia'a mäbøjçät, maas haxøøg hajxy jaduhñ jiadät. Jaduhñ mäwíinäts hajxy jiadät nebiä jäya'ay mõjcu'umøødpän. Coo ja'a mõjcu'u jii by piädsøømät maa jaaya'ay quiopcän, mänitä poo'xtaact nøcxy jäguemduum yhøxta'ay maa ja'a tø'ødsnäghapän. Coo ja'a

poo'xtaact jim quia'a páadät, mänit miäna'ana'añ: “Mejor nnä'ägä nɔcxtägáchhøch maaçh nhuuc tsohm̄bän.” Coo jaduñ wyiimbídät, mänitä jäya'ay quiopc jaduñ piáatät nebiä yajwa'adstøjcän, ja'a yajxón tøø pie'edyíjábä. Mänitä jiamiøød nɔcxy juxtujc jiaac woy, ja'a maas haxøøgpä. Mänit hajxy nägøxiä tiägø'oy maa jaaya'ay quiopcootiän. Y maas haxøøg jaaya'ay jaduñ jiada'añ quejee hijty yhity.

⁴⁶ Jimnä ja'a Jesús ja'a cu'ug hänäjty miøødmädia'agyñä, mänitä tiajhajxy miejch møødä piuhya'ayhajxy. Jim hajxy miähmøøyy tøba'am. Ja'a Jesús hajxy hänäjty miøødmädia'agaamby.

⁴⁷ Mänitä Jesús hoy ñäma'ayii: —Xiidsä mdaj xmiøødmädia'aga'añ tøba'am møødä mbuhya'ayhajxy.

⁴⁸ Mänitä Jesús yhadsooyy: —Pøñhøch ndajhajpy; pøñhøch nbuhya'ayhajpy.

⁴⁹ Mänitä jiamiøød ñädsiiwøøyy. Mänit miänaañ:

—Høøch ndaj yø'ø; høøch nbuhya'ay yø'ø. ⁵⁰ Pøñhøch ja'a nDeedy miädia'agy xquiudiúunäp ja'a tsajpootypä, jaduñ mäwíinäts hajxy je'e nébiøch nbuhya'ayän, nébiøch nbuhdo'oxiän, nébiøch ndajján.

13 Mänitxøø ja'a Jesús jim chohñ tøgooty. Mänit jim miejch mejypia'a. Hoy jim yhänaaguiäda'agy. ² Mänitä jäya'ay may miejch maa ja'a Jesús hänäjtiän. Mänitä Jesús tiägøøyy barcojooty. Hoy jiiyb yhøxta'agy. Cøjxä jäya'ayhajxy jim miähmøø'oy pu'uwiiing. ³ Mänitä

Jesús tiägøøyy yajnähihøøbiä madiu'u. Mäbaadyhaam jaduñ yajnähihøøyy. Mänit miänaañ: —Mänitä jäya'ay tu'ug tiu'ubøjcy niippä. ⁴⁻⁸ Coo ja'a tøømd tiägøøyy wøjpä, näje'e ja'a tøømd quiahy tu'haam, näje'e quiahy tsaanähgøxp, näje'e quiahy haptiooty, näje'e quiahy maa ja'a hoñaaxän. Ja'a jim cáhwäbä tu'haam, yajpädø'c ja'a muuxyhajxy je'e. Ja'a jim cáhwäbä tsaanähgøxp, paquiä jaduñ jia mujxy, je'eguiøxpä coo ja'a naax quia'a jaty cøøcä. Coo quiøxxøø'øøyy, mänitä tiøøch, coo ja'a tyicts hänäjty quia'a møødä. Ja'a cáhwäbä haptiooty, ja mujx jaduñ. Ja yee'c jaduñ, pero cabä ñä'a tøømbejty. Hix, ja'a hapy je'e xaam. Y ja'a cáhwäbä maa ja'a hoñaaxän, may jaduñ tiøømhajty, näje'e mägo'xhaam, näje'e tægøøghii'xhaam, näje'e hii'xmajc-haam. ⁹ Pøñ jaduñ wiinjuøøby, weenç hädaa nmädia'agy xmiäböjçä.

¹⁰ Mänitä Jesús ñämejtsä ja'a jiamiøødhajxy. Mänit miäyajtøøwä: —Tii ja'a cu'ug coo myajnähihøø'oy yajmäbaadyhaam.

¹¹ Mänitä Jesús yhadsooyy: —Tøø mijts ja'a Dios xyajwiinjuøø'oy nebiaty yhane'emy. Cab hijty yajwiinjuøø'oy. Y yø'ø cu'ughajxy, cab hajxy hoy wyiinjuøø'owa'añ. ¹² Pøñ madiu'u jaduñ møød, maas may jaduñ mio'owa'añii. Pero pøñ weeñtiä møød, pøgáanäxäp je'e mäduhñtiä jim miøødä. ¹³ Páadyhøch jaduñ nmädia'agy yajmäbaadyhaam. Jia wi'i yhee'py hajxy, cab hajxy tii yhixy. Jia wi'i miämädoowhijpy

hajxy, cab hajxy wyiinjuø'øy, neby hajxy tii quia'a mädoybän.

¹⁴Tøjjajp jaduhñ

yø'øya'aguiøxpahajxy nebiä Isaías jecy miänaañ, ja'a hijty jegyhajty wädijpä Diosquexy:

Mmädowaamby hajxy jaduhñ,
cab hajxy mwiinjuø'øwa'añ;
Mheebaamby hajxy, cab hajxy mhixa'añ.

¹⁵Tøø hädaa jäya'ayhajxy quiuhxexy;

nebiä cuhnatpän, nebiä wiimbi'idspän hajxy jaduhñ
ñibiäda'agyii neby hajxy jaduhñ quia'a wiinjuø'øwät,
nébiøch nmädia'agy hajxy xquia'a määbøjcät.

Coočh nmädia'agy hajxy xmiäbøjcät,
mänitøch hajxy jaduhñ nyajnähwá'adsät.

¹⁶Jootcujc jaduhñ mhity je'eguiøxpä coo hajxy jaduhñ mhixy, coo hajxy jaduhñ mmädoy.

¹⁷Tøyhájthøch mijts nnäma'ay, may ja'a Diosquexy pähajxy, may ja'a hojiäya'aybähajxy jia hixaañ nej mijts cham mhixiän. Jia mädowaan hajxy nej mijts cham mmädoyyän.

¹⁸Huuc mädo w hajxy waamb ja'a niippä cwieento miädia'agytiägø'øy.

¹⁹Näje'e ja'a jäya'ayhajxy, coo ja'a Diosmädia'agy hajxy miädoy nebiä Dios yhane'emiän, cab hajxy wyiinjuø'øy. Mänitä Diosmädia'agy hajxy piøjcäxä ja'a møjcu'ugong. Jaduhñ mäwiiñäts hajxy je'e nebiä tøømd quiahyyän tu'haam.

²⁰⁻²¹Näje'e ja'a Diosmädia'agy hajxy hamuumdu'joot yhuuc ja määbøcy. Pero coo hajxy chaächtüüii ja'a Diosmädia'aguyiøxpä, mänit hajxy

piädsøømnä. Jaduhñ mäwiiñäts hajxy je'e nebiä tøømd quiahyyän tsaanähgøxp. Paquiä jaduhñ tiø'øch je'eguiøxpä coo ja'a tyicts quia'a hity. ²²Näje'e ja'a Diosmädia'agy hajxy yhuuc ja mädoy. Pero jiaančh tehñ jiahmiejchp hajxy jaduhñ hädaa yaabä naaxwiimbä. Jiaančh tehñ yhadsojpy ja'a xädø'øñ hajxy, paadiä Diosmädia'agy hajxy hoy quia'a panøcxa'añ. Jaduhñ mäwiiñäts hajxy je'e nebiä tøømd quiahyyän haptiooty. ²³Näje'e ja'a Diosmädia'agy hajxy hoy wyiinjuø'øy. Hoy hajxy jaduhñ pianøcxy hamuumdu'joot. Jaduhñ mäwiiñäts hajxy je'e nebiä tøømd quiahyyän hoñaaxooty.

²⁴Mänitä Jesús tiägøøguiumbä mädiaacpä yajmäbaadyhaam: —Coo ja'a Dios yhane'emy, jaduhñhöch nyajmäbaada'añ nebiä tuljäya'ay hodiøømd tøø wiøjjiäbän maa ja'a ñaaxän. ²⁵Mänitcoods hajxy quiøxy maaho'cy. Mänitä miädsip ja'a cizañatøømd hoy wiøjy maa ja'a trigotøømd hänajty tøø wiøjjiän. ²⁶Tu'cuहुdujt ja'a trigo miujxy mөөdä cizaña. Coo ja'a trigo xiäbaajøøyy, mänitä cizaña quiähxø'pä. ²⁷Mänitä jäya'ay hoy ñäma'ayijäm ja'a mioonsähajxy: “Wiindsøn, hodiøømd miich mwøj, túhmäts. Pämaadä yø'ø cizañahujts tøø choon.” ²⁸Mänitä wyiindsøn miänaañ: “Nmädsiphøchäda'ajaduhñ tøø jiatcø'øy.” Mänitä mioonsä miänaañ: “Nej, nõcxäp højts yø'ø cizañahujts nwixiä.” ²⁹Mänitä wyiindsøn miänaañ: “Caj, cab hajxy mwixät coo ja'a trigo jaduhñ nä'ä määdø'øgø'øwät. ³⁰Ween yhity; ween tu'cuहुdujt

yeegy. Coo ja'a trigopux jaduhñ yhabáadät, mänítöch nmoonsä nguexa'añ, weenä cizañahujts hajxy jayöjp quiöxy yajpädø'ogy. Ween hajxy quiöxy haxoch. Mänít hajxy jaduhñ nõ'ogät. Mänitä trigo hajxy ñähmädsät. Mänit hajxy piädá'agät tsehxooty."

³¹Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduhñhöch nyajmäbaada'añ nebiä mostazapajcän. Jim tu'ljäya'ay tøø ñi'iby maa ja'a ñaaxän. ³²Tøyhajt jaduhñ coo ja'a mostazapajc jiaanč tehñ chayyá. Pero coo yeegy, cruty jaduhñ jiaty nebiä quepychaajän. Mädyöyá ja'a muuxyhajxy nõcxy jim mia'ay yhaajiooty.

³³Mänitä Jesús miänáangumbä yajmäbaadyhaam:

—Coo ja'a Dios yhane'emy, jaduhñhöch nyajmäbaada'añ nebiä to'oxiöjc ja'a tsajcaagychooy yajmädijø'oyäbän harinajooty tægøøgquixøhñdy. Mänit jaduhñ cøxiä yajmäyäbicø'oy.

³⁴Jaduhñä Jesús ja'a cu'ug yajnähiçøoyy haagä yajmäbaadyhaam. ³⁵Jaduhñds tiøjiajty nebiä Diosquexypä jecy quiujahyyän:

Mäbaadyháamhöch
nmädia'aga'añ.

Nyajcähxø'ogáambiöch mädyiijaty hánajty yu'uçhtiuum hijp mänaa hädaa yaabä naaxwiin yhawijy tiøøxta'aguiän; cahnä quiähxø'ogyñä.

³⁶Mänitä Jesús ja'a cu'ughajxy quiejxwiimbijty. Mänit tiøjtägøoyy. Mänit ja'a jiamiøødhajxy miejch. Mänitä Jesús hajxy ñämaayy:

—Højts capxwíjjäc ja'a cizañahujtsçøxpä.

³⁷Mänitä Jesús miänaañ:

—Høøch ja'a Diosquexypä, jaduhñ mäwíinhöch høøch nebiä jaaya'ay hodiøømd tøø wiøjjiäbän. ³⁸Y hädaa yaabä naaxwiin, jaduhñ mäwíinäts hädaa nebiä naaxän maa ja'a hodiøømd wiøjjiän.

Jaaya'ayhajxy hanéhmbä ja'a Diösäm, jaduhñ mäwíinäts hajxy je'e nebiä hodiøømdän. Jaaya'ayhajxy hanéhmbä ja'a mõjcu'ugong, jaduhñ mäwíinäts hajxy je'e bā nebiä cizañahujtsän. ³⁹Y ja'a mõjcu'ugong, jaduhñ mäwíinäts je'e nebiä jaaya'ay ja'a cizañahujts tøø wiøjjiäbän. Coo ja'a naaxwiimbä wyiimbida'añ, jaduhñ mäwíinäts je'e nebiä trigo hajxy yajpädø'quiän møødä cizañahujts. Y ja'a Dios ja'a mioonsähajxy tsajpootypä, jaduhñ mäwíinäts hajxy je'e nebiä jaaya'ay ja'a trigo hajxy yajpädø'quiän.

⁴⁰Coo ja'a naaxwiimbä jaduhñ wyiimbida'añ, jaduhñ mäwíinäts je'e nebiä cizañahujts hajxy ñø'quiän.

⁴¹Mänítöch nmoonsä nhane'ema'añ coo hajxy ween nõcxy yajpädsømy pønjaty ja'a haxøøgwíinmahñdy møød, møødä pønjaty jaduhñ ja wi'i yhadugaamb ja'a Diosmädia'agy. Jim hajxy yajpädsøma'añii maačh hánajty nhane'ema'añän, høøch ja'a Diosquexypä. ⁴²Mänit hajxy hánajty quiujuipø'owa'añii jøønjooty. Jiiby hajxy jiø'owa'añ xiuuds'añ.

⁴³Ja'a hajxy jaduhñ howiädijpā, jaanč tehñ miøj jaanč tehñ jiaanč hajxy yhida'añ maa ja'a Tieedyhajxy yhane'ema'añän. Pø jii mmädohndhajxy, mmädowäp hajxy jaduhñ.

44' Coo ja'a Dios ja'a miäjaa yajcähxø'øga'añ, jaduñ mävīnāts je'e nebiä jäya'ay maxiädø'øñ tiajø'øyäbän naaxpa'c. Coo pøn piädät, mänitā tiajøödiägatsa'añ. Xoonäda'agaamb jaduñ. Mänit nøcxy tioogy tijaty jim miøød. Mänitā naax nøcxy jiuu maa ja'a maxiädø'øñ tøø piaadiän.

45' Coo ja'a Dios ja'a miäjaa yajcähxø'øga'añ, jaduñ mävīnāts je'e nebiä perlatsaahajuubiän, ja'a jaanč tehñ yajxonbä. Ja'a perlatsaa, pic je'e møød pioobä.

46' Coo jaduñ tu'ug piädät jaanč tehñ chowbä, mänit nøcxy tioogy tijaty jim miøød. Mänitā perlatsaa nøcxy jiuu.

47' Coo ja'a Dios ja'a miäjaa yajcähxø'øga'añ, jaduñ mävīnāts je'e nebiä hacxjohm̄d hajxy piädá'aguiäbän mejjiooty coo hacx hajxy hānajtj jiooma'añ madiu'u. 48' Coo ja'a hacxjohm̄d jaduñ yhúdsät, mänit hajxy yhøxwohm̄bädsømy. Mänitā hacx hajxy wyiimbij ja'a hojiatypä. Mänit hajxy piäda'agy cachjooty. Mänitā ca'a hojiatypä hajxy ñøøga'adsø'øy. 49' Jaduñ mävīnāts jiaada'añ coo ja'a naaxwiimbä wyiimbida'añ. Mänitā Dios ja'a mioonsähajxy wyiimbiwa'añ ja'a hojiäya'aybä. 50' Pøn ca'a hojiäya'ay, je'e hajxy cujuipø'øwāāñp̄ jøønjooty. Jiiby hajxy jio'øwa'añ xiuudsä'añ.

51' Mänitā Jesús miānaañ:

—Nej, mwīnjuøøby hajxy jaduñä.

Mänit hajxy yhadsooyy:

—Wiindsøn, nwiīnjuøøby hōjts jaduñ.

52' Mänitā Jesús miānāngumbä:

—Coo ja'a ley-yajnähixøøbiähajxy tiägø'owät habøjpä nebiä Dios yhane'emiän, mejtstu'u ja'a mädia'agy jaduñ jiaada'añ møødä jecypiä møødä jembybiä. Jaduñ mävīnāts je'e nebiä cudøjc madiu'u miøødhātiäbän, møødä jembybiä møødä jecypiä.

53' Coo ja'a Jesús jaduñ miädiaacpādøøyy, mänit jim chohñ. 54' Mänit miehch maa ja'a yhamdsoo cajptän. Mänit tiägøøyy yajnähixøøbiä tsajtøgooty. Mänitā jäya'ayhajxy jiaanč tehñ yagjuøøyy. Mänit hajxy miānaañ:

—Maa yø'ø wiīnmahñdiäda'a tøø yhabøcy. Nebiä hoy-yagjuøøñājatypä jaduñ yajcähxø'øgy. 55' José yhuung yø'ø, yø'ø tsejtspä pujxpä. María ja'a tiaj xiøhаты. Juele piuhya'ayhajxy xiøhаты, Jacobo, José, Simón, møødä Judas. 56' Yaa hajxy chāna'ay maa hōjts ngajptän møødä piuhdo'oxyhajxy. Pāmaadä yø'ø wiīnmahñdy yø'øduhm̄bä tøø yajtsooñ.

57' Mänitā Jesús miädia'agy quia'a mabøjcäxa. Mänitā Jesús miānaañ: —Homiaajä ja'a Diosquexy wiädity, cumāayypä jaduñ. Pero cab jim quiumayii maa yhamdsoo naax maa yhamdsoo tøjcän.

58' Cabä Jesús ja'a hoy-yagjuøøñājatypä jim jiaty yajcähxø'cy, je'eguiøxpä coo ja'a miädia'agy hānajtj quia'a mabøjcäxa.

14 Mänitā Herodes miädoyhajty coo ja'a Jesús hānajtj jim wiädity. Ja'a Herodes, jim hānajtj je'e guiobernadorhаты Galileanaaxooty. 2' Mänitā Herodes ja'a mioonsä ñāmaayy:

—Juan mäyajnäbejpäda'a je'e. Tøøda'a jiuypioocy. Paadiä möcmäjaa jiaanč teh̄m miøødä. ³⁻⁴Tøø ja'a Herodes ja'a Juan hänajty yajtsumyii. Tøø ja'a Juan hänajty quio'øxočhii cadenahaam. Paadiä Juan jaduħn chuumā coo ja'a Herodes hänajty tøø ñäma'ay coo jaduħn quia'a hoyyā coo ja'a Herodes ja'a piuhya'ay tio'oxiøjc miøødtsänāayyāt. Jue'e ja'a Herodes piuhya'ay hänajty xiøhaty, Felipe. Jue'e ja'a Felipe tio'oxiøjc hänajty xiøhaty, Herodías. ⁵Jaduħnä Herodes hänajty tiajy miay coo ja'a Juan hänajty yagho'oga'añ. Pero jaanč teh̄m chähgøøby ja'a Herodes hänajty. Ja'a cu'ug hänajty chähgøøby je'eguiøxpä coo ja'a cu'ughajxy hänajty miäna'añ coogä Juan ja'a Diosmädia'agy hänajty yajwa'xy.

⁶Mänitä Herodes jiumøjt jaduħn piejtä. Jimä Herodes hänajty yhäñ'a'y møødä pawoy pawichpähajxy. Mänit hajxy tiägøøyy wiinhéjtsäbä. Ja'a Herodías yhuung jaduħn tägøøyy hejtspä. Mänitä Herodes xioøn̄daacy nägø'ø nädecypiä. ⁷Mänitä Herodes ja'a quixy yajwiinwaanøøyy:

—Hotyijä miich xmiäyujwá'anät, nmó'owäbøch miich jaduħn.

⁸Mänitä quixy ja'a tiaj hoy yhawaanä. Mänitä tiaj jaduħn miänaañ coo ja'a Juan mäyajnäbejpä quioocy jaduħn miäyujwá'anät. Mänitä quixy ja'a Herodes hoy ñäma'ay:

—Høøchä Juan mäyajnäbejpä quioocy móoyyāc texyjooty.

⁹⁻¹⁰Mänitä Herodes jiootmädiägøøyy nägø'ø nädecypiä.

Pero tøø hänajty miäna'añ jäya'awyyiinduum coog hänajty yega'añ hotyijatiä. Mänit yhaneħmy coo ja'a Juan quioocy yøxpújxäxät jiiłby pujxtøgooty. ¹¹Mänitä Juan quioocy yajnöcxäxä texyjooty maa ja'a Herodeshajxiän. Mänitä quixy miooyyā. Mänitä quixy ja'a tiaj hoy mio'oy.

¹²Mänitä Juan ñäxäwa'ay yo'tuc hoy quioøyyäxä; ja'a Juan miägu'ughajpähajxy jaduħn hoy quio'øy. Mänitä Juan hajxy hoy yajnaaxtägø'øy. Mänitä Jesús hajxy hoy yhawaanä cooc ja'a Juan hänajty tøø yagho'ogyii.

¹³Coo ja'a Jesús jaduħn miädoyhajty cooc ja'a Juan tøø yagho'ogyii, mänit jim choħñ barcojooty nidiuhm. Mänit ñøcxy hanidiuhmduum. Mänitä cu'ughajxy miädoyhajty cooc ja'a Jesús hänajty jim tøø chooñ. Mänitä Jesús hajxy piadu'ubøjcy cajptooty. Tegy-yo'oy hajxy pianøcxy. Jayøjp hajxy jim miejch maa ja'a Jesús hänajty ñøcxiän. Mänitä Jesús piamejch høxhaam. ¹⁴Coo ja'a Jesús piädsøømy barcojooty, mänitä majiäya'ay yhiijxy. Mänit ñäxuu'ch. Mänitä pa'amjäya'ay yajmøcpøjcy. ¹⁵Mänittsuu ja'a Jesús miägu'ughajpähajxy piamejch. Mänitä Jesús hajxy ñämaayy:

—Tøø chuujø'øy y cabä tøjc yaa. Quejxwiimbit yø'ø jäya'ayhajxy; weenä caagy hajxy nøcxy jiuyc cajptooty.

¹⁶Mänitä Jesús miänaañ:

—Caj, ween hajxy yhity. Mijts jaduħn ween myajcäyāt.

¹⁷Mänit hajxy yhadsooyy:

—Cab højts tii nmøødä. Jagooyyā højts ja'a tsajcaagy mägooyyā nmøødä chaadsä hacx metscä.

¹⁸Mänitā Jesús miānaaṅ:

—Māminxā yø'ø.

¹⁹Mänitā Jesús ja'a majiäya'ay
ñāmaayy coo hajxy ween
yhøxta'agy møøwyiing. Mänitā
tsajcaagy quiøøchooyy møødä hacx.
Mänit yuughee'py cøxp. Mänit
miānaaṅ:

—Dioscujú'uyäp.

Mänitā Jesús ja'a tsajcaagy
yhaguidøoyy. Mänitā
miägu'ughajpähajxy miooyy.
Mänit hajxy hoy yajwa'xy
majiäya'ayhagujc. ²⁰Nägøxiä
hajxy jaduḥñ quiaaay cu'uxiä.
Mänitā Jesús miägu'ughajpä
tsajcaagyhagujc hajxy yajpäðø'cy
majmejtscach. ²¹Nämägooxmil
hajxy quiaaay haagä ya'adiøjc.
Hawiingä to'oxiøjc-hajxy møødä
pigäna'c-hajxy.

²²Mänitā Jesús ja'a miägu'ughajpä
ñāmaayy coo hajxy ween tiägø'øy
barcojooty, coo hajxy ween
ñøønajxø'øgy. Mänitā Jesús ja'a
majiäya'ayhajxy quiejxwiimbijty.

²³Mänitā Jesús ñøcxy nidiuhḥ
tunñähgøxp Diospa'yaaḥpä. Coo
quioodsøoyy, jimnä Jesús hänajty
nidiuhḥ tunñähgøxp. ²⁴Ja'a
Jesús ja'a miägu'ughajpähajxy,
mejyquuijc hajxy hänajty tøø
miech barcojooty. Møc hajxy
hänajty jiojcubojo'øy; paadiä
nøø hänajty miøjjädsembejty
barcomøjc. ²⁵Coodsnä Jesús
tiu'ubøjcy tecy-yo'oy. Mejywyiing
jaduḥñ yohy. Mänit miejch maa
ja'a miägu'ughajpähajxiän. ²⁶Coo
ja'a Jesús hajxy yhijsy coo hänajty
yo'oy mejywyiing, mänit hajxy
chähgøbiøjcy. Mänit hajxy
chähgø'øyaaxy:

—Haañämäda'a yø'ø.

²⁷Mänitā Jesús miānaaṅ:

—Ca'a hajxy mdsähgø'øy. Høøch
ja'a Jesús.

²⁸Mänitā Pedro miānaaṅ:

—Wiindsøn, pø miich ja'a Jesús,
høøch huuc hanéhmäc coöch jim
mnøcxät yo'oy maa miichän.

²⁹Mänitā Jesús yhadsooyy:

—Minxä.

Mänitā Pedro piädsøomy
barcojooty. Mänit tiägøoyy yohbiä
mejywyiing. Jim hänajty ñøcxa'añ
maa ja'a Jesúsän. ³⁰Coo jiäwøoyy
coo møc piojy, mänit chähgøbiøjcy.
Mänit tiägøoyy quiimbä. Mänit
yaaxy:

—Wiindsøn, høøch yajpädsøømäc.

³¹Mänitiä ja'a Jesús ja'a Pedro
quiø'ø miajtsä. Mänit miānaaṅ:

—Caj miich mhuuc mäbøjpä. Tiich
nmädia'agy coo xquia'a mäbøjca.

³²Coo ja'a Jesús tiägøoyy
barcojooty møødä Pedro, mänitā
poj yuungøoyy. ³³Mänitā Jesús
hajxy wyiinjiçädaacy. Mänitā Jesús
hajxy ñāmaayy:

—Tøyhajt miich mDioshuungä.

³⁴Mänit hajxy miejch
mejyhawiimb maa hänajty
xiøhatiän Genesaret. ³⁵Coo ja'a
Jesús yhøxcapjä ja'a jäya'ayhajxy
jimbä, mänitā mädia'agy
tiägøoyy wädijpä coo ja'a Jesús
jim tøø miech Genesaret. Mänitā
pa'amjäya'ayhajxy may yajmejtsä
maa ja'a Jesúsän. ³⁶Mänitā Jesús
hajxy miänuu'xtaacy coo ja'a
wyitpa'a hajxy ween ñähdoonä.
Coo hajxy jaduḥñ ñähdoon, mänit
hajxy miøcpøjcy.

15 Mänitā Jesús nämejtsä ja'a
fariseoshajxy näje'e møødä

ley-yajnahixøobiähajxy näje'e.
 Jerusalén hajxy hänäjty chooñ.
 Mänitá Jesús hajxy miäyajtøoyy:
 2—Yø'ø mmägu'ughajpähajxy,
 tii ja'a cuhdujt hajxy coo quia'a
 cudiuñ nebiä jecyjiäya'ayhajxy
 xyajmämähmøøyyäm. Ja'a
 jecyjiäya'ayhajxy, cø'øbujp hajxy
 hijty coo hajxy hänäjty quiaya'añ.
 Jaduhñ hajxy hijty quiuhdujthaty.
 Pero yø'ø mmägu'ughajpähajxy, cab
 hajxy jaduhñ quiuhdujthaty.

3Mänitá Jesús yhadsooyy:
 —Pero mijts, cabä Dios
 miädia'agy hajxy myajtuunä.
 Ja'a mhamdsoo cuhdujt hajxy
 myajtuumby. 4Ja'a Dios jaduhñ
 mänaañ coo ja'a ndaj ndeedy hajxy
 nwiingudsähgøøyyämät. Jaduhñ
 miänaambä, coo pøn ja'a tiaj ja'a
 tieedy haxøøg ñänømä, tsipcøxp
 jaduhñ yho'oga'añ. 5-6Pero wiing
 mijts mmänaambä. Mijts jaduhñ
 mänaamb coo jaduhñ yhooyä
 coo ja'a mdaj ja'a mdeedy jaduhñ
 mnämá'awät: “Cábøchä xädø'øñ
 nmøødä cooçh mijts nbuhbédät.
 Tøøchä Dios ngøxy mo'oy
 mäduhñtiä mijts hijty nmo'owa'añ.”
 Coo hajxy jaduhñ mmäna'añ, cabä
 Diosmädia'agy hajxy hänäjty
 myajtuñ. Ja'a mhamdsoo cuhdujt
 hajxy hänäjty myajtuumby.
 7Jaduhñ mäwíinäts mijts
 mnibiäda'agyii nebiä hoyhäna'cän.
 Pero cab hajxy mhoyhäna'cä.
 Mijtsøxpä ja'a Isaías Diosquexypä
 jecy miänaañ:

8Nä'ä mänaamb hajxy jaduhñ cooc
 tyijy hajxy xwyiingudsähgø'øy
 hamuumdu'joot.

9Xiøøbä hajxy jaduhñ ñä'ä
 mäna'añ;

cábøch nmädia'agy hajxy xñä'a
 panøcxä.

Yhamdsoo wiinmahñdy hajxy
 yajwiinhixøøby,
 nømä Dios miäna'añ.

10Mänitá Jesús jäya'ay may
 miøjyaaxy. Mänit miänaañ:
 —Huuc mädox hajxy, huuc
 wiinjuø'ow hajxy. 11Mädyiijaty
 tägøøby mhaawjooty, cab
 jaduhñ xyajtägóyyät. Je'eduhñ
 xyajtägóyyäp mädyiijaty pädsøømb
 mhaawjooty.

12Mänitá Jesús ñämaayyä ja'a
 miägu'ughajpähajxy:
 —Cabä fariseoshajxy yhojiäwø'øy
 coo jaduhñ tøø mmäna'añ.

13Mänitá Jesús yhadsooyy:
 —Mädyiijátyhøch nDeedy
 tsajpootypä tøø quia'a päda'agy,
 cab jaduhñ yhojø'owa'añ. 14Weends
 yø'ø fariseoshajxy yhity. Jaduhñds
 hajxy wiädity nebiä Haagä
 wiindspän coo hajxy ñibiawoyii.
 Nämetsc hajxy nøcxy wiocca'ay.

15Mänitá Pedro ja'a Jesús
 ñämaayy:
 —Cab højts ndu'jootwiinjuø'øy.
 Højts capxwíjjäc.

16Mänitá Jesús miänaañ:
 —Nej, ni mijts tii mga'a
 wiinjuø'øyñä. 17Jaduhñds je'e,
 mädyiijaty tägøøby mhaawjooty,
 jiiby jaduhñ yhäda'agy mjoodooty.
 Mänitá jaduhñ piädsøømdägach.
 18Pero mädyiijaty jaduhñ
 pädsøømb mhaawjooty, jiiby
 jaduhñ chohñda'agy mgopcooty.
 Je'eduhñ xyajtägóyyäp. 19Haagä
 jiibiä haxøøgwiiinmahñdy
 chohñda'agy mgopcooty hoñä'a
 mädyiibä. Je'eduhñ xøhajt
 ja'a haxøøgwiiinmahñdy, ja'a

jäya'ay-yagho'ogyiibä, mөөдä meečiibä, mөөд coo wiingjäya'ay tio'oxiöjc mmөөдtsänáayyät, mөөд coo mhөhdä'agät, mөөд coo häna'c haxөөг mnänömät. ²⁰Je'eds jaduhñ xyajtägóyyäp. Pero coo mgáyät jaguiø'öbujy, cab jaduhñ ñejpiä; cab jaduhñ xyajtägóyyät.

²¹Mänitä Jesús jim chohñnä.

Mänit ñөcñnä Canaán maa ja'a cajpt hánajty xiөhatiän Tiro mөөдä Sidón. ²²Mänitä Jesús tadjäya'ay tu'ug ñämejtsä. Jim hánajty chäna'ay Canaán. Mänitä Jesús ñämaayyä:

—Wiindsón, miičh ja'a David hijty mhaphajpy mdeedyhajpy. Hөөčh näxúu'tsác. Tөөčh ndo'oxyhuung miächii ja'a möjcu'u. Hanaxiä jaduhñ chaächtiunii —nөm je'e yaaxy.

²³Cabä Jesús yhadsooyy. Mänitä ñämaayyä ja'a miägu'ughajpähajxy:

—Huuc quejxwiimbit yø'ø tadjäya'ay. Tsaächyáaxäp jaduhñ xpiawädíjtäm.

²⁴Mänitä Jesús yhadsooyy:

—Yáayyөčhä Dios tөө xquiexy maa hädaa judiöshajxiän. Cábөch wiingtuum tөө xquiexy.

²⁵Mänitä tadjäya'ay ja'a Jesús wyiinjiçädaacy. Mänit ñämaayy:

—Wiindsón, tunä mayhajt. Hөөčh puhbéjtäc.

²⁶Mänitä Jesús yhadsooyy:

—Cab jaduhñ yhooyä coočhä huc tsajcaagy nmó'owät mädyii ja'a pigäna'c-hajxy quiayaamby.

Ja'a judiös Jesús yajmäbaat nebiä pigäna'cän. Ja'a ca'a judiöshajxy, je'eduhñ yajmäbaat nebiä hucän.

²⁷Mänitä tadjäya'ay miänaañ:

—Tөyhajt jaduhñ. Pero quiaaby ja'a huc ja'a tsajcaagyhawaagy coo

jim quia'ay maa ja'a wyiindsón ja'a mieexän.

²⁸Mänitä Jesús miänaañ:

—Tөyhajtөch miičh nmädia'agy xmiäböjcä. Weenä mhuung miöcpöcy.

Mänitiä ja'a yhuung jiaančh mөcpöjcy.

²⁹Mänitä Jesús jim chohñnä.

Mänit ñөcñnä maa ja'a mejypia'ajän, ja'a xөhajpä Galilea. Mänit hoy piety tunnähgөxp. Mänit yhөxtaacy.

³⁰Mänitä jäya'ay may miehch maa ja'a Jesúsän, mөөдä pa'amjäya'ay, mөөдä cø'өmucypiä tecymiucypiä, mөөдä wiindspä, mөөдä huumbä. Mänitä Jesús yajmäbaadөoyy.

³¹Mänitä jäya'ayhajxy yagjuөoyy coo hajxy jaduhñ yhijxy coo ja'a huumbähajxy tөө quiapxø'ogy, coo ja'a cø'өmucypiähajxy tөө yhooyø'y, coo ja'a tecymiucypiähajxy tөө yo'oyø'ogy, coo ja'a wiindspähajxy tөө yhixø'ogy. Mänit hajxy miänaañ coogä Dios miөjjä jiaančhä.

³²Mänitä Jesús miөjyaaxy ja'a miägu'ughajpä. Mänit miänaañ:

—Nnäxúu'chpөch yø'öya'ayhajxy. Tägөөgxөjөch hajxy tөө xpiawädity, y cabä caayyөөc hajxy miөөдä. Cábөch hajxy nguejxwiimbida'añ jaguiay maa tiөjcän coo hajxy maa tiu'ugädäwät.

³³Mänitä Jesús ja'a miägu'ughajpähajxy miänaañ:

—Pero maadsä cay hajxy jaduhñ nnä'a páatämät maa yø'öya'aguiөxphajxiän. Pactuumäda'a yaa.

³⁴Mänitä Jesús miäyajtөoyy ja'a miägu'ughajpähajxy:

—Naag tsajcaagy hajxy jii mmөөдä.

Mänit hajxy yhadsooyy:

—Juxtujc, chaadsä hacxhuung mejtstägøøg.

³⁵Mänitä Jesús miänaaṅ coo ja'a jäya'ayhajxy yhöxtá'agät naaxwiin.

³⁶Mänitä tsajcaagy quioondsooy møødá hacxhuung. Mänitä Dios ṅämaayy:

—Dioscujú'uyäp.

Mänitä Jesús ja'a miägu'ughajpä ja'a tsajcaagy hajxy yajnäguidøøyy møødá hacxhuung. Mänit hajxy yajwa'xtägajch maa ja'a jäya'ayhajxiän. ³⁷Mänit hajxy quiaayy cu'uxiä nägøxiä. Mänitä Jesús miägu'ughajpä ja'a tsajcaagyhaguijc hajxy yajpädø'cy juxtujcach. ³⁸Nämädaaxmil ja'a ya'adiøjc-hajxy quiaayy. Pagaayy ja'a to'oxiøjc-hajxypä møødá pigäna'c-hajxy. Pero cab jaduhṅ yajnajuø'øy nanaagä hajxy hānajtj je'ebä. ³⁹Mänitä Jesús ja'a jäya'ayhajxy quiejxwiimbijty. Mänit tiägøøyy barcojooty. Mänit ṅøcxy Magadānaaxooty.

16 Mänitä Jesús ṅämejtsä ja'a fariseoshajxy näje'e møødá saduceoshajxy. Mänitä Jesús ṅämaayy coo hijxtahṅd ween yajcāhxø'øgy jim tsajpootyp. Paady hajxy jaduhṅ miänaaṅ coo ja'a Jesús hajxy hānajtj jia wi'i jiojcapxø'øwa'añ. ²Mänitä Jesús yhadsooyy:

—Coo hānajtj chuujø'øy, mänit hajxy naxxy mmāna'añ: “Wa'ads ja'a tsajt; wa'ads jaboom yhida'añ.” ³Y coo hānajtj jiojø'øy, mänit hajxy naxxy mmāna'añ: “Tøø wyiimbøcy; tu'uwaamb.” Mnajuøøby hajxy jaduhṅ nebiä tsajt yhida'añ, pero cabä hijxtahṅd hajxy mwiinjjuø'øy

ja'açh cha nyajcāxø'piä. Ja'a jäya'ayhajxy jäda'ahatypä, haxøøg hajxy jäya'ayhajnä; cabä Dios hajxy chocy. ⁴Hijxtahṅd hajxy jaduhṅ yujwaamb, pero cab hajxy mio'owa'añii. Jagooyyä hajxy jaduhṅ yaghixa'añii nebiä Jonás jecy jiajty yhabejtian.

Mänitä Jesús jim jäwaach. Mänit jim tiu'ubøjcy.

⁵Mänitä Jesúshajxy miejyñajxy. Pero jiahdiägooyy ja'a quiaayyøøc hajxy, ja'a Jesús miägu'ughajpähajxy. ⁶Mänitä Jesús miänaaṅ:

—Huuc madow hajxy. Cabä fariseos chajcaagychooyhajxy yhooyä, ni ja'a saduceos chajcaagychooyhajxy quia'a hooyä.

⁷Mänitä miägu'ughajpähajxy tiägøøyy mädiaacpä:

—Paady jaduhṅ miäna'añ, coo ja'a caayyøøc hajxy nga'a jahmiejtsäm.

⁸Najuøøby ja'a Jesús hānajtj nebiaty hajxy hānajtj miädia'agy. Mänit miänaaṅ:

—Tii hajxy jaduhṅ coo mwi'i miädia'agy coo ja'a caayyøøc hajxy mga'a møødá. Cábøchä nmädia'agy hajxy jaduhṅ xñä'ägädä mabøjca. ⁹Cāhnøch nmädia'agy hajxy xwyiinjuøøyyä. Cab hajxy jaduhṅ mjahmiejtsnä nébiøch ja'a mägooxpä tsajcaagy nyajnāwa'xøøyyän ja'a nāmāgooxmilpä jäya'ay, y coo hajxy maguiach myajpädø'cy. ¹⁰Ni jaduhṅ hajxy mga'a jahmiejtsnä nébiøch ja'a juxtujpä tsajcaagy nyajnāwa'xøøyyän ja'a nāmādaaxmilpä jäya'ay, y coo hajxy maguiach myajpädø'cumbä. ¹¹Cooçh jaduhṅ nmānaaṅ coo

ja'a fariseos chajcaagychooyhajxy quia'a hoyyā, coo ja'a saduceos chajcaagychooyhajxy quia'a hoyyā, cáboch tsajcaagychooy hānajty ndehm̄ nānōomy. Pero caj mijts mwiinjuōyy.

¹²Mānit hajxy wyiinjuōñā tii Jesús hānajty miādiaacy. Ca'a chajcaagychooyā hānajty tiehm̄ miādiaacy, ja'a hajxy yajtsajcaagyquiojpiā. Jaduh̄n hānajty miādia'agy cooc ja'a fariseos miādia'agyhajxy quia'a hoyyā, cooc ja'a saduceos miādia'agyhajxy quia'a hoyyā.

¹³Mānitā Jesús hajxy jim̄ miehch maa ja'a cajpt hānajty xiōhatiān Cesarea de Filipo. Mānitā Jesús miāyajtōyy ja'a miāgu'ughajpāhajxy:

—Waambátyhøch ja'a cu'ughajxy xñānomy pōnhøch høøch ja'a Diosquexypā.

¹⁴Mānit hajxy yhadsooyy:

—Nāje'e ja'a cu'ughajxy miāna'añ cooc miich mJuan māyajnābejpā; nāje'e hajxy miānaambā cooc miich mhElíasā; nāje'e hajxy miānaambā cooc miich mJeremíasā, ja'a Diosmādia'agy jecy yajwá'xābā; nāje'e hajxy miānaambā cooc miich mDiosquexiā.

¹⁵Mānitā Jesús miānaañ:

—Míjtsāts, wāambøch mijts xñānōombā.

¹⁶Mānitā Simón Pedro miānaañ:

—Miičh je'e ja'a Cristo. Miičh ja'a Dios tøø xquiexy, ja'a jim̄ tsajpootypā. MDioshuung miičh.

¹⁷Mānitā Jesús yhadsooyy:

—Miičh Simón, Jonás miičh xyhuunghajp. Caj miičh pōn̄ tøø xyhawaanā cooçh nDioshuungā.

Ja'a nDéedyhøch tøø xyhawaanā, ja'a jim̄ tsajpootypā. Paady miičh hoyhajt weenhajt mbaada'añ.

¹⁸Miičh jaduh̄n nnāmaaby coo miičh mxøhata'añ Pedro; je'edu'un̄ nānōomby “tsaa.” Miičhcøxpøch ja'a jāya'ay ja'a nmādia'agy hajxy may xmiābøgaanā. Hoy hajxy cu jia ho'og, cab hajxy jaduh̄n quiuhdāgoyya'añ. Cøjxta'axiøø hajxy jim̄ yhida'añ tsajpootyp. ¹⁹Nmo'owāambiøch miičh cuhdujt cooçh miičh nmādia'agy xyajwá'xāt nébiøch ja'a jāya'ay ja'a nmādia'agy hajxy jaduh̄n xmiābøjçät. Dios jaduh̄n xñajtsapxø'owāanāp nebiaty ja'a jāya'ayhajxy mhané'emāt coo hajxy jaduh̄n ween quiudiuñ, coo ja'a yhaxøøgwiiinmahñdy hajxy ñajtshixø'owät.

²⁰Mānitā Jesús ja'a miāgu'ughajpā yhanehm̄y coo hajxy ween quia'a mādia'agy coo je'e Cristo.

²¹Mānitxøø ja'a Jesús tiāgøoyy hawāanābā ja'a miāgu'ughajpāhajxy cooc hānajty jim̄ ñøcxa'añ Jerusalén, cooc hānajty jim̄ yajtsaachpøga'añiijām ja'a martuumädøjc møødä teedywiindsøn̄hajxy møødä ley-yajnahixøøbiädøjc. Mānit miānaambā cooc hānajty yagho'oga'añii, pero cumāaxçäc hānajty jiuypio'oga'añ.

²²Mānitā Pedro ja'a Jesús yajwooduuty. Mānitā Jesús wyiingugapxøoyyā:

—Wiindsøn̄, cab jaduh̄n yhooyyā miābaadā coo jaduh̄n mjädät mhabétät.

²³Mānitā Jesús wia'wiimbijty. Mānitā Pedro yhojjā:

—Jua'ads jim, mɔjcu'u. Náxyhøch miich xjɔjcapxø'oy. Jaduhñ miich mwiiimahñdy nebiä jäya'ayhajxy wyiimahñdyhatiän. Caj miich mwiiimahñdy tiuhñä nebiä Dios wyiimahñdiän.

²⁴Mänitä Jesús nāmaayy ja'a miägu'ughajpä:

—Põnhøch nmädia'agy jaduhñ xpiadu'ubøgáañäp, weenä yhamdsoo cuhdujt ñajtshixø'oy; ween jaduhñ chaachpõjpat nébiøch ndsaaçhpõga'añän; weenç nmädia'agy xjɔjtägøøyyä. ²⁵Põñ yhamdsoo wiimahñdy ja wi'i yaghidaamb, cuhdägoyyaamb je'e. Pero coo pøn jaduhñ yhó'ogät ja'a høøhcøxpä, nä'ägä hodium je'e nõcxy miähmø'owa'añ. ²⁶Coo pøn jaduhñ quiuhdägóyyät, hoy jaduhñ yaa tøø jia mäyøøhaty hädaa yaabä naaxwiin, caj tii piaada'añ. Cabä jjugyhajt jaduhñ piaadaañnä, homiäduhñtiä xädø'õñ cu jia yec.

²⁷⁻²⁸Cädaactägatsáambøch yaa, høøch ja'a Diosquexypä. Ja'a Diosmóonsøch nmøødcäda'agaamby, ja'a hajxy jim tsajpootypä. Møødhøch nDeedy quiuhdujt jaduhñ ngädaactägatsa'añ. Mänitøch ja'a jugyhajt hānajtj njaac mo'owa'añ pønajat hānajtj hoy tøø wiädity. Pero pønajat hānajtj hoy tøø quia'a wädity, je'eds hajxy hānajtj yajcumädownāñäp. Mänitøch ndägø'owa'añ hanehmbä. Tøyhajt mijts nnāma'ay, cooçh hānajtj ngädaactägatsa'añ, mänitøch hajxy näjé'eyyäm xyhixa'añ, ja'a hajxy yaa tänaabiä. Cajnä hajxy hānajtj yho'ogyñä.

17 Cudädujxøø ja'a Jesús ja'a Pedro wioonøcxy

tunnähgøxp møødä Jacobo møødä Jacobo yhuch Juan. Nämädaaxc hajxy jaduhñ ñøcxy møødä Jesús. ²Mänitä Jesús wiing jiajty maa ja'a Pedro wyiinduuhajxiän. Jaduhñdsä wyiin jiojpx çøjx jiaty nebiä haambän. Mänitä wyit hobiaob jiajty. ³Mänitä Moisés hajxy ñäguehxtøø'xy møødä Elías. Mänitä Jesús hajxy tiägøøyy møødmädiaacpä. Coø hajxy yhiixä, ⁴mänitä Pedro ja'a Jesús nāmaayy: —Wiindsõñ, hoyøøyy jaduhñ coo højts yaa tøø nbéjtäm. Pø chojpiä mjoot jaduhñ, ween højts tøjquemyhuung tægøøg nhuuc hädiuñ ja'a mijtsøcøxpä çøjtu'ug; tu'ug miich mjje'e, tu'ug ja'a Moisés jie'e, tu'ug ja'a Elías jie'e.

⁵Mädiaaccujc ja'a Pedrohajxy ñähgädaacpejtä ja'a nāma'a. Hajajp ja'a nāma'a hānajtj. Mänit hajxy miädooyy quiapxy nāma'ajooty:

—Høøch nHuung hädaa; njaanç tehñ chójpiøch. Xyagjootcugøøbiøch. Huuc mädoowä ja'a miädia'agy hajxy.

⁶Coo ja'a Pedrohajxy jaduhñ miädooyy, mänit hajxy miägutscädaacy naaxwiin. ⁷Mänit hajxy ñähdoonä ja'a Jesús. Mänit hajxy nāmaayyä:

—Pädø'øg hajxy; ca'a hajxy mdsähgø'oy.

⁸Mänit hajxy piädø'cy. Mänit hajxy yhiixwädijty. Cab hajxy pøn yhiixy; jagooyyä ja'a Jesús hajxy nidiuhñ yhiixy.

⁹Mänit hajxy miänajcy tunnähgøxp. Mänitä Jesús ja'a Pedro nāmaayy:

—Cab hajxy pøn mhawāñät nebiaty hajxy jim tøø mhixy

tunnähgøxp, høxtä cónøch hänäjty tøø njujypiøjtägach, høøch ja'a Diosquexypä.

¹⁰Mänitä Jesús hajxy miäyajtøøyy: —Yø'ø ley-yajnahixøøbiädøjc, tii hajxy coo miäna'añ cooc ja'a Elías miejtsø'øga'añ.

¹¹Mänitä Jesús yhadsooyy: —Tøyhajt jaduhñ coo ja'a Elías hijty miejtsø'øga'añ. Mänit hijty cøxiä wiinä yaghoyø'owa'añ. ¹²Pero mijts jaduhñ nnämaaby coo ja'a Elías tøø jia hoy; pero caj yhøxcajpä. Jaduhñ tiuunä nebiä jäya'ay jioothajxy chojquiän. Jaduhñch hajxy xhaačhtiuuaambä, høøch ja'a Diosquexypä.

¹³Mänitä Pedrohajxy wyiinjuøøñä coo ja'a Jesús ja'a Juan mäyajnäbejpä hänäjty miädia'agy.

¹⁴Mänitä Jesús hajxy miejch maa ja'a jäya'ayhajxy miayyän. Mänitä tu'jäya'ay ja'a Jesús wyiinjičädaacy. Mänitä Jesús ñämaayyä:

¹⁵—Wiindsón, høøch nhuung näxúu'tsác. Mayhooc jaduhñ tøø quíaday pojmoød. Hanaxiä jaduhñ chaachpøcy. Naxy jiøøngädawø'øy; naxy ñøøgädawø'øy. ¹⁶Yaač tøø nja yajmech maa miič mmägu'ughajpädøjcän, pero cab hajxy hijty yajnahwa'adsa'añ.

¹⁷Mänitä Jesús miänaañ: —Caj mijts mnä'ägä mabøcy. Cábøch nmeex'tugaannä cooçh mijts njaac møødhídat. Mämín ja'a pigäna'c yaa.

¹⁸Mänitä Jesús ja'a mõjcu'u hojy. Mänitiä ja'a pigäna'c ñähwaach.

¹⁹Mänitä Jesús hawiing ñämaayyä ja'a miägu'ughajpädøjc. —Tii højts ja'a mõjcu'u hijty coo nga'a yajpädsøma'añ.

²⁰Mänitä Jesús yhadsooyy: —Caj mijts hijty mnä'ägädä mabøcy. Tøyhajt mijts nnäma'ay, coo hajxy jaduhñ mmäbögät howieeñtiä, mänit hajxy hotyijä mjádät. Høxtáhmäts yø'ø tun, coo yø'ø tun hajxy mnämä'awät: “Jua'ads jim, nõcx wiingtuum”; mänitäts yø'ø tun jiaanč jäwá'adsät. Hotyijä hajxy jaduhñ mjádät coo hajxy tøyhajt mmäbögät. ²¹Mänitä mõjcu'u hajxy myajpädsømat coo ja'a Dios hajxy mba'yá'axät, coo hajxy mhamajtsch-hádät.

²²Jimä Jesús hajxy hänäjty wiädity Galileanaaxooty. Mänitä Jesús miänaañ:

—Xyajcø'ødägø'owáambøch ja'a cu'ughajxy, høøch ja'a Diosquexypä. ²³Mänitøch hajxy xyagho'oga'añ. Pero cudägøøgxøøch njujypiøjtägatsa'añ.

Mänitä miägu'ughajpädøjc-hajxy jiootmadiägøøyy.

²⁴Mänitä Jesús hajxy miejch Capernaum. Mänitä Pedro miäyajtøøwä ja'a yajnahjuudiuutpädøjc: —Nej, cabä mwiindsønhajxy ñähjuudiu'udy maa ja'a tsajtøjcänä.

²⁵Mänitä Pedro yhadsooyy: —Ñähjuudiuutyp pues. Mänitä Pedro tiøjtägøøyy maa ja'a Jesús hänäjty yhäñ'ayän. Mänitä Jesús ja'a Pedro ñämaayy: —Simón, nej miich mmäna'añ, ja'a gobiernahajxy, pøn hajxy yajnahjuudiuutyp, yhamdsoo cu'ug, tøgä wiingjäya'ay.

²⁶Mänitä Pedro yhadsooyy: —Wiingjäya'ay hajxy yajnahjuudiuutyp.

Mänitá Jesús miánaañ:

—Entonces, cabá yhamdsoo cu'ug hajxy yajnáhjuudiu'udy. ²⁷ Pero cábøch pøn nyagjootma'ada'añ. Nøcx mejypia'a. Jiibiä xuhñdy mnøøwobø'øwät. Coö hacx mxúyät, mänit myajpädsømat. Jiibiä xädø'øn mbaada'añ hacxhaawjooty. Mädyhadaamb jaduhñ coö nämetsc nyajniñhjuudiúutämät. Mänitáts nøcxy mnähjuudiu'udy.

18 Mänitá Jesús miägu'ughajpädøjc-hajxy miejch maa ja'a Jesús wyiinduumän. Mänitá Jesús miäyajtøwä:

—Pønjaty ja'a mõjtuung mõød maa ja'a Dios yhane'emiän.

² Mänitá Jesús ja'a pigäna'c tu'ug miøjyaaxy. Mänitá pigäna'c cujc piädaacä. ³⁻⁴ Mänitá Jesús miánaañ:

—Ja'a pigäna'c-hajxy, cabá mõjtuung hajxy ñiyhøxtáayyäxä. Pøn ja'a mõjtuung yaa ñiyhøxtáayyäxäp hädaa yaabä naaxwiin, cab jim tiägø'øwa'añ maa ja'a Dios wyiinduumän. Pero pøn ja'a mõjtuung jaduhñ ca'a høxtaaby, nebiä hädaa pigäna'c jaduhñ quia'a høxta'ayän, je'eds ja'a mõjtuung jaduhñ jim paadaamb maa ja'a Dios yhane'emiän. Tøyhajt jaduhñ. ⁵ Pøn jaduhñ mägu'ugpøgäp hädaa pigäna'c jaduhmbä maa ja'a høøchcøxpän, jaduhñ mäwíinhøch høøch xmiägu'ughaty.

⁶ Hädaa pigäna'c-høch nmädia'agy hajxy xmiäbøjcäbä, coö hajxy pønjaty jiojcapxø'øwøøjät, maas hoy hit jaduhñ coö ja'a mäjøjcapxøøbiä paan yajyo'xodsø'øwøøjät y coö miejjiäwipø'øwøøjät hagomduum.

⁷ Hanaxiä hajxy yaa chaaçhpøcy ja'a hajxy hädaa yaabä naaxwiin tsänaabiä. Paady hajxy chaaçhpøcy coö ja'a jøjcapxøøbiä hajxy piaady. Pero Dios jaduhñ yajcumädowaamb ja'a mäjøjcapxøøbiä.

⁸⁻⁹ 'Coo tii hoyhadsojnä mhíxät, cab jim mmøjhée'pnät ni mga'a nähdonät. Jaduhñ mnibiäda'agøøjät nebiä wiindspän, nebiä cø'øducpäñ. Pø caj, jim haxøøgtuum mga'awa'añ.

¹⁰ 'Ca'a yø'ø pigäna'c hajxy mxøøghaty. Cueendähjätöp hajxy jaduhñ. Ja'a Diosmoonsähajxy ja'a Dioswiinduumbä, je'edsä pigäna'c hajxy cueendähajp. ¹¹ Høøch mõjhajp. Yaaçh tøø ngäda'agy hädaa yaabä naaxwiin nébiøch ja'a jäya'ayhajxy nyajnáhwá'adsät coö hajxy hijty quiuhdägoyya'añ.

¹² 'Tsøc mädiáacäm. Jii tul'jäya'ay meeg mägo'x miøødä. Coö tu'ug tiägóyyät, mänit nøcxy yhøxta'ay. Jimä meeghajxy miähmø'øy tunhøjx, ja'a hajxy tøø quia'a tägóyyäbä. ¹³ Y coö piáadät, mänit xioøn'da'aga'añ nägø'ø nädecypiä. Tøyhajt jaduhñ. ¹⁴ Jaduhñ mäwíinät je'e neby højts nDeedyhajtäm ja'a jim tsajpootypä; cabä jioot chocy coö ni mädyii pigäna'c quia'a cuhdägóyyät.

¹⁵ 'Coo ja'a mmäjøøn coö ja'a mmädøjc jaduhñ xmiägädiéeyät, mänit hamee'ch mmägäpax mhané'emät. Coö jaduhñ xmiäbøjcät, mänit jaduhñ yhoýø'øwät. ¹⁶ Pero coö jaduhñ xquia'a mäbøjcät, mänitá jäya'ay mmøjyá'axät mejtstägøøg neby hajxy jaduhñ tiestigohádät waambaty hajxy hánajty mmädia'agy. ¹⁷ Y coö ni jaduhñ

quia'a mábógát, mänítäts ja'a hermanodøjc mhawáañät. Y coo ni jaduñ quia'a mábógát, mänit hajxy mbuhwá'adsät.

¹⁸Tøyhajt mijts nnäma'ay coo ja'a Diosmädia'agy hajxy yaa myajwá'xät hädaa yaabä naaxwiin nebiä jäya'ayhajxy jaduñ hoy yhidät. Dios hajxy jaduñ xyhané'emäp nebiaty hajxy mmädiá'agät.

¹⁹Jaduñ mijts nnämaabiä, coo hajxy nämetsc mnöcxät tu'ugmädia'agy hädaa yaabä naaxwiin, y cooç nDeedy hajxy homiädyiibä xmiäyujwáañät ja'a jim tsajpootypä, mänit jaduñ xmió'owät. ²⁰Coo hajxy nämetsc nädägøøg tiu'ugmúgät maa ja'a høøçhcøxpän, jimhøch jaduñ nhidaambä cujc.

²¹Mänitä Pedro ja'a Jesús ñämaayy:

—Wiindsón, cooç nmäjøøn cooç nmädøjc jaduñ xmiägädiéeyät, naaghøoc-høch jaduñ nmämée'xät. Nej, mädøyyä jaduñ cooç juxtujc-hooc nmämée'xädä.

²²Mänitä Jesús yhadsooyy:

—Cab jaduñ miädøyyä. Cunaaghoc hänajty xmiägädieey, mänit mmämée'xät.

²³Neby hajxy hoy mwiinjuø'owät nebiä Dios yhane'emiän. Tøoc yajmäbáatäm nebiä rey tu'ugän. Mänitä rey wyiinmahñdyhajty coo ja'a mioonsähajxy ñuu'xycápxät. ²⁴Naamnä hänajty ñuu'xycapxtsooñ coo ja'a mioonsä tu'ug miejch. Mamyillón hänajty miänuu'xyhadyii. ²⁵Pero cabä mioonsä xädø'øn hänajty miøøðä neby jaduñ yajnähwá'adsät.

Mänitä rey miänaañ coo ween tioogøøjät møødä yhuung møødä tio'oxy, møødä chømy møødä tiajy, cøxiä nebiä ñuu'xy jaduñ ñähwá'adsät. ²⁶Mänitä rey wyiinjjcädaacä ja'a miöonsäm. Mänit miänuu'xtaacä: “Wiindsón, mee'x. Cøxáambøch nyega'añ.” ²⁷Mänitä wyiindsón hojioot ñä'a møødhajty. Mänit miänaañ coo tøø ñähwa'açh, coo ween yhawa'adspädsømy. ²⁸Coo ja'a moonsä jim chohñ, mänitiä miämoonsä tu'ug piaaty. Mejtsmil tægøøgmil hänajty miänuu'xyhadyii. Mänitä miämoonsä yo'mämadsøoyy.

Mänit miänaañ: “Høøch móoyyæc mädúhñtiøch miich xmiänuu'xyhaty.” ²⁹Mänit wyiinjjcädaacä. Mänit miänuu'xtaacä: “Mee'x, cøxáambøch nyega'añ.” ³⁰Pero cabä craa hojioot ñä'a møødhajty. Mänitä mähdiøjc yajtsuumä. Jiiby jaduñ yhida'añ pujxtøgooty høxtä coonä quioxy yégät.

³¹Coo ja'a moonsädøjc-hajxy yhiijxy, ja'a hajxy hänajty jaac jimä, mänit hajxy jiootmabiøjcy. Mänitä wyiindsón hajxy hoy yhawaanä nebiaty hänajty tøø jiaty tøø yhabety. ³²Mänitä rey ja'a mioonsä miøjyaaxy, ja'a hänajty tøø ñähwá'açhäbä. Mänit miänaañ: “Haxøøghäna'c miich. Tøøch miich cøxiä nyajnähwa'açh mädúhñtiøch miich hijty xmiänuu'xyhaty. Páadyhøch miich tøø nyajnähwa'açh, cooç miich tøø xmiänuu'xta'agy. ³³Jaduñ miich mmämoonsä cu mnäxuu'ch nébiøch miich tøø nnäxuu'chän.” ³⁴Hoyhoy ja'a rey jaduñ yhawa'andaacy.

Mänit miänaañ coo ja'a mioonsä quiumädówät höxtä coonä hänäjty tøø yajnáhwa'ačh mäduhñtiä hänäjty miänuu'xyhadyii.

³⁵Jaduhñčh nDeedy mijts xyajcumädowaambä, ja'a jim tsajpootypä, coo ja'a mmäjøøn coo ja'a mmädøjc hajxy mga'a mämée'xät hamuumdu'joot.

Mänitä Jesús jaduhñ miädiaacmaayy.

19 Mänitä Jesús jim chohñ Galilea. Mänit jim ñöcxý Judeanaaxooty. Jímäts je'le Jordánmøjnøøhawiiimb maa ja'a xøø piädsømiän. ²Mänitä jäya'ayhajxy may piadu'ubøjcy. Mänit hajxy yajmøcpøjcä ja'a Jesúsäm.

³Mänitä Jesús ñámejtsä ja'a fariseoshajxy näje'ebä. Mänitä Jesús hajxy miäyajtøoyy:

—Nej, hoy jaduhñ coo jäya'ay ja'a tio'oxiøjc nä'ä nägoobä yhöxmädsädä.

Paady hajxy jaduhñ miänaañ, jia jøjcapxøøwaañ ja'a Jesús hajxy jaduhñ. ⁴Mänitä Jesús yhadsooyy:

—Nej, cajnä ja'a Diosmädia'agy hajxy mgapxyñä. Jiiby jaduhñ myiñ coo ja'a Dios jäya'ay jecy quiunuu'xy ya'adio'oxy. ⁵Paadiä ya'adiøjc ja'a tiaj ja'a tieedy hajxy ñähgueecnä, coo ja'a to'oxiøjc hajxy wyiingpøjnä. Nämetsc hajxy jaduhñ ñimiøødtsäna'awáañänä. ⁶Jaduhñ hajxy yhidaañnä nebiä tu'que'expän. Cab jaduhñ yhooyä coo hajxy myajniyhøxmadsoøjät pønjatý ja'a Dios jaduhñ tøø quiunuu'xy coo hajxy ñimiøødtsäna'awøøjät — nõmä Jesús miänaañ.

⁷Mänitä Jesús hajxy miäyajtøøgumbä:

—Tii ja'a Moisés jaduhñ coo miänaañ coo ja'a to'oxiøjc yhöxmadsoøjät cuhdujthaam.

⁸Mänitä Jesús miänaañ:
—Coo ja'a mgopc-hajxy jaduhñ wyi'i xiexä, paadiä Moisés hajxy jaduhñ xquihdujtmoooy coo ja'a mdo'oxiøjc hajxy mhøxmädsät. Pero cabä Dios jaduhñ quiunuu'xy. ⁹Cab jaduhñ yhooyä coo wiingto'oxiøjc mwiingpøjtägätsät, pø nä'ä nägoobä ja'a mdo'oxiøjc hänäjty tøø mhøxmach. Ni jaduhñ quia'a hoyyä coo høxmachtio'oxiøjc mwiingpøgät.

¹⁰Mänitä Jesús ñämaayyä ja'a miägu'ughajpähajxy:

—Maas hoyyädä'a jaduhñ coo mga'a nä'ägädä pøgät.

¹¹Mänitä Jesús miänaañ:

—Cab hajxy nägøxiä wyiinjuøøwa'añ hädaaduhmbä. Jayooyyä hajxy jaduhñ wyiinjuøøwa'añ pønjatý ja'a Dios jaduhñ tøø yajwiinjuøøy. ¹²Näje'le ja'a ya'adiøjc-hajxy ma'ad myiñguia'ay; paady hajxy quia'a ñibiøgyii. Näje'le hajxy yajtsucy. Coo ja'a Dios hajxy wyiingudsähgøøwa'añ, paady hajxy näje'le quia'a nibiøgyii. Pøn jaduhñ mee'xtugaamb, ween miee'xtucy.

¹³Mänitä pigäna'c-hajxy näje'le wiomejtsä maa ja'a Jesús wyiinduumän nebiä Jesús ja'a hoyhajt jaduhñ mió'owät. Pero cabä Jesús ja'a miägu'ughajpähajxy jaduhñ yhojiäwøoyy. Mänit hajxy yhojjä, ja'a pigäna'c hajxy hänäjty tøø wioméchäbä. ¹⁴Mänitä Jesús miänaañ:

—Caj, wéenhøch ja'a pigäna'c-hajxy xñämech. Ca'a hajxy

mhojy. Coo ja'a Diosmädia'agy hajxy jaduhñ mmäbögät nebiä pigäna'c-hajxy miäbøquiän, mänitä Dios hajxy jaduhñ xyhuunghádät.

¹⁵Coo ja'a Jesús ja'a pigäna'c-hajxy hänäjty tøø mio'oy ja'a hoyhajt, mänit jim chohñ.

¹⁶Mänitä Jesús jäya'ay tu'ug ñämejtsä. Mänit miäyajtøøwä: —Wiindsøn, tii hóybøch ndúnäp nébiøch njugyhádat çøjxta'axiøø nebiä Dios jiugyhätian.

¹⁷Mänitä Jesús yhadsooy: —Tiiçh ja'a hoybä coo xmiäyajtøø. Caj pøn jaduhñ yhooyä; jagooyyä Dios jaduhñ yhooyä. Pø chojpy ja'a mjoot jaduhñ coo mjugyhádat çøjxta'axiøø nebiä Dios jiugyhätian, mgudiúnäp ja'a Diosmädia'agy jaduhñ.

¹⁸Mänitä craa miänaañ:

—Mädyiibä.

Mänitä Jesús yhadsooy:

—Caj mjäya'ay-yaghó'ogät; caj mméedsät; caj pøn mnähøønó'owät; ¹⁹mwiingudsähgó'owäp ja'a mdaj ja'a mdeedy; mmøødnijootpaadóøjäp ja'a mmäjøøn ja'a mmädøjc hamuumdu'joot.

²⁰Mänitä craa miänaañ:

—Tøøch jaduhñ ngøxy cudiuñ. Múutsnøch hänäjty coøch jaduhñ ngudiuundsohñ. Tijátyhøch jaduhñ nga'a cudiuumyñä.

²¹Mänitä Jesús miänaañ:

—Pø mjaançh cudiunaamby hoy yaxón, nøcx yø'ø mje'le çøxy toog. Mänitä häyoobädøjc mnä'a mó'owät çøxiä. Jaduhñ jim mdägó'owät tsajpootyp. Mänitøch jaduhñ xpiadu'ubögät.

²²Coo ja'a craa jaduhñ miädooyy, mänit jaduhñ jiootmadiägøøyy.

Hix, mäyøø ja'a craa hänäjty. Mänit wyiimbijnä.

²³Mänitä Jesús ñämaayy ja'a miägu'ughajpähajxy:

—Näl'ägä tøyhajt mijts nnäma'ay, tsip jaduhñ coo mäyøøhänä'c jim ñøcxät tsajpootyp. ²⁴Tøyhajt jaduhñ, cab jaduhñ jiaty tsipä coo ja'a camello ñäxät xuhñdyjutjooty. Maas tsip coo mäyøøhänä'c jim ñøcxät tsajpootyp.

²⁵Coo hajxy jaduhñ miädooyy, mänit hajxy yagjuøøyy. Mänit hajxy ñimiäyajtøøwä:

—Pønds jaduhñ nähwá'adsäp.

²⁶Mänit hajxy wyiinhee'ppejtä ja'a Jesúsäm. Mänitä Jesús miänaañ:

—Cabä jäya'ayhajxy jaduhñ ñä'a jájpät; pero hotyiijä ja'a Dios jaduhñ jiaty.

²⁷Mänitä Pedro miänaañ:

—Wiindsøn, tøø højts çøxiä nnähgue'egy nhøxyo'oy. Tøø højts miiçh nbadu'ubøjnä. Tii højts jaduhñ nbaadaamby.

²⁸Mänitä Jesús yhadsooy:

—Näl'ägä tøyhajt mijts nnäma'ay, coo ja'a xøøwiimbä naaxwiimbä çøxiä jieemdagätsät, mänitøch jim nøcxy nhøxta'aga'añ maa ja'a Dios wyiinduumän, høøch ja'a Diosquexypä. Jimhøch nhane'ema'añ. Y mijts, jim hajxy jaduhñ nøcxy mhøxta'agaambä pønjätyhøch yaa tøø xpiawädity. Cødu'ug häñaabiejt hajxy jim mbaada'añ, majmetspä. Jim mijts ja'a judiøshajxy mhane'ema'añ, ja'a majmetsc-hagajtpä. ²⁹Pønjaty ja'a tiøjc jaduhñ tøø nähgue'egy ja'a høøchçøxpä, o ja'a piuhya'ay ja'a piuhdo'oxy, o ja'a tiaj

ja'a tieedy, o ja'a yhuung ja'a tio'oxy, o ja'a ñaax, majiäduhñtiä piaattägatsa'añ, y cøjxta'axiøø jiugyhada'añ nebiä Dios jiugyhatian. ³⁰ Ja'a hajxy mõjtuungmøødpä jäda'ahaty, nämay ja'a tiuung hajxy yajtägoyya'añ; y ja'a mõjtuung hajxy jäda'ahaty ca'a møødpä, nämay hajxy miøjtuungpaada'añ.

20 'Maa ja'a Dios yhane'emiän, tsøc yajmäbáatäm nebiä cudsatypcamän tu'ug. Jopy jaduhñ tiu'ubøjcy moonsähøxtaabiä, pøn jaduhñ miøødtúnäp ja'a chaatypcamjooty. ² Coo piaaty, mänit hajxy quiojyquiapxtiuuñ coo ja'a xiøøhajxy jiuyáanäxä mägooxmiljaty. Mänit hajxy quiejxä tuumbä maa ja'a tsaatypcamän. ³ Møjpetyxiøø ja'a cudsatypcam tiu'ubøjcumbä moonsähøxtaabiä. Mänitä jäya'ay jim yhiixy maa halaplaazän. Nämetsc nädägøøghajxy hänäjty jim tiäna'ay. Cabä tuung hajxy hänäjty miøøpä. ⁴ Mänit hajxy ñämaayyá: "Jam hajxy cudún maäch ndsaatypcamän. Nä'a mädøyyäjuøøbyhøch jaduhñ njuya'añ." Mänit hajxy ñøxcy cuduumbä. ⁵ Mänitä cudsatypcam yhooguiumbä moonsähøxtaabiä cujyxiøøho'ogy. Mänit yhooguiumbä mänacyxiøø. ⁶ Møjmänacyxiøø tiu'ubøjcumbä. Jimä jäya'ay yhiixy halaplaaz. Cabä tuung hajxy hänäjty miøøpä. Mänit hajxy ñämaayyá: "Tii mijts coo myaajä. Tii hajxy yaa coo mwi'i xiunaxy." ⁷ Mänit hajxy miänaañ: "Cab højts pøn waamb tøø xñäma'ay." Mänit hajxy ñämaayyá: "Jam hajxy

cudún maaäch nnaaxootiän. Nä'a mädøyyäjuøøbyhøch jaduhñ njuya'añ." ⁸ Coo chuujøøyy, mänitä cudsatypcam ja'a moonsäwiindsøn mõjhajpä ñämaayy: "Mmøjyá'axäp yøø moonsähajxy. Mänit hajxy mmäjúyät. Pønjaty høxhaam tøø jiaac tægø'øy cuduumbä, je'eds hajxy jawyiin mmäjuuüchóonäp. Y pønjaty jawyiin tægøøyy cuduumbä, je'eds hajxy høxhaam mmäjúyáp." ⁹ Mänit hajxy yajmäjuuyy. Jawyiin hajxy yajmäjuuyy ja'a hajxy hänäjty tøø tiägø'øyäbä mänacyxiøø. Pedyii hajxy jaduhñ miooyyä mägooxmiljaty. ¹⁰ Ja'a hajxy hänäjty tøø tiägø'øyäbä jayøjp, jaduhñ hajxy hänäjty tiajy miay coo hajxy maas majiaty mio'owa'añii. Pero jaduhñ hajxy miøoyyäbä mägooxmiljaty. ¹¹ Coo hajxy jaduhñ yajmäjuuyy tu'cuhdujtä, paadiä cudsatypcam hajxy miäjootma'ty. ¹² Mänit hajxy miänaañ: "Yøø häna'c-hajxy høxhaam tøø jiaac tehñ tiägø'øyäbä, tu'hóráyyä hajxy jaduhñ ñä'a tuuñ. Pero jaduhñ miich tøø mmäjuy neby højts tøø xmiäjúyyän. Cab jaduhñ yhooyy. Tøø højts tu'xøø nmee'xtucy. Jaanç tehñ yhan jaduhñ. Hamäjaa højts jaduhñ tøø nmänaxy." ¹³ Mänitä cudsatypcam yhadsooyy: "Mägu'ughajpä, cábøch miich tøø nyajniwyiindoyii. Jaduhñ ngojyquiapxtiúunäm cooçh miich mägooxmil nmo'owa'añ. ¹⁴ Chaadsä mmäjuhñdy. Nøcxnä. Chójpjøch njoot jaduhñ cooçh yøø craa nmó'owät nébiøch miich tøø nmo'oyän, yøø craa høxhaam tøø jiaac tægø'øyäbä. ¹⁵ Nej, cábøch ja'a cuhdujt jaduhñ nmøøpä cooçh

nxädø'õñ jaduñ nyajwá'xät nébiøch njoot choquiän. Tøgä paady jaduñ mjootma'adiä, cooçh hojioot nmøødä." ¹⁶Pønjaty høxhaam tægøoby, copc-hadaamb je'e. Pønjaty jawyiin tægøoby, høxhaamø'øwaamb je'ebä. Nämaj hajxy jaduñ tøø jia mõjya'axyii, pero näweeñtiä hajxy tøø wyiimbiyii.

¹⁷Mänitä Jesús hajxy jim chohñ, ñøcxy hajxy Jerusalén. Nämaj ja'a cu'ughajxy hānajtý ñøcxy. Tu'haamnøcxpä ja'a Jesús hajxy yohwia'xy møødä miägu'ughajpädøjc-hajxy nämajmetspä. Mänitä Jesús miänaañ:

¹⁸—Yam hajxy nnøcxäm Jerusalén. Høøch ja'a Diosquexypä, jimhøch häna'c xyajcø'ødägø'øwa'añ maa ja'a teedywiindsøn hajxiän, maa ja'a ley-jajnahixøbiädøjc-hajxiän. Jimhøch hajxy xyajyagho'oga'añii. ¹⁹Mänitøch hajxy xyajcø'ødägø'øwa'añ maa ja'a jäya'ayhajxiän, ja'a jäguemnaaxtsohmbä. Mänitøch hajxy xwyiinwoona'añ. Mänitøch hajxy xwiobho'oga'añ. Mänitøch hajxy xmiøjpahbeda'añ cruzcøxp. Pero cudägøøgxøøch jaduñ njujypiøga'añ cooçh hānajtý tøø nho'ogy.

²⁰Jaduñä Jesús miägu'ughajpähajxy hānajtý xiøhaty metscä, Jacobo møødä Juan. Zebedeo ja'a tieedyhajxy hānajtý xiøhaty. Coo ja'a Jesús hajxy hānajtý ñøcxy Jerusalén, jimä Jacobo tiajhajxy hānajtý piawädijpä. Mänit miejch maa ja'a Jesús

wyiinduumän. Mänitä Jesús wyiinjiçädaacä, miäyujwaanä ja'a mayhajt.

²¹Mänitä Jesús miänaañ:
—Tii mayhājthøch jaduñ ndúnäp. Mänitä tajjāya'ay yhadsooyy:
—Coo miich hānajtý tøø mgoody maa mhane'ema'añän, mänit mhané'emät cooçh nhuunghajxy yaghøxta'agøøjt hahooyhaampiä møødä hanajtýhaampiä maa miich mwiinduumän.

²²Mänitä Jesús ja'a nämajmetspä ñāmaayy:

—Cab hajxy jaduñ mnajuø'øy tii hajxy jaduñ myujwaamby. Nej, hoy hajxy jaduñ mjada'añ mhabeta'añä nébiøch jaduñ njada'añ nhabeta'añän.

Mänit hajxy yhadsooyy:
—Hoy pues.

²³Mänitä Jesús miänaañ:
—Näl'ägä tøyhajt jaduñ coo mijts jaduñ mjadaambä mhabetaambä nébiøch njada'añ nhabeta'añän. Pero cábøch cuhdujt jaduñ nmøødä coo hajxy jim mhøxtá'agät maaçh nwiinduumän, hahooyhaampiä møødä hanajtýhaampiä. Pønjátýhøch ja'a nDeedy jaduñ tøø jajnahdijy, je'leds jaduñ jim høxta'agaamb maaçh nwiinduumän.

²⁴Coo ja'a Jesús miägu'ughajpädøjc-hajxy jiaac mädooyy ja'a jaac nämajcpä, mänitä Jacobo hajxy miäjootma'ty møødä Juan. ²⁵Mänitä Jesús jämiøød quiøxy mõjyaaxy. Mänit miänaañ:

—Mnajuøøby hajxy coo ja'a gobiernahajxy yhane'emy maa hajxy tiuñän. Ja'a hajxy

møjtuungmøødpä, je'eds hajxy maas hanehmb. ²⁶Pero mijts, cab hajxy jaduhñ mhane'ema'añ. Pøn ja'a mõjtuung jaduhñ tsojy maa mijtsän, tsipcøxp ja'a miägu'ughajpä piuhbédät. ²⁷Y jaanä jaduhñduhmbä, pøn jaduhñ yajcumayaamb maa mijtsän, tsipcøxp ja'a miägu'ughajpä yajtunøøjät. ²⁸Høøch ja'a Diosquexypä, puhbéjþoch jaduhñ tøø ngäda'agy. Cábøch jaduhñ nyajpuhbeda'añ. Páadyhøch yaa tøø ngäda'agy nébiøch ja'a jäya'ay jaduhñ may nnähho'tú'udät.

²⁹Tøø hajxy hänajty quioody maa ja'a cajpt hänajty xiøhatiän Jericó. Coø hajxy quiajptpädsøomy, mänitä jäya'ayhajxy may piadu'ubøjcy.

³⁰Jimä wiindspähajxy hänajty quihxna'ay tu'uba'a nämetscä. Coø ja'a Jesús hajxy miädooyy ñajxy, mänit hajxy yaaxy:

—Wiindsøn, miieh ja'a David jecy mhaphajt mdeedyhajt. Højts näxuu'tsäs.

³¹Mänit hajxy yhojja ja'a cú'ugäm, ween hajxy jaduhñ yhamoñ. Pero cab hajxy miäböjcy. Mänit hajxy tehngajnä yáaxy:

—Wiindsøn, miieh ja'a David jecy mhaphajt mdeedyhajt. Højts näxuu'tsäs.

³²Mänitä Jesús tiänaaxiøjpy. Mänitä wiindspähajxy miøjyaaxy:

—Tii mayhajt hajxy jaduhñ mdsojpy.

³³Mänit hajxy yhadsooyy:

—Højts yaghixø'cäs.

³⁴Mänit hajxy ñäxuu'tsä. Mänit hajxy wyiingudsiiwøoyy. Mänit hajxy jiaanç hijxø'cy. Mänitä Jesús hajxy piadu'ubøjcy.

21 Mäwiingoomb ja'a Jesús hajxy hänajty jim Jerusalén. Mänit hajxy miehch maa ja'a cajpt hänajty xiøhatiän Betfagé, jim mädooyy maa ja'a Olivostunän. ²Mänitä Jesús ja'a miägu'ughajpä nämetsc ñämaayy:

—Nøcx hajxy maa yøø cajpt ximhaampiän. Jimä burrataj hajxy mbaada'añ cuxoch møødá yhuung. Mmäguejø'owäp hajxy jaduhñ. Mänit hajxy yaa mwitsmínät. ³Coø hajxy pøn waamb xñámá'awät, jaduhñ hajxy mnámá'awät coø ja'a wiindsøn jaduhñ yajmaajiaty, coø hajxy mänit mmoodiägatsa'añ.

⁴Jaduhñds tiøjiajty nebiä Diosmädia'agy-yajwa'xpä jecy quijyahyyän:

⁵Jaduhñdsä cu'ug hajxy mhawáanät ja'a hajxy jim tsánaabiä Jerusalén:

“Huuc heeb hajxy, xiidsä mgobiernä hajxy jaduhñ xñägoody burrohuungnähgøxp møødá burrataj.

Cab jaduhñ yajcumaya'añ.”

⁶⁻⁷Mänitä burrataj hajxy hoy wyich møødá burrohuung, neby hajxy hänajty tøø ñäma'ayijjän. Mänitä Jesús miägu'ughajpä wyithajxy yagjäbe'enøoyy ja'a burrohuung. Mänitä Jesús yajpejty. ⁸Jimä cu'ughajxy hänajty may tøø yhamugø'øy. Mänitä wyit hajxy ye'py tu'haam maa ja'a Jesús hänajty ñaxø'owa'añän. Ja'a jäya'ayhajxy näje'ebä, mänitä hujtshaa'x hajxy hoy ñäbuxy. Mänitä hujtshaa'x hajxy hoy ñajtswidso'øy tu'haam. ⁹Mänit hajxy nägøxiä tiägøoyy hayaaxpä:

—iViva ja'a rey David yhap yhoc!
Tsog hajxy wiingudsáhgóoyäm,
ja'a Dios tøø quiéxiabä. Weenä Dios
jim wyiingudsáhgó'yii tsajpootyp.

¹⁰Mänitä Jesús hajxy quioo'ty
Jerusalén. Coo hajxy tiägøøyy
cajptooty, mänitä cu'ughajxy
tiägøøyy haamhajpä. Mänit hajxy
nämay nimiäyajtøøwä:

—Pøñ jäya'ay yø'øduhñ.

¹¹Mänit hajxy yhadsooyy:

—Jesús yø'ø. Nazaret
chooñ Galileanaaxooty. Ja'a
Diosmädia'agy jaduññ yajwa'xyp.

¹²Mänitä Jesús tiägøøyy
Diostsajtøgooty. Jiibiä jäya'ayhajxy
hänajty may jiuudioogy. Mänit
hajxy yhøxquejxpädsøømä.
Mänitä xädø'øñgiuuiwjtspädøjc
ja'a mieexä hajxy yajtsitø'cäxä
møødä palomatoop'pädøjc ja'a
yhänaabiejthajxy. ¹³Mänitä Jesús
miänaañ:

—Jaduññ myiñ cujaay maa ja'a
Diosmädia'aguiän: “Jue'ečh ndøjc
hajxy xwiáañät coočh hajxy jaduññ
jiiby xpia'yá'axät.” Dios jaduññ
mänaañ; pero mijts jaduññ mwa'añ
meedsøhñdy podøhñdy.

¹⁴Mänitä Jesús nämejtsä ja'a
wiindspä møødä tecymia'adpä.
Jiiby hajxy hänajty ñä'ägä
hity tsajtøgooty. Mänit hajxy
yajmøcpøjcä yajmäbaadøøyyä.
¹⁵Jiibiä pigäna'c-hajxy hänajty
wyi'i ya'axy tsajtøgooty: “iViva
ja'a rey David yhap yhoc!” Ja'a
teedywiindsønñhajxy møødä
ley-yajnähixøøbiädøjc-hajxy, coo
hajxy yhijxy nebiä Jesús ja'a
hoy-yagjuøøñäjatypä hänajty
yajcähxø'øguiän, coo hajxy
miädooyy coo pigäna'c-hajxy

hänajty wyi'i ya'axy, mänit hajxy
yhawa'andaacy. ¹⁶Mänitä Jesús
ñämaayyä:

—Nej, mmädooby jaduññ
waambaty hajxy ya'axiä.

Mänitä Jesús yhadsooyy:

—Jexio'ch, nmädøobiøch jaduññ.
Pero mijts, nej, cajnä hajxy
jaduññ mmädoyhatyñä nebiä
Diosmädia'agy myiñän cooc ja'a
Dios jaduññ tøø miäna'añ coo ja'a
pigäna'c-hajxy ween yhøy maa ja'a
Dioscøxpän.

¹⁷Mänitä Jesús hajxy jim chohñ.
Mänit hajxy nøcxy maa ja'a cajpt
hänajty xiøhatiän Betania. Jim
hajxy jaduññ chuunajxy.

¹⁸Coo jioböøyy, mänitä Jesús hajxy
wyiimbijty. Yähó'cäp hajxy
hänajty. ¹⁹Tu'haamnøcxpä piids
hajxy jaduññ piaaty. Pero cabä tii
tøøm hänajty miøødä. Haagä haay
hänajty je'e. Mänitä Jesús ja'a piids
ñämaayy:

—Ni mänaa miičh mga'a
tøømbejtägatsaannä.

Mänitiä ja'a piids jaduññ
jiaančh tøøch. ²⁰Coo ja'a Jesús
miägu'ughajpähajxy jaduññ
yhijxy, mänit hajxy jiaančh
tehm yagjuøøyy. Mänitä Jesús
miäyajtøøwä:

—Neby yø'ø piids jaduññ paquiä
jiaančh tøøch.

²¹Mänitä Jesús yhadsooyy:

—Nä'ägä tøyhájthøch
mijts nnäma'ay, coo hajxy
hamuumdu'joot mjaančh mabóğät,
hotyijj hajxy jaduññ mjädät,
nébiøch yø'ø piids jaduññ tøø
nyajtø'øchän. Coo yø'ø tun hajxy
jaduññ mnämä'awät: “Jua'ads
jim, nøcx mejjiooty tægø'øw”,

mänit jaduhñ jiaančh tägó'owät.

²²Pø mjaančh mäbøjp hajxy jaduhñ, coo ja'a Dios hajxy tijaty mmäyujwá'anät, mänit hajxy jaduhñ xmió'owät.

²³Mänitä Jesús tiägøøyy tsajtøgooty. Mänit tiägøøyy yajnáhixøöbiä. Mänitä teedywiindsøn hajxy miejch møødä martuumädøjc. Mänitä Jesús miäyajtøwä:

—Pøn miich cuhdujt tøø xmió'oy coo miich yaa mhané'emät.

²⁴Mänitä Jesús yhadsooyy:

—Cooch mijts ja'a tøyhajt xmió'owät nébiøch mijts cham nmäyajtøwa'añän, mänitøch mijts ja'a tøyhajt nmoodiägátsät põnhøch ja'a cuhdujt tøø xmió'oy cooch yaa nhané'emät. ²⁵Pønä Juan jaduhñ quejx mäyajnäbejpä, Dios tøgä jäya'ayä.

Cab hajxy ñä'a hadsooyy. Mänit hajxy tiägøøyy yajcapxiøöbiä:

—Coo hajxy nhadsóowämät coo ja'a Dios quiejxy, mänit hajxy xmiäyajtøwáanäm tii ja'a Juan miädia'agy hajxy coo tøø nga'a mäbøjcäm. ²⁶Ni jaduhñ quia'a hoyyä coo hajxy nhadsóowämät coo jäya'ay jaduhñ quiejxy; cabä cu'ughajxy jaduhñ yhojiäwó'owät. Jaduhñ hajxy miäna'añ cooc ja'a Juan Dyiosquexiä.

²⁷Mänitä Jesús ñämaayyä:

—Cab højts nnajuø'øy.

Mänitä Jesús miänaañ:

—Cábøch nnägäpaxaambä põnhøch ja'a cuhdujt tøø xmió'oy cooch yaa nhané'emät.

²⁸Mänitä Jesús miänaañ:

—Chaads mijts cuento tu'ug nyajmøødmädia'aga'añ. Jii

jäya'ay hijty tu'ug; metscä yhuung hänäjty. Mänitä yhuung ñämaayy tu'ug: “Huong, nøcx jim huuc tun maačh ndsaatpcamän.”

²⁹Mänitä yhuung yhadsooyy: “Cábøch nnøcxa'añ.” Pero mänit wyiinmahñdyhajty jadähooc coo jaduhñ ñøcxáangumbä. ³⁰Mänitä yhuung tu'ug ñämáaguiumbä coo ñøcxät tuumbä. Mänit yhadsooyy coo ñøcxa'añ. Pero cab jaduhñ ñä'a nøcxy. ³¹Mädyii craa jaduhñ cudiuun nebiä tieedy hänäjty tøø miäna'añ.

Mänit hajxy yhadsooyy:

—Ja'a jawyiinhajpä.

Mänitä Jesús miänaañ:

—Nä'ägä tøyhájthøch

mijts nnäma'ay, jawyiin ja'a yajnähuudiutpädøjc-hajxy tiägø'owa'añ Dioswiinduum møødä cuhhiñdo'oxiøjc-hajxy. Pero mijts, høxhaam mijts mdägø'owa'añ.

³²Ja'a Juan mäyajnäbejpä, hoy mijts xjia yajnähixøøyy neby hajxy hoy mwädität, cab hajxy mmäbøjcy. Ja'a yajnähuudiutpädøjc-hajxy møødä cuhhiñdo'oxiøjc-hajxy, je'eds hajxy jaduhñ mäbøjc. Hoy mijts mja hijxy coo hajxy miäbøjcy, caj mijts mwiiinmahñdyhajty jadähooc coo hajxy mmäbøjpät.

³³'Chaads mijts cuento tu'ug nyajmøødmädia'agáangumbä. Jii jäya'ay hijty tu'ug naaxmøød. Mänitä tsaatpcam quiojy. Mänit curaa piädaacy. Mänitä tsaatyñøøxee'xøhñdy ñädajøøyy tsaajooty. Mänitä häna'awøhñdy cøxp quiojy.

'Mänitä wiingjäya'ay ja'a tsaatpcam hajxy yaghajoodiujcä. Mänita cudsatpcam jim chohñ,

ñøcxy jäguem. ³⁴Coo ja'a tsaatyptuc yhabaaty, mänitá cudsaatypcam miejstägajch. Mänitá mioonsá quiejxy coo ja'a tsaatyp hajxy yajmédsát mäduhñtiä hajxy hánajty mio'owa'añii.

³⁵Mänitá mioonsáhajxy miájtsäxä; ja'a naaxhajoodiujpähajxy jaduhñ mämajts. Wojpä mähdiojc tu'ug; yagho'cá tu'ugpä; ca'tsá tu'ugpä.

³⁶Mänitá cudsaatypcam ja'a mioonsá quiejxy maas may. Jaaná jaduhñ hajxy yhayoowhíjxábä.

³⁷Mänitá yhamdsoo huung jaduhñ quiejxy coo tyijy jaduhñ wyingudsähgøøyyäxät. ³⁸Pero coo yhuung jaduhñ yhíjxäxä, mänitá naaxhajoodiujpähajxy ñiñämaayyá: “Coo yø'ø craa ja'a tieedy yhó'ogät, mänit yø'ø craa ja'a tsaatypcam miämähmø'owa'añ. Tsøg hajxy yagho'cäm. Mänit højts ja'a tsaatypcam jaduhñ nmämähmøøyyämät.” ³⁹Mänit hajxy jiaanč majch. Mänit hajxy yhøxjuijpádsøømy. Mänit hajxy yagho'cy. ⁴⁰Hoorä, coo ja'a cudsaatypcam jaduhñ miédsát, nebiä naaxhajoodiujpähajxy tiuna'añii.

⁴¹Mänit hajxy yhadsooyy: —Yagho'tägatsáanäp hajxy jaduhñ je'leguioxpä coo hajxy quia'awiindøyyä. Mänitá wiingjäya'ay ja'a naax yaghajoodiuga'añ, pønä tsaatyp jaduhñ yegaamb coo ja'a tsaatyptuc yhabaadät.

⁴²Mänitá Jesús miänaañ: —Nej, cajnä ja'a Diosmädia'agy hajxy mgapxyñä maa jaduhñ myiñän cujaayá:

Ja'a tsaá mädyii ja'a
tøjcojpähajxy quia'a nä'ägä
cumaayy,

je'e nä'ägä tuundsohñ.

Dios jaduhñ pädaac, paady højts njaanč tehñ yagjuø'øy.

(Jesús jaduhñ hamdsoo niyajmäbaatä nebiä tsaajän je'leguioxpä coo hánajty quia'a tsocy quia'a mee'xyíjäm ja'a cu'ug. Pero mo'owáanäp ja'a Jesús ja'a møjtuung ja'a hodiung hánajty.)

⁴³Paady, xpiøgáanäp ja'a mguhdujt hajxy coo hajxy jim mdägø'øwät Dioswiinduum. Wiingjäyá'ayäts jaduhñ tægø'øwaamb pønjaty jaduhñ howiädijp. ⁴⁴Pøn jaduhñ cá'awäp yø'ø tsaanähgøxp, tægøyyäp jaduhñ. Y coo pøn jaduhñ ñähgahbedøøjät yø'ø tsáajäm, jaaná tægøyyäp je'ebä.

⁴⁵Coo ja'a teedywiindsøn hajxy jaduhñ miädooyy møødä fariseodøjc-hajxy, mänit hajxy ñajuøøyy coo hajxy hánajty tøø miädia'agyii ja'a Jesúsäm. ⁴⁶Mänitá teedywiindsøn ja'a Jesús hajxy jia madsaañ; cab hajxy ñä'ä majch je'leguioxpä coo ja'a cu'ug hajxy hánajty chähgø'øy; hiç, jaduhñä cu'ughajxy hánajty miäna'añ cooc ja'a Jesús ja'a Diosmädia'agy hánajty yajwa'xy.

22 Mänitá Jesús tiägøøguiumbä mädiaacpä. Mänit miänaañ:

²—Maa ja'a Dios yhane'emiän, jaduhñ mäwiinäts je'e nebiä rey tu'ugän. Yajpøgaamby ja'a yhuung hánajty je'e. Yagjadáanäp ja'a cay ja'a hu'ug hánajty je'e. ³Mänitá mioonsáhajxy quiejxy woobä wijtspä; pero cabä jäya'ayhajxy hánajty ñøcxa'añ mägaabiä.

⁴Mänitá rey ja'a mioonsá quiejxcumbä. Mänit miänaañ:

“Nøcx hajxy näma'aw coo ja'a cay ja'a hu'ugy tøø quiøønä, coochä waj tøø nyajyagho'ogyii ja'a ni'xpä. Tøø ja'a cayiibä yhabaady; weends hajxy miñ quiay.” ⁵Pero cabä jäya'ayhajxy nä'ägädä mäbøjcy. Tu'jäya'ay nõcxy maa ja'a quiamän; tu'jäya'ay nõcxy too'pä. ⁶Mänitä rey mioonsähajxy miäjtsäxä ja'a jäya'ayhajxy hänajty jaac jimbä. Mänit hajxy yaghäyoowhijxy; yagho'cä hajxy jaduhñ. ⁷Mänitä rey yhawa'andaacy. Mänitä soldadohajxy quiejxä mäyagho'pä. Ja'a hajxy hänajty tøø mioonsäyagho'oguiäbä, je'e hajxy nõcxy yagho'ogyii; møødä quiajpthajxy nõcxy nõ'cäxä.

⁸Mänitä rey ja'a mioonsähajxy nämaayy: “Tøø jaduhñ yhabaady coochä nhuung jaduhñ piøga'añ. Pero ja'a jäya'ayhajxy tøø nja woy tøø nja wíchäbøch, cab hajxy hawiinmats myínät. ⁹Nøcx hajxy wow wits pønjaty hajxy mbaatyp jim tu'haam.” ¹⁰Mänitä mioonsähajxy hoy wioy wyich nägøxiä, pønjaty hajxy jaduhñ piaatyp, møødä hojiäya'ay møødä haxøøgjäya'ay. Mänitädsä tøjc jaduhñ yhujch.

¹¹Mänitä rey tiøjtägøøyy woybä wichpä hijxpä. Mänitä craa tu'ug yhijxä, cabä wyit hänajty yhooyä. ¹²Mänit nämaayyä: “Mägu'ughajpä, cab yø'ø mwit yaa hawiinmats mmädägø'øwät maa ja'a pøc jaduhñ jiadyiijän.” Pero cabä craa nä'ä hadsoowiimbijty. ¹³Mänitä rey ja'a mioonsä nämaayy, ja'a hajxy hänajty texycøøbiä: “Cø'øxots tecyxiots yø'ø craa. Mänit hajxy mhøxjuijpädsómät maa wyiingoodsän. Jim jaduhñ jio'øwa'añ xiuudsä'añ.” ¹⁴Nämay

hajxy jia mõjya'axa'añii, pero näweeñtiä hajxy jaduhñ wyiimbiwa'añii.

¹⁵Mänitä fariseoshajxy jim chohñ. Mänit hajxy quiojyquiapxytiuuñ coo ja'a Jesús hajxy jiojcapxø'øwa'añ neby hajxy jaduhñ yajnähdsómät. ¹⁶Mänitä miägu'ughajpähajxy quiejxy møødä Herodes miägu'ughajpähajxy. Mänitä Jesús hajxy nämaayy:

—Wiindsøñ, nnajuøøby højts coo miič ja'a tøyhajt myecy, coo ja'a Diostu'u myajnähixø'øy. Caj miič mmøjpäda'agy nebiaty ja'a cu'ughajxy miädia'agy; caj miič mmøjpäda'agy pøn tyjy mõjcuhdujtmøød. ¹⁷Højts capxwíjjäc. Nej, hahixøøby jaduhñ coo ja'a gobiernä xädø'øñ mmó'owädä, ja'a jim tsänaabiä Roma.

¹⁸Ñajuøøbiä Jesús hänajty coo hänajty jia jøjcapxø'øwa'añii. Mänit miänaañ:

—Haxøøg mijts mwiinmahñdyhajxy, hoy hajxy mja nibiäda'agyii nebiä hojiäya'ayän. Tiič hajxy coo xjia jøjcapxø'øwa'añ. ¹⁹Tsøgä xädø'øñ tu'ug huuc híjxäm.

Mänitä Jesús wa'xxiädø'øñ miooyyä. ²⁰Mänit miänaañ: —Pøn yhähädiuunnaxy hädaaduhñ; pøn xiøø hädaaduhñ.

²¹Mänit hajxy yhadsooyy: —Ja'a gobiernä.

Mänitä Jesús miänaañ: —Mmó'owäbä gobiernä hajxy mädyii je'e jie'e; y mmó'owäbä Dios hajxy mädyii je'e jie'e.

²²Coo hajxy jaduhñ miädooyy, mänit hajxy yagjuøøyy. Mänit hajxy wyiimbijnä.

²³Mänitxøø ja'a saduceodøjc-hajxy näje'e miejch maa ja'a Jesúsän. Jaduhñ hajxy hänäjty miäna'añ cooc tyijy hajxy nga'a jujypiøjtägatsáanäm. Mänitä Jesús hajxy ñämaayy:

²⁴—Wiindsón, ja'a Moisés jecy mänaañ, coo ja'a pøcy-ya'adiøjc yhó'ogät, ja'a cajpä yhuung, mänitädsä piuhya'ay ja'a yaamgto'oxy wyiingpøgät, nebiä yaamgto'oxy jaduhñ yhuungpáadät ja'a ya'adiøjcøxpä, ja'a tøø yhó'ogüübä. ²⁵⁻²⁶Bueno, näjxutujc hajxy hijty tu'que'ex, haagä ya'adiøjc. Ja'a coobhuung, jayøjp jaduhñ piøjcy; mänit yho'cy. Cabä yhuung hänäjty. Mänitädsä jiädsømy ja'a yaamgto'oxy wyiingpøjcy. Mänitäts je'e yhó'cumbä. Mänitädsä miädägøøgpä jaduhñ jiäjcumbä. Jaduhñ hajxy nägøxiä jiajty møødä miäjxutujcpä. ²⁷Mänitä to'oxiøjc yho'pä høxhaam. ²⁸Bueno, coo hajxy jaduhñ jujypiøgät, mädyii tehñ tiøybä hänäjty to'oxiøjc-hadaamb, ja'a näjxutujcpä puhya'ayhajxy, ja'a hajxy hänäjty tøø jia pøquiübä.

²⁹Mänitä Jesús yhadsooyy:
—Caj mijts ja'a tøyhajt mnä'ägädä møødä. Cabä Diosmädia'agy hajxy mhixiä ni ja'a Diosmäjaa. ³⁰Coo ja'a jäya'ayhajxy jujypiøga'añ, cab hajxy hänäjty piøga'añ, ni cabä yhuung hajxy hänäjty yajpøga'añ. Jaduhñ hajxy yhida'añ nebiä Diosmoonsähajxiän, ja'a hajxy jim tsajpootypä. ³¹Hamdsoo ja'a Dios hajxy jaduhñ tøø xñäma'ay cujaayhaam coo ja'a jäya'ayhajxy jujypiøga'añ:

³²“Xwyiingudsähgøøbiøch ja'a Abraham møødä Isaac møødä Jacob.” Hoorä, wiingudsähgøøyap ja'a Dios ja'a jujcyjiäya'ayhájxiäm. Cab jaduhñ wyiingudsähgøøyii ja'a ho'ogyjiäya'ayhájxiäm.

³³Coo ja'a cu'ughajxy jaduhñ miädooyy nebiä Jesús hänäjty yajnähiøøy, mänit hajxy yagjuøøyy.

³⁴Coo ja'a fariseoshajxy jaduhñ miädoyhajty coo ja'a Jesús quia'a yajmäjdaacy ja'a saduceos, mänitä fariseoshajxy yhamugøøyy.

³⁵Jimä fariseo hänäjty tu'ug; ley-yajnähiøøby hänäjty je'e. Ja'a Jesús hänäjty jøjcapxø'owáañäp. Mänitä Jesús miäyajtøøwä:

³⁶—Wiindsón, mädyii cuhdujt maas møy maa ja'a ley myiñän.

³⁷Mänitä Jesús yhadsooyy:
—“Wiingudsähgøøw ja'a nDioshajtäm hamuumdu'joot; mabøjca ja'a miädia'agy; mjahmiédsäp cøjxta'axiøø.”

³⁸Hädaa cuhdujt, jawyiin jaduhñ myiñ maa ja'a leyän y maas møy jaduhñ. ³⁹Jaana jaduhñ ja'a miämetspä miänaambä: “Møødnijootpaadøø ja'a mmäjøøñ ja'a mmädøjc hamuumdu'joot.”

⁴⁰Hädaa cuhdujt metspä, ja'a ley yhøjx tiecy jaduhñ møødä cøxiä mäduhñtiä ja'a Diosmädia'agy-yajwa'xpähajxy tøø miädia'agy.

⁴¹Jimnä ja'a fariseoshajxy hänäjty tiäna'aynä. ⁴²Mänitä Jesús miäyajtøøyy:

—Waamb mijts mmäna'añ ja'a Cristocøxpä. Pøn je'e yphaphajpy tieedyhajpy.

Mänit hajxy yhadsooyy:

—David yhap yhoc je'eduhñ.

⁴³Mänitä Jesús miänaañ:

—Pero ja'a Dioshspiritucøxpä ja'a David ja'a Cristo nãmaayy: “Wiindsøn.” Jaduhñä David miänaañ:

⁴⁴Tøøchä Dios ja'a nWiindsøn xñämaayyä:

“Häña'aw yaa hahooyhaamb y høxtä coonä ja'a mmädsip jaduhñ quia'a mäjääd'agät”, nømä Dios miänaañ.

⁴⁵Bueno, pø tøø ja'a David ja'a Cristo nãma'ay: “Wiindsøn”, nébiäts jaduhñ yhapat yhoc-hádät.

⁴⁶Caj pøn waamb nã'ägädä hadsooy. Y cabä Jesús waamb miäyajtøwänä høxtä coonä hånajty yho'oga'añ.

23 Mänitä Jesús ja'a cu'ug nãmaayy møødä jiamiødhajxy:

²—Ja'a ley-yajnäxihøøbiädøjc møødä fariseoshajxy, cuhdujtmo'oy hajxy jaduhñ coo ja'a Moisés miädia'agy hajxy yajnäxihøøyyä.

³Mgudiúnäp hajxy jaduhñ waambaty hajxy xñäma'ay. Pero cab hajxy mbahíxät nebiaty hajxy jiatcø'oy. Cabä yhamdsoo mädia'agy hajxy quiudiuñ. ⁴Hanaxiä hajxy tsipjaty yajnäxihøøy; y mänaamb hajxy jaduhñ coo ja'a cu'ug tsipcøxp quiudiúnät. Pero cab hajxy hamdsoo quiudiuñ. ⁵Jaanch tehñ yajcumayaamb hajxy maa ja'a cu'ugwiinduumän. Paadiä nocyquiuaaybä hajxy yajxon yajniwyiinnähgøpxodsø'oyii; paady hajxy yajniGUIØ'OXODSØ'oyii. Paadiä wit hajxy piägø'oy ja'a høxyoñbä. ⁶Coo hajxy maa miägay, häña'awaamb hajxy hånajty maa

ja'a meexäteecän. Y coo hajxy nøcxy tsajtøgooty, häña'awaamb hajxy hånajty maa ja'a häñaabiejt yajxonbän. ⁷Coo hajxy maa wiädity cajptooty, yajwiingudsähgø'owaamb hajxy hånajty maa ja'a cu'ugän. Yajnäma'awaamb hajxy hånajty: “Wiindsøn.”

⁸Pero mijts, cab hajxy mmäná'anät coo ja'a cu'ug hajxy xñämä'awät: “Wiindsøn.” Tu'ugä mWiindsønhajxy jaduhñ; ja'a Cristo je'e. Jaduhñ hajxy mnijjävø'owøøjät nebiä tu'que'expän. ⁹Cab hajxy pøn mnämä'awät: “Teedy”, hädaa yaabä naaxwiimbä. Tu'ugä mDeedyhajxy jim cøxp. ¹⁰Cab hajxy mmäná'anät coo pøn xñämä'awät coo hajxy xquiopc-hádät. Tu'jaya'ay hajxy jaduhñ xyhané'emät; ja'a Cristo je'e. ¹¹Pøn jaduhñ puhbejp ja'a jiamiødhajxy, je'edsä møjtuung jaduhñ paadaamb maa mijtsän. ¹²Hix, pøn jaduhñ yajcumayaamb, cabä møjtuung jaduhñ piaada'añ. Pero pøn jaduhñ ca'a yajcumayaamb, je'edsä møjtuung jaduhñ paadaamb.

¹³Mänitä ley-yajnäxihøøbiädøjc-hajxy nãmaayyä møødä fariseoshajxy: —Jaduhñ mijts mnibiäda'agyii nebiä hoyhäna'cän; pero cab hajxy mhoyhäna'cä. Haxøøg hajxy mjada'añ mhabeta'añ. Cab hajxy jim mdägø'owa'añ maa ja'a Dioswiinduumän, y cab hajxy jaduhñ mmäna'añ coo wiinghäna'c jim tiägø'owät, hoy hajxy hånajty hamdsoo jia mäna'añ coo hajxy jim tiägø'owa'añ.

¹⁴Xiøøbä ja'a Dios hajxy jejcy tøø mnä'a pa'ya'axy. Mänitä

yaamgto'oxy ja'a tiøjc hajxy mbøjcä. Paady hajxy hoyhoy mdsaaçhpøga'añ.

¹⁵Wiinduhmyhagajpt jamiøød hajxy naxy mhøxta'ay pøn jaduhñ xmiøødtúnäp maa ja'a mguhdujthajxiän. Y coo hajxy hänäjty tøø mbaady, mänitä haxøøgcuhdujt hajxy myajnähixø'øy. Maas haxøøg hajxy jaduhñ jiatcø'øwa'añ quejee mijts.

¹⁶Cab hajxy hoy mnä'ägä yajnähixø'øy. Jaduhñ hajxy mmäna'añ; coo hajxy hänäjty tii myajwiinwaanø'øwa'añ, coo ja'a tsajtøjc mgapxpáadät, cab tyijy jaduhñ ñejpiä coo hajxy mga'a cudiúnät neby hajxy hänäjty tøø myajwiinwaanø'øyän. Pero jaduhñ hajxy mmänaambä, coo ja'a oro hajxy mgapxpáadät, ja'a jiiby tsajtøgootypä, tsipcøxp hajxy tyijy mgudiúnät. ¹⁷Mguhmäñøøby hajxy jaduhñ; cab hajxy tii mwijnjuø'øy. Haa ca'a, maas tsoobaatp ja'a tsajtøjc quejee ja'a oro. Hiñ, Dios ja'a tsajtøjc jaduhñ cunuu'x. Ja'a oro, ñä'ä yajmägunuu'xøøyy je'eduhñ. ¹⁸Jaanaä jaduhñ hajxy mmänaambä, coo mgapxpáadät ja'a cuyoxøhñdy, cábäc tyijy jaduhñ ñejpiä coo mga'a cudiúnät. Pero jaduhñ hajxy mmänaambä, coo hajxy mgapxpáadät tijaty tøø mguyoxø'øy, tsipcøxpäc tyijy jaduhñ mgudiúnät. ¹⁹Nej, cab hajxy mnajuø'øyä coo ja'a cuyoxøhñdy miaas tsoobaady quejee tijaty hajxy mguyoxøøby. ²⁰Pøn jaduhñ capxpaatp ja'a cuyoxøhñdy, jaanaä jaduhñ quiapxpaatpä tijatycøxpä ja'a jäya'ayhajxy jiiby tøø quiuyoxø'øy. ²¹Pøn jaduhñ

capxpaatp ja'a tsajtøjcøxpä, jaanaä Dios quiapxpaatpä, ja'a jiiby tsänaabiä tsajtøgooty. ²²Pøn jaduhñ capxpaatp ja'a tsajpootyp, jaanaä Dios yhäñaabiejt quiapxpaatpä, møødä Dios ja'a jim häñaabiä.

²³Mijts myajcopcøøby mädyii ca'a tsoobaatp coo hajxy hänäjty tii mguyoxø'øwa'añ maa ja'a tsajtøjcän. Pero cabä Diosmädia'agy hajxy myajcopcø'øy coo jaduhñ miäna'añ coo mhojiäya'ayhädät, coo hojiot mmøødhädät, coo ja'a Diosmädia'agy mmäbøgät. Maas hoy jaduhñ coo hajxy mgudiúnät ca'xy pedyii. ²⁴Jaduhñ mäwínäts hajxy myajwiinhixø'øy nebiä wiindspän; cab hajxy myajcopcø'øy mädyii tsoobaatp.

²⁵⁻²⁸Jaduhñ mijts mja wi'i quiähxø'øga'añ nebiä hoyhäna'cän maa ja'a cu'ugwiinduumän. Pero haxøøgwiiinmahñdy hajxy mmøød. Tsipcøxp ja'a mhaxøøgwiiinmahñdy hajxy mnajtshixø'øwät, jaduhñ hajxy tøyhajt hoy mhídät.

²⁹Naxy hajxy yajxøn mguhmuuçh maa ja'a Diosquexypähajxy jecy ñäaxtägøøyyän. Hojiäya'ayhajxy hijty. ³⁰Mänit hajxy mmäna'añ: "Coo højts häxøpy jecy tøø njugyhältäm, cabä nhap ndeedy hajxy häxøpy tøø nbuhbéjtäm coo ja'a Diosquexypä hajxy yagho'cy."

³¹Cab jaduhñ tiøyyä. Tøø ja'a mhap mdeedy hajxy häxøpy mbajatcøøbiä; ³²y jaduhñ hajxy mjaançh pajatcø'øwaambä.

³³Jaduhñ mäwínäts hajxy mga'awiindøyyä nebiä tsahñdiän. Hoyhoy hajxy jaduhñ jiiby mdsaaçhpøga'añ møjcu'uhaam.

³⁴Nguexáambiøch ja'a Diosquexypä

maa mijtsän, mөөдä cuhwijypia, mөөдä yajnähixөөбиä. Näje'e hajxy myagho'oga'añ; näje'e hajxy mmөjpahbeda'añ cruzcөxp; näje'e hajxy mwobho'oga'añ tsajtөгooty. Näje'e hajxy mbäbo'owa'añ cajpt-cajpt. ³⁵Mijts jaduһn mmөөdhadaamby ja'a pojpä coo ja'a hojiäya'ayhajxy nägөxiä yagho'cä mөөдä Abel mөөдä Zacarías, ja'a Berequías yhuung. Tsajtөгooty ja'a Zacarías yagho'cä; ja'a mhap ja'a mdeedyhajxy jaduһn jecy jatcөөyy. ³⁶Tehm tiөyhajt jaduһn, mijts ja'a pojpä mmөөdhadaamby.

³⁷Mijts Jerusalénpäjäya'ay, tөө ja'a Diosquexypä hajxy mguhga'ačh. Jaduһn mäwfiinhөch mijts mayhooc tөө nja näwa'añ nebiä tseej ja'a yhuung nähmuhxtägoyyän; pero caj mijts myajnäwa'ana'añ. ³⁸Mobädäjpөch mijts nnähgue'ega'añ, ³⁹y cábөch jaduһn xyhixaannä hөxtä cóonөch hänäjty ngädaactägatsa'añ. Mänit hajxy mmäna'ana'añ: “Tsөc yө'oya'ay wiingudsähgөөyyäm, yө'oya'ay Diosquexypä.”

24 Mänitá Jesús hajxy piädsөөmy tsajtөгooty. Mänitá Jesús nämaayyá ja'a miägu'ughajpähajxy:

—Huug hix yө'ө möj tsajtөjc.

²Mänitá Jesús yhadsooyy:

—Tehm tiөyhájthөch mijts nnäma'ay, yө'ө möj tsajtөjcä, cөxaamb jaduһn piuma'añ; cөxaamb jaduһn quiuhdägoyya'añ.

³Mänit hajxy nөcxy maa ja'a Olivostunän. Mänitá Jesús yhөxtaacy naaxwiin. Mänitá Jesús hamee'ch nämaayyá ja'a miägu'ughajpähajxy:

—Hөjts hawáañac mänaa yө'ө tsajtөjc jaduһn piuma'añ. Mädyii hijxtahnd jaduһn cähxө'ogaamb coo hänäjty mgädaactägatsa'añ, coo ja'a naaxwiimbä hänäjty wyiimbida'añ.

⁴Mänitá Jesús miänaañ:

—Ca'a hajxy myajwiinhөөñ.

⁵Minaamb hajxy nämay.

Jaduһn hajxy ñibiäda'aga'añii nébiөch hөөchän. Jaduһn hajxy miäna'ana'añ: “Hөөch je'e Cristo.” Nämayyá jäya'ay jajwiinhөөna'añ.

⁶Mänit hajxy mmädoyhada'añ coo ja'a tsip jaduһn tөө piädө'ogy. Pero cab hajxy mdsähgө'өwät. Tspicөxpä häyohn jaduһn jiada'añii. Pero cajnä hänäjty yhabaady coo ja'a naaxwiimbä hänäjty wyiimbida'añ. ⁷Cajpthaam hajxy jaduһn ñimiädsibө'өwa'añii. Naxaambä yuuba'am wiinduhmyhagajpt mөөдä hujx. ⁸Pero nä'ä tshöndaacnä ja'a tsө'ty hänäjty jaduһn.

⁹Mänit mijts myaghäyoowhixa'añ myajyagho'oga'añ. Mänit mijts myajmähanhada'añ maa ja'a hөөchcөxpän wiinduhmyhagajpt. ¹⁰Mänitá Dios hajxy ñajtshixө'өwa'añ nämay. Mänit hajxy ñimiähanhada'añii hamiñ haxөpy mөөдä hajxy tijaty jajniñahdsөma'añii.

¹¹Wäditaambä hөhndaacpähajxy hänäjty may. Mäna'anaamb hajxy hänäjty cooc tyijy hajxy wiädity ja'a Dioscөxpä. Nämayyá cu'ughajxy jajwiinhөөna'añ. ¹²Cab hajxy ñimiägu'ughadäänänä je'eguiөxpä coo ja'a haxөөгpä hänäjty jiaanč tehm wiädity.

¹³Pero pөnjaty jaduһn ca'a

jøjwa'adsaamb, je'eds ja'a hoybä paadaamb. ¹⁴Wiinduhmyhagajpt ja'a mädia'agy wiädita'añ mädyii jaduhñ mänaamb coo ja'a Dios ja'a miäjaa yajcähxø'øga'añ. Cøxaambä cu'ughajxy miädoyhada'añ; mänitäts ja'a naaxwiimbä wyiimbida'añ.

¹⁵(Pøñ hädaa nocy capxp, ween jaduhñ wyiinjuø'øy.) Ja'a Daniel, Dios jaduhñ jecy quejx. Je'eduhñ cujahy coo ja'a haxøøgpä miedsa'añ maa ja'a Diostøjcän, y coo mänit jaduhñ yajma'ada'añ. Coo ja'a haxøøgpä hajxy mhíxät, ¹⁶mänit hajxy päyø'øguiä mnøcxät maa ja'a tunän, mijts yaa tsänaabiä Judeanaaxooty. ¹⁷Y ja'a hajxy hijpä tøjwiing, jaduhyyä hajxy piäyø'tøwät, cab hajxy jaduhñ tii yajpädsómät tøgooty. ¹⁸Y ja'a hajxy jim hijpä camjooty, jaduhyyä hajxy piäyø'tøøbät, cab hajxy jaduhñ nøcxy tii wyich maa ja'a tiøjcän. ¹⁹Pobre ja'a to'oxiøjc-hajxy hänäjty maaxhuungmøødpä, møøð hajxy hänäjty huungyajtsi'tspä. ²⁰Mmänuu'xtá'agäp ja'a Dios hajxy coo hajxy ween mga'a päyø'øgy coo hänäjty tiøøhcä, ni ja'a poo'xxiøøjooty. ²¹Porque jaanč tehñ miøc ja'a tsaächpä ñaxa'añ. Ni mänaa jaduhñ tøø quia'a jadyii nebiä jaduhñ jiada'añiijän. Y caj mänaa jiajtägatsa'añii jadähooçän. ²²Pero Dios jaduhñ tøø yajnähdijy coo ja'a tsaächpä jejcy quia'a jadøøjät, je'eguiøxpä coo chocy ja'a tøøbä wyiimbíyyäbä. Coo häxøpy jaduhñ tøø quia'a yajnähdijy, caj pøñ häxøpy cho'oga'añ.

²³Coo mijts pøñ xñämä'awät: "Huug hiç, chaadsä Cristo", o

"Huug hiç, xiids je'e", cab hajxy mmäbøgät. ²⁴Hiç, minaambä wiinhøhmbähajxy; jaduhñ mäwiin hajxy ñibiäda'aga'añii nebiä Criston; jaduhñ mäwiinäts hajxy ñibiäda'aga'añii nebiä Diosquexypän. Yajcähxø'øgaamb y hajxy ja'a hoy-yagjuøøñäjatypä nebiä cu'ug hajxy jaduhñ wyiinhøønät; høxtä ja wiinhøønäänäp hajxy je'ebä, ja'a Dios tøø wyiimbíyyäbä. ²⁵Chaads mijts nnäma'ay jäguemiä. ²⁶Coo pøñ xñämä'awät: "Huug hiç, jim wiädity pactuum", cab hajxy jim mnøcxät; o coo hajxy xñämä'awät: "Huug hiç, jiiby je'e yu'uçhtium", cab hajxy mmäbøgät. ²⁷Cooçh hänäjty nwiimbida'añ, høøch ja'a Diosquexypä, jaduhñ mäwiin quiähxø'øga'añ nebiä wädsuçän. Wiinduhmyhagajpthøch ja'a jäya'ayhajxy xyhixa'añ. ²⁸Tsipcøxp jaduhñ jiada'añii nébiøch chaa nmäna'añ.

²⁹Coo ja'a tsaächpä hänäjty tøø ñajxnä, mänitiä hänäjty wyiingoodsø'øwa'añ; cabä po'o hänäjty yhana'añ. Chaadsä madsa'a may quia'awa'añ; chaadsä tsajt chäyuyya'añ. ³⁰Mänitøch ja'a nhijxtahñd jim quiähxø'øga'añ tsajpootyp cooçh hänäjty nwiimbida'añ, høøch ja'a Diosquexypä. Mänitä jäya'ayhajxy wiinduhmyhagajpt jiø'øwa'añ xiuudsa'añ. Mänitøch hajxy xyhixa'añ cooçh hänäjty ngäda'aga'añ jocjooty. Diosmäjaaháamhøch jaduhñ ngäda'aga'añ hajájjäp. ³¹Mänitøch ja'a nmoonsä tsajpootypä nhane'ema'añ coo ween hajxy møc

xiu'uxy xuuxthaam. Mänitöch ja'a nwiimbiybähajxy xyajtu'ugmugaanä wiinduhmyhagajtpä.

³²'Tsög ja'a tsø'ty jaduhñ yajmäbaatäm nebiä piidsquepiän. Coö yhaabiädsömy, mänit hajxy mnajuø'øy coö pioodtägøøñä.

³³Jaduhñ mäwíinäts je'e, coö ja'a tsø'ty hajxy jaduhñ mhíxät, mänit hajxy mnajuø'öwät coöch hänäjty mobädajpä nwiimbida'añ.

³⁴Tøyhájtäts mijts nnäma'ay, coöch hänäjty nwiimbida'añ, cajnä jäya'ayhajxy hänäjty quiøxy ho'ogy, ja'a hajxy jäda'ahaty jugyhajpä. ³⁵Ja'a tsajtwiing jaduhñ tägoyyaamb møødä naaxwiimbä. Tøjiadaamb jaduhñ nébiøch cham nmädia'aguiän.

³⁶'Pero ni pøn jaduhñ quia'a najuø'øy mänaaxøø jiada'añii ni mäduhnajtä. Ni ja'a Diosmoonsä tsajpootypä hajxy quia'a najuø'øy. Ni høøch nga'a najuø'øy, høøch ja'a Dioshuung. Jagooyyä Dios jaduhñ ñajuø'øy, ja'a nDeedyhájtäm.

³⁷'Coöch jaduhñ nwiimbida'añ, høøch ja'a Diosquexypä, jaduhñ mäwíinäts hänäjty jiada'añii nebiä Noé jecy jiajtiän. ³⁸Cajnä Dios ja'a nøøgomdägoy hänäjty quiexyñä. Jimä jäya'ayhajxy hänäjty quiay yhu'ugy, piøcy yhu'ugy, høxtä coö ja'a Noé hänäjty tøø tiägø'øy barcojooty. ³⁹Ni mänit hajxy hänäjty quia'a najuø'øyñä høxtä coönä ja'a nøøgomdägoy miejch. Mänit hajxy çøjx chømdu'ubøgyii. Jaduhñ mäwíinäts jiadáañäbä coöch hänäjty nwiimbida'añ, høøch ja'a Diosquexypä. ⁴⁰Mänitxøø ja'a ya'adiøjc-hajxy hänäjty nämetsc yhida'añ camjooty. Tu'ug hänäjty

yajnøcxa'añii; tu'ug hänäjty yajmähmø'øwa'añii. ⁴¹Metscä to'oxiøjc-hajxy hänäjty jiøch. Tu'ug hänäjty yajnøcxa'añii; tu'ug hänäjty yajmähmø'øwa'añii.

⁴²'Nähix hahixø'ø hajxy mhídät; cab hajxy mnajuø'øy mänaa ja'a mWiindsønñhajxy quiäda'aga'añ. ⁴³Jaduhñ mäwíinäts ja'a cudøjc-hajxy, coö hajxy jaduhñ ñajuø'öwät mäduhnajtä ja'a mee'tspä miedsa'añ coods, jujcy hajxy jaduhñ yhídät, y cabä mee'tspä hajxy jaduhñ yajtøjtägø'öwät. ⁴⁴Jaduhñ mäwíinäts mijtspä, nähix hahixø'ø hajxy mhídät. Cábøch mijts xñä'ägä najuø'öwät mänäajøch jaduhñ ngäda'aga'añ, høøch ja'a Diosquexypä.

⁴⁵'Ja'a moonsäwiindsøn, je'edsä miämoonsä yajcaaby maa ja'a wyiindsøn tiøjcän. Hoy jaduhñ coö ja'a wyiindsøn miädia'agy miäbøjcät, coö cuhwijy tiünät. ⁴⁶Coö ja'a wyiindsøn miädsät, jootcujc ja'a moonsä ñijiäwø'øwa'añii mädyii jaduhñ cudiuumb. ⁴⁷Tøyhájtäts mijts nnäma'ay, jaduhñä moonsä piäda'aga'añii nebiä wyiindsønän jim maa ja'a wyiindsøn tiøjcän, mäduhñtiä ja'a wyiindsøn hänäjty miøødä. ⁴⁸'Pero ja'a moonsä ca'a hoybä, je'eds jaduhñ mäna'anaamb cooc tyijy ja'a wyiindsøn quia'a tsoj medsa'añ. ⁴⁹Mänitä miämoonsä tiägø'øwa'añ häyoowhijxpä. Mänitä mu'ugyjiäya'ay miøødtägø'øwa'añ caabiä huucpä. ⁵⁰Cabä wyiindsøn jaduhñ yhuuc jahmiedsaannä coö wyiimbida'añ. Coö ja'a wyiindsøn jaduhñ jiaançh médsät, ⁵¹mänitäts

ja'a craa hoyhoy quiumädowa'añ mөөдä miäga'awiindöybä. Mänit hajxy jio'owa'añ xiuuds'a'añ.

25 'Coo ja'a Dios ja'a miäjaa jaduhñ yajcähxö'oga'añ, jaduhñ mäwíinäts je'e nebiä pөc hu'ug tөө jiadyiijän. Jimä cäxyiidöjc ja'a jamiö'öd hajxy hänäjty yhähixy. Nämajc hajxy hänäjty. Candilcón hajxy hänäjty yhähixy. ²⁻⁴Nämägooxc-hajxy, cab hajxy hänäjty nähix hähixö'ө tөө tiu'uböcy. Cabä guiaastä hajxy hänäjty nä'ä tägö'öbä tөө jiuu. Pero ja'a jiamioөdhajxy ja'a jaac nämägooxpä, nähix hähixö'ө hajxy hänäjty tөө tiu'uböcy mäbөjpä. Nä'ä tägö'öbä ja'a guiaastä hajxy hänäjty tөө jiuu. ⁵Coo ja'a jamiö'öd jaduhñ quia'a tsoj mejch, mänitä cäxyiidöjc-hajxy cөjx miaaho'ogy. ⁶Coo quiuptsuhmdäjöөy, mänitä jäya'ay tu'ug yaaxy: “Xiidsä jamiö'öd miech; nөcx hajxy jөjcubaadö'ow.” ⁷Mänitä cäxyiidöjc-hajxy cөjx piädö'ogy. Mänitä quiandilhajxy quiuhdö'өxöөy. ⁸Mänit hajxy miänaañ, ja'a hajxy hänäjty nähix hähixö'ө tөө quia'a tu'uböquiäbä: “Hөjtsä gaastä weeñtiä móooyäc; pi'idsaamb hөjtsä ngandil jaduhñ.” ⁹Mänit hajxy yhadsooy, ja'a hajxy hänäjty nähix hähixö'ө tөө tiu'uböquiäbä: “Caj, ni jaduhñ quia'a mädöyhada'añ maa ja'a hөjtsөxpän. Nөcx hajxy jaduhñ ñijiuuyyaxä maa tioogyiijän.” ¹⁰Mänit hajxy nөcxy juubiä. Mänitä jamiö'öd jaduhñ miejch. Ja'a cäxyiidöjc-hajxy gaastämөөdpä, mänitä jamiö'öd hajxy miөөdtägöөy tөгooty. Mänitä

tөjc hajxy yhägөөñä. ¹¹Mänitä cäxyiidöjc-hajxy jia mejtsnä, ja'a gaastä hajxy hoy tөө jiuuyyäbä. Mänitä hajxy jia cugapxöөy: “Wiindsön, huuc yaghawa'ads hädaa tөjc.” ¹²Mänit hajxy nämaayyä: “Cäbөch mijts jaduhñ nhixiä. Tөyhajt jaduhñ.”

¹³Coo ja'a Jesús jaduhñ miädiaacpädöөy, mänit miänaañ: —Jaduhñ hajxy mnibiäda'agöөjät nähix hähixö'ө. Caj mijts mnajuö'ө mänaajөch nwiimbida'añ, hөөch ja'a Diosquexypä.

¹⁴'Coo ja'a Dios ja'a miäjaa jaduhñ yajcähxö'oga'añ, jaduhñ mäwíinäts je'e nebiä jäya'ay tu'ugpän. Nөcxaamb hänäjty je'e wiingnaaxooty. Mänitä mioonsähajxy miөjyaaxy. Mänitä xiädö'өñ yajmämähmөөy.

¹⁵'Tu'ug jaduhñ yajmämähmөөyyä mägooxmillón. Paady may miooyyä coo hänäjty jiaty xädö'өñ yajmayö'ow. Tu'ug jaduhñ yajmämähmөөyyä mejtsmillón. Tu'ug jaduhñ yajmämähmөөyyä tu'millón. Mänitä wiindsön tiu'ubөjcy. ¹⁶Jaaya'ay ja'a mägooxmillón wiingpөjcäbä, yajtägөөy jaduhñ niyhajjätbä. Yajmayöөy ja'a xädö'өñ jaduhñ; mägooxmillón jaduhñ jiaac paaty. ¹⁷Jaana jaduhñduhmbä, jaaya'ay ja'a mejtsmillón wiingpөjcäbä, mejtsmillón jaduhñ jiaac paaty. ¹⁸Pero jaaya'ay ja'a tu'millón wiingpөjcäbä, hoy ja'a jut jaduhñ tiajy. Mänitä wyiindsön xiädö'өñ hoy yú'tsänä jutjooty.

¹⁹'Cujecy ja'a wyiindsönhajxy mejtstägajch. Mänit hajxy tiägöөy cueentäyajpädsөmbä. ²⁰Jayөjp

jaaya'ay miehch ja'a mägooxmillón hánajty tøø wyiingpóquiäbä. Mänitá wyiindsón miooyy cøxiä møødä mägooxmillón tøø jiaac páadiäbä. Mänit miänaañ: "Wiindsón, mägooxmillónhøch jaduhñ xmiooyy; chaads je'e møødä mägooxmillónhøch tøø njaac yajmayó'øyäbä." ²¹Mänitá wyiindsón miänaañ: "Hoy miich jaduhñ tøø mgudiuñ. Wéeñtiøch miich nyajmämähmøoyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayó'øwät. Tøjtägø'øw tøgooty, ween nxoondáacäm." ²²Mänitá craa jiaac miehch ja'a mejtsmillón hánajty tøø wyiingpóquiäbä. Mänit miänaañ: "Wiindsón, mejtsmillónhøch jaduhñ xmiooyy; chaads je'e møødä mejtsmillónhøch tøø njaac yajmayó'øyäbä." ²³Mänitá wyiindsón miänáangumbä: "Hoy miich jaduhñ tøø mgudiuñ. Wéeñtiøch miich jaduhñ nyajmämähmøoyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayó'øwät. Tøjtägø'øw tøgooty, ween nxoondáacäm." ²⁴Mänitá craa jiaac tehñ miehch ja'a tu'millón hánajty tøø wyiingpóquiäbä. Mänit miänaañ: "Wiindsón, nnajuøøbiøch coo miich hojioot mga'a møødä. Miich ja'a xädø'øñ jaduhñ mbaadaamby maa tøø mga'a tuñän." ²⁵Páadyhøch hijty ndsähgø'øy. Páadyhøch ja'a xädø'øñ hoy nyu'uçh naaxjutjooty. Huug hix, chaads je'e." ²⁶Mänitá wyiindsón yhadsooyy: "Caj miich hoy mgudiuñ. Mjaançh tehñ ñuux miich. Mnajuøøby miich

jaduhñ cooçh hojioot nga'a møødä, cooçhä xädø'øñ nbaada'añ maaçh tøø nga'a tuñän." ²⁷Páadyhøch nxädø'øñ jaduhñ cu xpiädaacä bancojooty. Jiiby cu miayøoyy. Mänitøch nxädø'øñ cu xmiooyy møødä xädø'øñhuung." ²⁸Mänitá hajxy ñämaayyá, ja'a hajxy jim tánaabiä: "Pøjcä yø'ø craa xädø'øñ hajxy tu'millón; mo'ow yø'ø craa hajxy ja'a majcmillónmøødpä." ²⁹Pøñ may nä'ägä møød, maas may jaduhñ mio'owa'añii. Hanaxiä jaduhñ miøødhada'añ. Pero pøñ jaduhñ weeñtiä møød, pøgáanaxäp je'e mäduhñtiä miøødä. ³⁰Yø'ø craa jaançh tehñ ñuuxpä, høxwijtspädsøñ hajxy hagoonstuum. Jiiby jaduhñ jio'owa'añ xiuudsaañ." ³¹Cooçh jaduhñ ngädá'agät hanehmä, høøçh ja'a Diosquexypä, jímhøch jaduhñ nhäña'awa'añ maa ja'a hoyhäñaabiejtän ja'a yajxonä. Quípxyhøch nmoonsä tsajpootypähajxy xmiøødcäda'aga'añ nägøxiä. ³²Mänitøch ja'a jäya'ayhajxy xwyiingumedsø'owa'añ ja'a wiinduhmyhagajtpä. Mänitøch hajxy jaduhñ nyajwa'xa'añ nebiä meegän nebiä chiibän. ³³Nbäda'agáambiøch näje'e maaçh nhahooguiø'øjän, näje'e maaçh nhanajtycø'øjän. ³⁴Ja'a hajxy hijpä hahooguiø'ø, mänitøch hajxy nnäma'awa'añ: "Min hajxy yam; tøøçh mijts nDeedy xwyiimbiiy coo hajxy mhané'emät. Jequiän hajxy jaduhñ xwyiimbiiy, cajnä ja'a naaxwiin hánajty yhädiuñ. ³⁵Mänáajøch hijty nyäho'ogyiijän, mänitøch hajxy xyajcaayy.

Mänáajøch hijty ndødsø'oyiijän, mänítøch hajxy xyajnøøhuucy. Mänáajøch hijty nwäditian nebiä jäguembäya'ayän, mänítøch hajxy xyaghamejtstaacy. ³⁶Mänáajøch wit hijty nga'a møødän, mänítøch hajxy xñähxojxy. Mänáajøch hijty mba'amgo'na'ayän, ndsumyhäña'ayän, mänítøch hajxy hoy xquihixy.” ³⁷Ja'a hajxy hijpä hahooguiø', mänit hajxy yhadsowa'añ: “Wiindsøn, mänaa højts miich tøø nyajcay; mänaa højts miich tøø nyajnøøhu'ugy; ³⁸mänaa højts miich tøø nyaghamejtsta'agy; mänaa højts miich tøø nnähxoxy; ³⁹mänaa højts miich hoy tøø nguhixy.” ⁴⁰Mänítøch nhadsowa'añ: “Tøyhajt mijts nnäma'ay, cooçh mijts ja'a njamiøødhajxy tøø xñäxuu'tsä, hoy hajxy quia'a ja møjtojcä, jaduñ mäwiinhøch tøø xñäxuu'tspä.” ⁴¹Mänítøch hajxy nnäma'awa'añ ja'a hajxy hanajtycø'øbä: “Jua'ads hajxy jim, mijts haxøøgtuum hijpä. Häda'ag hajxy jilby maa ja'a jøøn mänaa quia'a pi'lichän. Paadiä jøøn tøø piäda'agyii, jiiä møjcu'uhajxy chaächpøga'añ. ⁴²Mänáajøch hijty nyäho'ogyiijän, cáboch hajxy xyajcaayy; mänáajøch hijty ndødsø'oyiijän, cáboch hajxy xyajnøøhuucy; ⁴³mänáajøch hijty nwäditian nebiä jäguembäya'ayän, cáboch hajxy xyaghamejtstaacy; mänáajøch wit hijty nga'a møødän, cáboch wit hajxy xmiooyy; mänáajøch hijty nba'amgo'na'ayän, ndsumyhäña'ayän, cáboch hajxy hoy xquihixy.” ⁴⁴Mänit hajxy miäna'ana'añ: “Wiindsøn, mänaa højts miich nga'a puhbejty;

mänaa højts miich nhijxy coo hänajty myäho'ogyii, coo hänajty mdødsø'oyii, coo hänajty mwäditian nebiä jäguembäya'ayän, coo wit hänajty mga'a møødä, coo hänajty mba'amgo'na'ay, coo hänajty mdsumyhäña'ay.” ⁴⁵Mänítøch nhadsowa'añ: “Tøyhajt mijts nnäma'ay, cooçh mijts ja'a njamiøødhajxy tøø xquia'a näxuu'tsä, hoy hajxy quia'a ja møjtojcä, jaduñ mäwiinhøch tøø xquia'a näxuu'tspä.” ⁴⁶Yø'øds hajxy jilby häda'agaamb maa hajxy chaächpøga'añän cøjxta'axiøø. Pero pønjätyhøch tøø nwiimbiy, je'eds hajxy cøjxta'axiøø jugyhadaamb nebiä Dios jjugyhatian.

26 Coo ja'a Jesús jaduñ miädiaacpædøøyy, mänit nñämaay ja'a jiamiøødhajxy:

²—Mnajuøøby hajxy jaduñ coo ja'a pascuaxøø cumaaxc yhadsuujø'øwa'añ. Mänítøch hajxy xyajcø'dägø'øwa'añ, høøch ja'a Diosquexypä. Mänítøch hajxy xmiøjpahbeda'añ cruzcøxp.

³Mänitä teedywiindsøn'hajxy yhamugøøyy møødä ley-yajnähihøøbiähajxy møødä jäya'ayhajxy martuumähajpä maa ja'a judiøshajxiän. Jim hajxy yhamugøøyy maa ja'a Caifás tiøjcän, ja'a hänajty møjcuहुdujtmøødpä maa ja'a teedyhajxiän. ⁴Mänit hajxy quiojyquiapxyhajty nebiä Jesús hajxy miädsät, neby hajxy jaduñ yagh'ogät. ⁵Mänit hajxy niñämaayyä: —Cab jaduñ yhoyyä coo hajxy nmájtsämät ja'a xøøjooty coo ja'a cu'ughajxy nñä haamhadät.

⁶Jimä Jesús hänajty maa ja'a cajt jaduñ xiøhatian Betania,

maa ja'a Simón tiogootiän, ja'a hänäjty tøø nähwa'ačhijäbä ja'a haxøøgpa'am. ⁷ Jimä Jesús hänäjty quiay, mänitä to'oxiøjc tu'ug miejch, perfumecón, ja'a jaanč tehñ chowbä. Mänitä Jesús ja'a perfume yajcuhda'xøøyyä. ⁸ Coø ja'a Jesús jiamiøødhajxy jaduhñ yhiijxy, cab hajxy jaduhñ yhojiäwøøyy. Mänit hajxy miänaañ:

—Tii yø'ø perfume jaduhñ coø yaghäyooyy. ⁹ Coø jaduhñ cu tiøø'cy, mänitä häyoobäya'ay jaduhñ cu nä'ägä puhbejty.

¹⁰ Coø ja'a Jesús jaduhñ miädooyy, mänit miänaañ:

—Ca'a yø'ø to'oxiøjc hajxy mhadsipy. Ca'a yhaxøøgpä jaduhñ tøø tiuñ maa ja'a høøčhcøxpän.

¹¹ Ja'a häyoobädøjc, homiänaajä mijts jaduhñ xmiøødhida'añ; pero høøč, cábøch mijts jejcy nmøødhida'añ. ¹² Páadyhöch yø'ø to'oxiøjc perfume xyajcuhda'xøøyy, coöch mobädajpä nho'oga'añ.

¹³ Tøyhájtäts mijts nnäma'ay, homiaajä hädaa hoguiapxy hädaa homiädia'agy hajxy yaghawa'xø'øwät maa hädaa yaabä naaxwiinän, mänit hajxy jaduhñ miädia'aga'añ nébiøch yø'ø to'oxiøjc perfume tøø xyajcuhda'xø'øy. Jaduhñds yø'ø to'oxiøjc jiahmiedsa'añii.

¹⁴⁻¹⁵ Ja'a Jesús jiamiøødhajxy ja'a nämajmetspä, tu'ug hänäjty xiøhaty Judas Iscariote. Mänitä Judas ja'a teedywiindsøn'hajxy hoy näma'ay:

—Mädúhñtiøch hajxy xmiäjúyät coöch ja'a Jesús hajxy nyajcø'ødägø'øwät.

Mänitä Judas miooyyä hii'xmajc plataxädø'øñ. ¹⁶ Mänit

wyiinmahñdyhajty nebiä Jesús yajcø'ødägø'øwät.

¹⁷ Ja'a tehñ xiøøhadsuujø'ø hajxy hänäjty quiuhdujthaty coø ja'a tsajcaagy hajxy hänäjty quiay ja'a ca'a tsoomiøødpä. Mänitä Jesús ja'a jiamiøød nämejtsä. Mänit miäyajtøøwä:

—Maa hajxy ndsuugáayyämät ja'a pascuaxøøjooty.

¹⁸ Mänitä Jesús yhadsooyy: —Nøcx hajxy cajptooty maačh nmägu'ughajpä tiøjcän. Mänit hajxy mnämä'awät: “Nøm højts nWiindsøn miäna'añ cooc tøø yhabáatäxä, y cooc højts yaa ndsuugaya'añ ja'a pascuaxøøjooty maa miičh mdøgootiän.”

¹⁹ Mänit hajxy jiaanč cudiuuñ neby hajxy nämaayyän. Mänitä jøø'xy hajxy yhädiuuñ.

²⁰ Coø quioodsøøyy, jimä Jesús hajxy hänäjty quiay møødä nämajmetspä. ²¹ Mänitä Jesús miänaañ caaguiujc:

—Tøyhájtäts mijts nnäma'ay coöch mijts mjamiøød tu'jaya'ay xyajcø'ødägø'øwa'añ maačh nmädsipän.

²² Mänit hajxy jiootmadiägøøyy. Mänit hajxy tiägøøyy yajtøøbä: —Wiindsøn, nej, høøch je'ejä.

²³ Mänitä Jesús yhadsooyy: —Ja'ačh tu'ugtexy

xmiøødcaamiujpä, jé'ečhäts jaduhñ xyajcø'ødägø'øwaamb.

²⁴ Jadúhñhöch njada'añ nhabeta'añ, høøch ja'a Diosquexypä, nebiä Diosmädia'agy jaduhñ miäna'añän. Pero jaanč tehñ chaachpøgaamb jaaya'ay häyoobä ja'ačh tøø xyhawaanø'øyäbä. Mejor häxøpy tøø quia'a miñ tøø quia'a ca'ay.

²⁵Mänitá Judas miänaañ, ja'a hánajty tøø yhawaan'ø'oyäbä:

—Wiindsón, nej, høøch je'e'jä.

Mänitá Jesús yhadsooy:

—Miičh je'e.

²⁶Jimná hajxy hánajty quiaynä, mänitá Jesús tsajcaagy quion'cy. Mänitá Dioscujú'uyäp jejcy. Mänitá tsajcaagy qyijwa'xy. Mänitá jiamiøød miooy. Mänit miänaañ:

—Cay hajxy; jaduñ mäwiin hädaa tsajcaagy nébiøchä nni'x nébiøchä ngopcän.

²⁷Mänitá Jesús taza quion'cy. Mänitá Dioscujú'uyäp yéjcumbä. Mänitá jiamiøød ja'a taza miooy. Mänitá Jesús miänaañ:

—Hu'ug hädaa vino hajxy nägøxiä.

Mänitá vino hajxy yhuucmujcy tu'ugtaza.

²⁸Mänitá Jesús miänángumbä:

—Jaduñ mäwiin hädaa vino nébiøchä nnø'tiän. Hijxtahñ jaduñ coöchä jemyguiuhdujt nyajwiimbädsøma'añ coöchä jäya'ayhajxy may nnähho'tu'uda'añ, coöch jaduñ nyajnáhwa'adsaanä ja'a piojpa quiädieey. ²⁹Pero nnämäabiøch mijts coöch hädaa vino nga'a huuctägatsa'añ høxtä cóonøch hánajty tøø nho'ogy. Mänitøch mijts jaduñ nmøødhuucmujtägatsa'añ jim maächä nDeedy jaduñ yhane'emiän.

³⁰Mänitá Dioshøy hajxy yhøøyy.

Mänit hajxy ñøcxy maa ja'a Olivostunän. ³¹Mänitá Jesús miänaañ:

—Hädaa coods, cábøch mijts ja'a nmädia'agy hajxy hoy xmiäbøgåanänä. Mänitøch hajxy jaduñ xñähgue'ega'añ.

Jaduñhä Diosmädia'agy miäna'añ: “Nyagho'ogáambiøch ja'a meegcueendähajpä. Mänitá meeghajxy xii yaa ñøcxø'owa'añ.”

³²Pero coöch hánajty tøø njujypiøcy, mänitøch nnøcxø'oga'añ jim Galilea; mänit mijts høxhaam mnøcxa'añ.

³³Mänitá Pedro miänaañ: —Hoy miičh hajxy nägøxiä xjia nähgue'egät, cábøch miičh nnähgue'egät.

³⁴Mänitá Jesús miänaañ: —Tøyhájthøch miičh nnäma'ay, coo ja'a tsee y hánajty quia'a ya'axynä hädaa coods, tøø miičh hánajty tægøøghooc mnijjøgapxyii cóogøch tyijy jaduñ xquia'a hixiä.

³⁵Mänitá Pedro miänaañ: —Høyhøch miičh näguipxy nja møødhø'ogät, cábøch jaduñ nnijjøgapxøøjät.

Jaduñ hajxy nägøxiä piamánaambä.

³⁶Mänitá Jesús hajxy miejch maa hánajty xiøhatiän Getsemaní. Mänitá Jesús miänaañ:

—Yaa hajxy høxta'ag naaxwiin; nõcxyhøch jimhaamby nhuuc Diospa'ya'axy.

³⁷Mänitá Jesús ja'a Pedro wioonøcxy hawiing møødä Zebedeo yhuunghajxy nämetscä. Mänitá Jesús tiägøøyy jootmayhajpä hoyhoy. ³⁸Mänit miänaañ:

—Jaančh tehñ jootmayhájjøch jaduñ. Jadúhñhøch nnijjiäwø'oyii nebiä ho'ogaambän. Yaa hajxy mmähmø'øwät. Tsøg hajxy jujcy hjjtäm.

³⁹Mänitá Jesús weentiä jiaac nõcxy. Mänit miägutscädaacy. Mänit Dyiospa'yaaxy:

—Teedy, miich mee'x, ca'a yhndijy jaduhñ cu ndsaaçhpøjcy. Pero ca'a yhøøçhä nguhdujt jaduhñ nyajtunaamby; miichä mguhdujt nyajtunaañäm.

⁴⁰Mänitä Jesús wyiimbijty maa ja'a nädägøøgpä hänajty tøø ñähgue'eguiän. Jim hajxy hänajty mia'ay coo ja'a Jesús jim miejch. Mänitä Pedro ñämaayyá:

—Nej, ni tu'horä hajxy jujcy mga'a hida'añä. ⁴¹Jujcy hajxy mhídät. MDiospa'yá'axäp hajxy jaduhñ nebiä møjcu'u hajxy jaduhñ xquia'a jøjcapxó'øwät. Jia tsojpiä mjoothajxy jaduhñ coo hajxy jujcy mhídät, pero ja'a mni'x ja'a mgopc-hajxy jaduhñ ca'a mee'xtugaamb.

⁴²Ja'a miämetsc-hoocpä Jesús ñøcxy Diospa'yaaxpä:

—Teedy, miich mee'x, cábøch ndijy jaduhñ cu ndsaaçhpøjcy. Pero ween miichä mguhdujt nyajtúñäm.

⁴³Mänit wyiimbjícumbä maa ja'a Pedrohajxiän. Tøø hajxy hänajty miaahó'cumbä. Jaançh tehñ mia'awaamb hajxy hänajty hanaxiä. ⁴⁴Mänitä Jesús ñähguéeccumbä. Mänit ñøcxcumbä miädägøøghoocpä Diospa'yaaxpä. Mänit jaduhyyä miänáangumbä.

⁴⁵Mänit miéjtscumbä maa ja'a Pedrohajxiän. Mänit miänaañ:

—Ma'awxä hajxy, poo'xxä hajxy. Tøøds je'e yhabaady cooçh hajxy xyajcø'ødägø'øwa'añ maa ja'a cubojpä cugädieejjäya'ayän, høøçh ja'a Diosquexypä. ⁴⁶Pädø'øg hajxy, jamds hajxy. Xiids je'e myiñ ja'a høøçh jaduhñ xyegaambä.

⁴⁷Mädiaacnä ja'a Jesús hänajty coo ja'a Judas miejch, ja'a Jesús

hänajty tøø miøødwädítiäbä ja'a miämajmetspä. Jaançh tehñ miay ja'a jäya'ay hänajty miøødä, pujxtmøødpä, paçycappä. Ja'a teedywiindsøn'hajxy jaduhñ quejx møødä martuumädøjc. ⁴⁸Ja'a Judas ja'a Jesús hänajty yegaamb. Tøø ja'a Judas ja'a jäya'ay hänajty ñäma'ay:

—Ja'a høøçh hänajty ndsu'xaambiä, je'eds hajxy mmádsäp.

⁴⁹Mänitä Judas ja'a Jesús ñämejch. Mänitä yajpoo'xy. Mänit chu'xy. ⁵⁰Mänitä Jesús miänaañ: —Mägu'ughajpä, tiich xwia'ana'añ. Mänitä Jesús hajxy miajch.

⁵¹Mänitä Jesús jiamiøød ja'a piujxt jiuu'ty. Mänitä teedywiindsøn mioonsä tu'ug tiaatspujxtúutäxä.

⁵²Mänitä Jesús miänaañ:

—Cuyuugø'øw yø'ø mbujxt. Pønjaty jaduhñ pädø'p pujxtthaam, jaanä pujxtthaam yho'ogaambä. ⁵³Nej, caj miich mnajuø'øyä, cooçhän Deedy jaduhñ nnámá'awät cooçh ween xpiuhbety, mänítøch ja'a mioonsä tsajpootypä milhaam xyajñäguéxät.

⁵⁴Pero cooçh jaduhñ nnámá'awät, cabä Diosmädia'agy jaduhñ tiøjiädät maa jaduhñ myiñän cujaay cooçh jaduhñ tsipcøxp njada'añ nhabeta'añ.

⁵⁵Mänitä Jesús ja'a majiäya'ay ñämaayy:

—Pujxtmøød paçycap hajxy tøø mbädø'øgy. Jaduhñhøch hajxy tøø xmiach nebiä mee'tspan. Jabom-jabomhøch mijts hijty nyajñähixø'øy tsajtøgooty, y cábøch hajxy mänaa tøø xmiach. ⁵⁶Pero páadyhøch jaduhñ njaty nhabety, jaduhñä Diosmädia'agy jaduhñ tiøjiädät, nebiä Diosquexypähajxy jecy quiujahyyän.

Mänitá Jesús jiamiøðhájxy
quiøxy päyø'cy. Nidiuhmä Jesús
jaduhñ ñähgueecá.

⁵⁷Mänitá Jesús yajmejtsá
maa ja'a Caifás tiøjcän, ja'a
møjcuðdujtmøødpä maa
ja'a teedyhajxiän. Jimä
ley-yajñähixøøbiähájxy hánajty
tøø yhamugø'øy møødä
martuumädøjc-hájxy. ⁵⁸Ja'a Pedro,
jäguemjuøøby hánajty pianøcxy.
Mänit jii by tiägøøyy maa ja'a Caifás
tiøjwiingän. Mänitiä yhöxtaacy
maa ja'a policíahájxiän. Yhixaamby
hánajty je'e nebiä Jesús hánajty
tiuna'añii.

⁵⁹Ja'a Jesús, tøø hánajty
yajtøjtägø'øyii maa ja'a
teedywiindsøn hájxy hánajty
tøø yhamugø'øyän møødä
ley-yajñähixøøbiähájxy møødä
møjtøjc-hájxy. Jiiby hájxy hánajty
wyiinmahñdyhaty nebiä Jesús
hájxy jaduhñ ñähøønø'øwät, hoy
jaduhñ quia'a ja tøyyä, nebiä Jesús
hájxy jaduhñ jajyagho'ogøøjät.

⁶⁰Pero cabä tøyhajt hájxy
piaaty, hoy jäya'ay may jia wi'i
ñähøønøøyy. Mänitá høhñdaacpä
metsc piädsøømy. ⁶¹Mänit hájxy
miänaañ:

—Nøm yø'ø craa miänaañ coogä
Dioštøjc jaduhñ yajma'ada'añ;
mänitác cumaaxc wiingpä
yajpädø'øgåangumbä.

⁶²Mänitá teedywiindsøn
tiänaayyø'cy. Mänitá Jesús
ñämaayyä:

—Nej, caj mhadsowa'añä. Tii
hájxy jaduhñ coo xñäxø'øwø'øy.

⁶³Pero cabä Jesús waamb ñä'a
mänaañ. Mänitá teedywiindsøn
miänáangumbä:

—Ja'a Diosøxpä miich ja'a tøyhajt
myégät; højts hawáañac pø tøyhajt
jaduhñ coo miich ja'a Dios tøø
xquiøxy, coo ja'a Dios xyHuunghaty.

⁶⁴Mänitá Jesús miänaañ:

—Tøyhajt jaduhñ nej miich
mmäna'añän. Jadúhñhöch mijts
nnämaabiä, høøch ja'a Diosquexypä,
cooçh hájxy xyhixa'añ hääna'a maa
ja'a Dios yhahooyhaampiän, ja'a
mäjaamøødpä; y cooçh jaduhñ
nmänajtagatsa'añ jocjooty.

⁶⁵Mänitá teedywiindsøn ja'a
wyit quiøø'ch. Paady quiøø'ch coo
hánajty yhawa'anda'agy. Mänit
miänaañ:

—Tøø hädaa craa quiapxtägoy ja'a
Diosøxpä. Tii testigo hájxy njaac
wáañämät. Hamdsoo hájxy tøø
mmädoy nej tøø quiapxtägoyyän.

⁶⁶Neby hájxy mmäna'añ.

Mänit hájxy yhadsooyy:

—Tøø jaduhñ quiapxtägoy ja'a
Diosøxpä; ween yho'ogy.

⁶⁷Mänitá Jesús wyiingudsujøøyyä.
Mänit wiojpä. Mänit
wyiingugoxøøyyä. ⁶⁸Mänit
ñämaayyä:

—Pø tøyhajt jaduhñ coo Dios tøø
xquiøxy, najuø'øw pøn tøø xquiøxy.

⁶⁹Jimnä ja'a Pedro hánajty
yhääna'ay tøjwiing. Mänitá Pedro
ñämejtsä to'oxymoosä tu'ug.
Mänit ñämaayyä:

—Miich ja'a Jesús hijty
mmøødwädijpy, túhmäts, ja'a
Galileatsohmbä.

⁷⁰Mänitá Pedro ñijjogapxä maa
ja'a jäya'ayhajxiän:

—Pätiidä jaduhñ mnä'a
mädiaacypy.

⁷¹Tøjpadšømäññäp ja'a Pedro
hánajty, mänit yhiñxägumbä

ja'a to'oxymoonsä tu'ug. Mänitä moonsä ñämaayy ja'a hajxy hänäjty jimbä:

—Yø'ø mixy ja'a Jesús hijty mөөdwdäijp ja'a Nazarettsohmbä.

⁷²Jadähooc ja'a Pedro ñijjögapxä:

—Tøyhajt, cábøch ja'a craa nhixiä.

⁷³Mänitjuøøby ja'a Pedro ñämäayyägumbä, ja'a hajxy hänäjty jimbä:

—Tøyhajt jaduhñ coo miich ja'a Jesús hijty mmөөdwdäity; jaduhñ miich mmädiaacpä nebiä Galileatsohmbän.

⁷⁴Mänitä Pedro miänaañ:

—Pø cábøch tøyhajt nmädia'agy, wéenhøch ja'a Dios jaduhñ xyajcumädoy. Cábøch ja'a craa nhixiä.

Tuunä ja'a Pedro jaduhñ ñä'ä mänaañ, mänitiä tseey yaaxy.

⁷⁵Mänitä Pedro quiøxy jahmiejch nebiaty ja'a Jesús hänäjty tøø miäna'añän: “Cajnä ja'a tseey hänäjty ya'axy, tøø miich hänäjty tægøøghooc mnijjögapxyii cóogøch tyijy xquia'a hixiä.” Mänitä Pedro jim chohñ. Mänit tiägøøyy jøøbiä hoyhoy.

27 Coö jioøøyy, mänitä teedywiindsønajxy quiojyquiapxytiumñ möødä martuumädøjc-hajxy nebiä Jesús hajxy yaghó'ogät. ²Mänitä Jesús hajxy cø'øxoch hoy yajcø'ødägø'øy maa ja'a Poncio Pilatän, ja'a hänäjty tuumbä gobernador.

³Ja'a Judas ja'a Jesús hänäjty tøø yhawaanø'øy. Coö ja'a Judas yhijxy coö ja'a Jesús hänäjty yagho'oga'añii, cabä jioot jaduhñ ñä'ä møc-hajty. Mänitä hii'xmajcpä plataxädø'øñ hoy yajwiimbity maa

ja'a teedywiindsønajxiän, maa ja'a martuumädøjc-hajxiän. ⁴Mänit miänaañ:

—Tøøch jaduhñ ngädieey coöchä craa ho'cøøc tøø nhawaanø'øy, ja'a cajpä pojpä cádieemiøødpä.

Mänit hajxy yhadsooyy:

—Ca'a yhøjts ngüeendä yø'øduhñ. Miiçh mgüeendä yø'øduhñ.

⁵Mänitä Judas ja'a xädø'øñ ñajtsxäbapøøyy jii by tsajtøgooty. Mänit hoy ñiyo'tøøyyänä.

⁶Mänitä teedywiindsøn ja'a xädø'øñ hajxy pyiwø'cy. Mänit hajxy miänaañ:

—Cab hädaa xädø'øñ hajxy hawiinmats nbädäacämät maa ja'a xädø'øñ hajxy quiuyoxø'øyän, je'eguiøxpä coö jäya'ay jaduhñ tøø tioogyii ho'cøøc.

⁷Mänit hajxy quiojyquiapxytiumñ coö ja'a naax hajxy hänäjty jiuuya'añ, ja'a xøhajpä Tu'tspojtstaact, ja'a xädø'øñhaam ja'a Judas hänäjty hoy tøø ñajtsxäbapø'øyäbä. Je'e hajxy hänäjty wia'ana'añ cabäsantä maa ja'a jäguembäjäya'ayhajxy ñaaxtägø'øwät.

⁸Coö ja'a naax hajxy jaduhñ jiuuyy ja'a xädø'øñhaam ja'a Judas hänäjty hoy tøø ñajtsxäbapø'øyäbä, paady jaduhñ xiøhaty Nø'ñaax høxtä jäda'anäbaadyñä. ⁹Jaduhñdsä tøjiajty nebiä Jeremías jecy miänaañän, ja'a Diosquexypä: “Mänitä plataxädø'øñ hajxy miooyyä hii'xmajc (nebiä judiøshajxy tøø ñägapxiän). ¹⁰Mänitä tu'tspojtstaact hajxy hoy jiuuy nébiøch ja'a Dios tøø xyhane'emiän.”

¹¹Mänitä Jesús yajmejtsä maa ja'a gobernadorän. Mänit miäyajtøøwä:

—Nej, miich ja'a judiøshajxy xguiobiernähajpä.

Mänitä Jesús yhadsooyy:

—Tøyhajt jaduhñ nej miičh mmäna'añän.

¹²Mänitä Jesús ñähwaambejtä ja'a teedywiindsøn

¹³Mänitä Pilato miänaañ:

—Nej, caj miičh jaduhñ mmädoyyä nebiaty hajxy jaduhñ xñänómiänä.

¹⁴Pero cabä Jesús ñä'a hadsooyy; paadiä gobernador jiaančh tehñ yagjuöoyy. Cab hänajty ñajuø'öy nebiaty jaduhñ wyiinmahñdyhädät.

¹⁵Jaduhñdsä gobernador hänajty quiuhdujthaty coo ja'a tsumyjiäya'ay hänajty tu'ug yhøxmach xøøjooty pøn ja'a cu'ug jaduhñ ñänómäp coo yhøxmadsøøjät. ¹⁶Jiibiä craa hänajty tu'ug chumyčhäna'ay ja'a xøhajpä Barrabás. Tøø ja'a Barrabás xiøø hänajty wyi'li wia'xy. ¹⁷Coo ja'a cu'ughajxy hänajty tøø quiøxy hamugø'öy, mänitä Pilato yajtøoyy: —Pøn mijts jaduhñ mnänøømby cooçh nhøxmädsät, Barrabás tögä ja'a Jesús ja'a Cristohajpä.

¹⁸Ñajuøöbiä Pilato hänajty coo ja'a Jesús jaduhñ yajcø'ödägøoyyä je'eguiøxpä coo ja'a quiuhdujt hänajty quia'a yajmädsöjcäxä.

¹⁹Jimnä ja'a Pilato hänajty yhäña'ayñä maa hänajty tiuñän, mänitä Pilato quiapxyñäguejxä ja'a tio'oxiöjcam: “Cab jaduhñ cu mdsaačhtiuuñ; hoyhäna'c yø'øduhñ. Tøøçh haamyquiods haxøøg nguma'ay yø'øgøxpä.”

²⁰Mänitä teedywiindsøn ja'a cu'ug hajxy jiojcapxøoyy coo ween hajxy miäna'añ coo ja'a Barrabás yhøxmadsøøjät, y coo ja'a Jesús

yagho'ogøøjät. ²¹Mänitä gobernador ja'a cu'ug miäyajtøögumbä:

—Mädyii häna'c mijts mnänøømby cooçh nhøxmädsät.

Mänit hajxy yhadsooyy:

—Barrabás.

²²Mänitä Pilato yajtøoyy:

—Ja'a Jesúsäts, ja'a xøhajpä ja'a Cristo, nébiøch je'le ndúnät.

Mänit hajxy nägøxiä yhadsooyy:

—Møjpahbet cruzøxp.

²³Mänitä Pilato miänaañ:

—Tii haxøøgpä jaduhñ tøø tiuñ coo jaduhñ yagho'ogøøjät.

Mänit hajxy jaduhñ yáaxcumbä:

—Møjpahbet cruzøxp.

²⁴Coo ja'a Pilato jaduhñ yhiixy coo ja'a cu'ughajxy hänajty quia'a mädowa'añ, coo hajxy maas hanaxiä yhaamhada'añ, mänitä nøø yujwaañ. Mänit quiø'öbuju cu'ugwiinduum. Mänit miänaañ:

—Ca'a yhøøçh jaduhñ mänaamb coo yø'ø hoyhäna'c jaduhñ yagho'ogøøjät; mijts jaduhñ mänaamb.

²⁵Mänitä cu'ughajxy nägøxiä miänaañ:

—Tøyhajt jaduhñ. Højts jaduhñ mänaamb mөөд højts nnøøx mөөд højts nmajc.

²⁶Mänitä Pilato ja'a Barrabás yhøxmajch. Mänitä Jesús yajwojpä. Mänit yajcø'ödägøoyy coo nøcxy miøjpahbedyii.

²⁷Mänitä Jesús yajnøcxä ja'a gobernador soldadohajxy. Mänitä Jesús jiuhibgøoyyä ja'a soldadohajxy nägøxiä. ²⁸Mänitä wyit yajtsijjxä. Mänitä tsaptswit yajpägøoyyä. ²⁹Mänitä haptycoronä piädaacä maa ja'a quiuhduumän. Mänitä paxy yajcø'øgabøoyyä

yhahooyhaampiäcøø. Mänit wyiinjicädaacä. Mänit wyiingapxpejtä:

—iViva ja'a judíos ja'a guobiernähajxy, viva!

³⁰Mänitä Jesús wyiingutsujøøyyä.

Mänitä paxy piójcäxä. Mänit wiojpä quiuhduum. ³¹Coo yhuuc wiingapxpéjtäbä, mänit tsaptswit yajtsíjjägumbä. Mänit yhamdsoo wit yajpägøøyyägumbä. Mänit yajnøcxänä maa hänajty miøjpahbeda'añiijän.

³²Tu'haamnøcxpä jäya'ay hajxy tu'ug jiojcubaadøøyy ja'a Cirenetsohmbä. Simón hänajty xiøhaty. Mänitä Simón ja'a cruz hadsip yajcajptsoowä.

³³Mänit hajxy miehch maa jaduhñ xiøhatiän Gólgota. Je'eduhñ nänøømby: “Maa ja'a ho'ogyjiäya'aguiopc ñähgäda'aguiän.” ³⁴Mänitä Jesús tsaatyñøø jia yaghuucä ja'a jaanč tehñ tiahmbä. Coo jaduhñ yhuucmajch, cab jaduhñ chojcy.

³⁵Mänitä Jesús miøjpahbéjtänä cruzcøxp. Mänitä soldadohajxy yhäyø'cy dadoshaam nebiä Jesús ja'a wyit hajxy yajwá'xät. Jaduhñdsä tiøjiajty nebiä Diosquexypä jecy miänaañän: “Dadoshaam hajxy yhäyø'cy nébiøch nwit hajxy jaduhñ xyajwá'xät.” ³⁶Mänitä soldadohajxy jim yhøxtaacy nebiä Jesús hajxy jaduhñ wyiinhäñá'awät. ³⁷Mänit hajxy jim yuugjahy cruzcuhduum tiiguiøxp ja'a Jesús coo tøø miøjpahbedyii: “Jesús hädaa, ja'a judíos guobierno hajxy.”

³⁸Jimä mee'tspä metsc miøjpahbéjtäbä. Cujc ja'a Jesús

miähmøøyy, tu'ug hanajtyhaamby, tu'ug hahooyhaamby. ³⁹Ja'a jäya'ayhajxy hänajty najxpä, wyi'i wyiingapxpejpy hajxy hänajty møød hajxy hänajty wyi'i quiuhjägøñ. ⁴⁰Jaduhñ hajxy hänajty ñiñäma'ayii:

—Ja'a, miich jaduhñ mänaañ coo mahñdy ja'a tsajtøjc myagjida'añ, y cumaaxc mahñdy mhädiuna'añ wiingpä. Niyajmänacøøjätshamdsoo pø tøyhajt jaduhñ coo miich Dios xyHuunghaty.

⁴¹Jaduhñ ja'a teedywiindsøñhajxy piamänaambä møødä ley-yajnähihxøøbiähajxy, møødä fariseoshajxy, møødä martuumädøjc-hajxy.

⁴²—Tøø jaduhñ yhuuc wi'i miäyajnähwa'aäch, y caj hamdsoo ñiyajnähwa'adsa'añii. Pø tøyhajt jaduhñ coo jaduhñ guobiernähaty maa ja'a judíoshajxiän, ween jaduhñ hamdsoo ñiyajmänaqyii cruzcøxp neby højts jaduhñ nmäböjcamät. ⁴³Jaduhñ tøø xnamäaayäm coo yHuunghadyii ja'a Diósäm y coo ja'a Dios jaduhñ cwieendähada'añ. Pø tøyhajt jaduhñ coo ja'a Dios jaduhñ jiaanč tsoey, ween jaduhñ yajnähwä'aäch.

⁴⁴Jaduhñdsä mee'tspähajxy piamänaambä, ja'a hajxy jim miøjpahbetypä cruzcøxp.

⁴⁵Mänitcujxyxiøø ja'a naaxwiimbä wyiingoodsøøyy. Tägøøghorä jaduhñ yhiyty wiingoods. ⁴⁶Mänitmänacyxiøø ja'a Jesús møc yaaxy: “Elí, Elí, lama sabactani”, je'eduhñ nänøømby: Dios mee'x, Dios mee'x, tiich jaduhñ coo tøø xñajtshixø'øyy.

⁴⁷Ja'a hajxy hänajty jim wi'i tiänaabiä, coo hajxy jaduhñ

miädooyy, mänit hajxy näje'e miänaañ:

—Elías yø'ø craa jaduħn jia wi'i miøjyaaxyp.

⁴⁸Mänit tu'jäya'ay xo'od hoy quioñ päyø'øguiä. Mänit quiumadsøoyy ja'a tsaatyñøøxunjooty. Cøjx je'e chomø'øy. Mänit paxy yagøjwøøñøoyy ja'a xo'od. Mänitä Jesús yaghaguubøoyyä neby jaduħn miúugät. ⁴⁹Mänitä häna'c-hajxy wiingpä miänaañ:

—Huug hahixnä, ween yhuuc cähxø'øgy pø minaambä Elías yajñahwa'adsa'añ.

⁵⁰Mänitä Jesús jadähooc møc yäaxcumbä. Mänit yho'nä. ⁵¹Mänitä tsajtøjc-hadøødiuc quioø'tswa'xy cujjiä. Cøxp jaduħn quioø'tsohñ. Mänitä hujx ñajxy. Mänitä tsaajaduħn wia'xy. ⁵²Mänitä ho'ogyjiäya'ajiut may yhawaach. Mänitä ho'ogyjiäya'ayhajxy may jiuypiojcy, ja'a Diosmädia'agy hajxy hänajty tøø miäbøquiäbä. ⁵³Coo ja'a Jesús hänajty tøø jiuypiojcy, mänitä ho'ogyjiäya'ayhajxy yhawa'adspädsøømy, ja'a hajxy hänajty tøø jiuypioquiäbä. Mänit hajxy quiajptägøoyy Jerusalén. Jim hajxy jaduħn yhiyxä nämay.

⁵⁴Jimä soldadowiindsøn ja'a Jesús hänajty cwieendähaty møødä soldadohajxy. Coo ja'a tsø'ty hajxy jaduħn yhiyx, mänit hajxy jiaanč tehñ chähgøoyy. Mänit hajxy miänaañ:

—Tøyhåjtäm hijty coo hädaa craa hijty Dyioshuungä.

⁵⁵Jimä tadjäya'ay ja'a Jesús hajxy hänajty wyl'i ñäheebø'øy jäguemduum. Jimä Jesús hajxy hänajty tøø piadsoon Galilea.

Tøø hajxy hänajty piuhbety.

⁵⁶Jimä María hänajtypä ja'a Magdalatsohmbä, møødä María ja'a Jacobo tiajhajxy, møødä Zebedeo tio'oxiøjc. ⁵⁷Coo quioodsøoyy, mänitä mäyøøjäya'ay tu'ug miejch, ja'a xøhajpä José. Jim hänajty choon Arimatea. Pianøcxäbä ja'a Jesús miädia'agy hänajty je'e. ⁵⁸Mänitä José ja'a Pilato cuhdujt hoy miäyujwa'añ coo ja'a ho'ogyjiäya'ay yajmänácät cruzcøxp. Mänitä José ja'a cuhdujt miooyyä. ⁵⁹Mänit jaduħn yajmänajcy. Mänitä poobwit yajñahbijty. ⁶⁰Mänit jaduħn jiiby piädaacy tsaajutjooty ja'a naamdajypä. Paadiä José ja'a tsaajut hänajty tøø yajtajyii, jiiby hänajty piäda'aga'añii coo hänajty tøø yho'ogy. Mänitä tsaajut yhahämoomtägooyy tsaahaam maa ja'a Jesús hänajty tøø ñaaxtägø'øyän. Mänitä José wyiimbijty. ⁶¹Jimä María Magdalatsohmbähajxy miähmøoyy møødä María tu'ugpä. Jim hajxy hänajty yhäña'ay maa ja'a Jesús hänajty tøø ñaaxtägø'øyän.

⁶²Viernes ja'a Jesús jaduħn yho'cy. Cujaboom ja'a teedywiindsøñhajxy miejch maa ja'a Pilatän møødä fariseoshajxy. ⁶³Mänitä Pilato ñämaayyä:

—Miič møjteedy, ja'a craa häxøoy hó'cäbä, tøø hijty miäna'añ cooc tyjy cumaaxc hijty jiuypioğa'añ. Pero nä'a hønñdaac jaduħn.

⁶⁴Entonces, quex ja'a soldado jim maa tøø ñaaxtägø'øyän, jaduħn hajxy jaduħn jim yhadänä'awät jadu'tsuhm. Jaduħndsä Jesús miägu'ughajpä ja'a ñaaxni'x hajxy nøcxy quia'a yajpädsøømä.

Jaduhñdsä cu'ug hajxy quia'a nämá'awät cooc tyijy tøø jiuypioçy. Maas hanaxiä hajxy jaduhñ cu yhöñndaacy quejee ja'a Jesús hijty yhöñnda'aguiän.

⁶⁵Mäniä Pilato miänaañ:

—Xiidsä soldadohajxy. Ween hajxy jim nõcxy yhadána'ay neby jaduhñ quia'a pädsómät.

⁶⁶Mäniä soldadohajxy jim quiejxä hadänaabiä. Mäniä tsaajxy xioøjøøyy ja'a jim hämoomnaabiä maa ja'a tsaajuthaawän. Mäniä hajxy jim miähmøøyy.

28 Cujaboom näxøø jopynä, mäniä María Magdalatsohmä jim miejch maa ja'a Jesús hänajty tøø ñaaxtägø'øyän møødä María tu'ugpä. ²Mäniä hujx møc ñajxy. Jimä Dios ja'a mioonsä hänajty tu'ug tiäna'ay. Tsjajpootyp hänajty tøø choon. Mäniä tsaajxy jöhämoomy ja'a hijty hijpä juthaguum.

Mäniä yhöxtaacy tsaanähgøxp.

³Jaanch tehñ yhaamb hänajty je'e. Jaanch tehñ pioob ja'a wyit hänajty. ⁴Coo ja'a soldado ja'a Diosmoonsä hajxy yhijxy, mäniä hajxy tiägøøyy tsäyubiä. Jaanch tehñ chähgøøby hajxy hänajty. Mäniä hajxy quiädaayy. Jaduhñ hajxy miähmøøyy nebiä ho'ogypiän.

⁵Mäniä Maríahajxy ñämaayy ja'a Diosmoonsäm:

—Ca'a hajxy mdsähgø'øy. Nnajuøøbiøch jaduhñ coo ja'a Jesús hajxy mhøxta'ay, ja'a hijty tøø miøjpahbedyíjábä. ⁶Cabä jii; tøø jiuypioçy neby hijty tøø miäna'añän. Min hajxy huug hix maa tøø ñaaxtägø'øyän. ⁷Coo hajxy jaduhñ mhíxät, mäniä

miägu'ughajpä hajxy nõcxy paquiä mhawaanä coo jaduhñ tøø jiuypioçy, coo jaduhñ ñøcxø'øga'añ Galilea. Jim hajxy jaduhñ mbaada'añ. Jaduhñhöch mijts nhawáañäm.

⁸Mäniä Maríahajxy hoy yhixy paquiä maa ja'a Jesús hänajty tøø ñaaxtägø'øyän. Jíibädä hajxy chähgø'øy, jíibädä hajxy xioonda'agy. Mäniä miägu'ughajpä hajxy hoy yhawaanä päyø'øguiä.

⁹Tu'haamnøcxp ja'a Jesús ñäguehxtøøxy. Mäniä Maríahajxy yajpoo'xä. Mäniä Jesús hajxy wyiingumedsoøyy. Mäniä hajxy tiecymiämeneøøyy. Jaduhñ hajxy wyiingudsähgøøyy. ¹⁰Mäniä hajxy ñämaayy:

—Ca'a hajxy mdsähgø'øy. Nøcxhöch ja'a nmägu'ughajpä hajxy hawáañac coo hajxy jim ñøcxät Galilea, cooch hajxy jim xpiaada'añ.

¹¹Coo ja'a Maríahajxy hänajty tøø wyiimbity maa ja'a Jesús hänajty tøø jiuypioçy, mäniä soldadohajxy näje'e nõcxy cajpooty, ja'a hajxy hänajty tøø yhadána'ayäbä. Mäniä teedywiindsøn hajxy hoy yhawaanä nebiaty hajxy hänajty tøø yhixy.

¹²Mäniä teedywiindsøn hajxy hoy miøødmädia'agy ja'a martuumädøjc-hajxy neby hajxy jaduhñ quiojyquiapxytiünät. Mäniä soldado xädø'øn hajxy may miooyy. ¹³Mäniä soldadohajxy ñämaayy:

—Jaduhñ hajxy mmäná'anät coo hajxy coods mmaaho'cy, y coo ja'a Jesús ja'a miägu'ughajpähajxy hoy yajpädsømyii. ¹⁴Y coodsä gobernador jaduhñ miädoyhädät,

højts jaduñ nyajmäbögäp. Jaduñ hajxy xquia'a capxpáadät.

¹⁵Mänitä soldado ja'a xädø'õñ hajxy wyiingpøjcy. Mänit hajxy hoy jiatcø'øy neby hajxy hánajty tøø ñäma'ayijän. Jaduñdsä judíoshajxy miädia'agyñä høxtä jäda'anäbaadyñä.

¹⁶Mänitä Jesús miägu'ughajpähajxy jim ñøcxy Galilea, ja'a nämajtu'ugpä. Mänit hajxy jim miejch maa ja'a tunän maa ja'a Jesús hánajty tøø ñägäpxiän. ¹⁷Coo ja'a Jesús hajxy yhijxy, mänit hajxy wyiingudsähgøøyy, hoy hajxy hánajty näje'e quia'a ja mäböcy hamuumdu'joot. ¹⁸Mänit hajxy

wyiingumedsoøyyä. Mänit hajxy ñämaayyä:

—Tøøchä Dios cuhdajt cøxiä xmio'oy jim tsajpootyp, møød hädaa yaabä naaxwiin. ¹⁹Nøcx hajxy wiinduhmyhagajpt. Yajwiingapxø'øw hajxy nébiøch nmädia'agy hajxy xmiäbøjcät. Jaduñ hajxy myajnäbétät ja'a Diosteedycoxpä, møødä høøchcoxpä, møødä Dioshespíritucoxpä. Høøch ja'a Dios xyHuunghajp. ²⁰Jaduñ hajxy myajnähixø'øwät coo hajxy jaduñ miäbögät nebiátyhøch mijts tøø nhane'emiän. Mjahmiédsp hajxy jaduñ cooch mijts nmøødhida'añ cøjxta'axiøø høxtä coonä naaxwiimbä wyiimbídät.